

లూక రాస్తి సువార్త

నెల్వ కిబిసినిక

యా సువార్త లూక ఇని ఒరెన్ డాక్టరు, దెయెపిలెజ్ రాస్తికాదె. యేసు యా లోకమ్దు బత్తిత్తివలె జర్గితి దన్నివందిజ్ కత వజ రాస్త మనాన్. యేసు పుడుగు వందిజ్ మహి సువార్త ఇంక లావు వెప్తా మనాన్. మరి యేసు కిత్తి నండో బమ్మాని పణిజ వందిజ్, నండొండార్ జబ్బుదాన్ మహి వరిజ్ నెగెణ్ కిత్తిదన్ని వందిజ్ వెప్పినాన్. యేసు దేవుణు మరిసి ఇహిజ్బా లోకు వజ పుట్టి, లోకురి పాపమ్కాజ్ వందిజ్ సాజి, మరి దేవుణువెటె ఎలాకాలం బత్తిని బత్తుదు నడిపిసినాన్ ఇజి యా సువార్తదు వెప్పినాన్.

1-4 లూక తియెపిలెజ్ రాసినాన్. మా నడిమి జర్గితి సజతిజ వందిజ్ కతవజ రాస్తజ్ నండొండార్ సుడేతార్. మొదోహనె, యా సజతిజ సుడేతి సాసీర్, మరి, సువార్త బోదిస్తికార్ మజి వెప్తార్. వారు మజి వెప్తా వజనె, వీరు రాస్తార్. నాను యా సజతిజ్ విజు మొదోహనె బాగ నెస్త మహ. అందెజె అయాకెజ్ నీ వందిజ్ వరస రాస్తిజ బాగ మంజినాద్ ఇజి నాను ఒడేబిత. ఎందానిజ్ ఇహిజ, అయావలె నిజి నెస్పిస్తి విజు వన్మాజ్ పూర్తి అర్థం నిజి నెస్తిజానాద్.

బాప్తీసం సీని యోహాను పుడగు వందిజ్ వెప్పినాన్.

5 హారోదురాజు యూదయ దేసెం ఏలుబడిః కిజి మహివలె, జెకరియ ఇని ఒరెన్ పుజెరి మహాన్. వీంత్రు అబియ పుజెరి జట్టుదు మహికాన్. విన్ని ఆల్పి ఎలిసబెతు. అది అహారోను పుజెరి కుటుమ్దికాద్నె.

6 వీరు రిఎర్బా, నింద సిల్లెండ ప్రబు సీతి ఆడెజ, రూలుజ విజు లోజిజి, దేవుణు ముందాల నీతినిజాయితిదాన్ మహార్.

7 ఎలిసబెతు గొడ్డు బోదెలి. అందెజె వరిజ్ కొడోఁర్ సిల్లెర్. వారు రిఎర్బా నండొ డొక్ర ఆతార్.

8 ఉండ్రీ నట్టు జెకరియ జట్టుజ్ పుజేరి పణికిదెజ్ వంతు వాతాద్. అయావలె జెకరియ దేవుణు ముందాల పుజేరి పణి కిజినాన్.

9 పుజేరిజ మన్ని అలవాటు లెకెండ, సీటి పొక్తారె, జెక్రయెజ్ ఏర్పాటు కితార్. దేవుణు గుడిఁదు సొన్ని దూపం సురుదెజ్ వన్నిజ్ ఏర్పాటు కితార్.

10 దూపం సురుదెజ్ వేల ఆతాద్. నస్తవలె అబ్బె కూడిఁతిమహి మందలోకుర్ విజేరె వెల్లి మంజి పార్దనం కిజి మహార్.

11 నస్తవలె, దేవుణుదిజ్ దూపం సుర్ని మాలి పిటె ఉణెర్పడఁకాద్ దేవుణు దూత నిహాన్. నిహండ్రె వన్నిజ్ తోరె ఆతాన్.

12 జెకరియ, దేవుణు దూతెజ్ సుడఁతాండ్రె, గజిబిజి ఆజి నండొ తియెల్ ఆతాన్.

13 అయావలె దేవుణు దూత వన్నిజ్, “జెకరియ, నీను తియెల్ ఆమ. నీ పార్దనం దేవుణు వెహాన్. నీ ఆలు ఎలిసబెతు ఒరెన్ కొడోఁ ఇడ్నాద్దె. వన్నిజ్ యోహాను ఇజి పేరు ఇడ్దెజ్.

14-17 వాండ్రు ప్రబు ఎద్రు పెరికాన్ ఆనాన్. ద్రాక్కు కలుని మరి సొస్సిక ఇనికబా వాండ్రు ఉణ్ఎన్. అయిసి పొటలోఇ పిండం ఆతి బాణిజ్ మొదోల్ని దేవుణు ఆత్మ వన్నిజ్ నడిఁపిస్నాన్. ఇస్రాయేలు దేసెమ్ది లోకురిజ్ నండొండారిజ్ వరి దేవుణు ఆతి ప్రబు దరోట్ మహి తనాన్. ఏలియ ప్రవక్త లెకెండ నండొ గొప్ప సత్తుదాన్ వాండ్రు ప్రబు ముజుల సొనాన్. ఎందానిజ్ ఇహిజ, అప్పొసి మరిసిరిజ్ కూడుఁపైజ్. నాయం మన్నికార్ బుద్దిదాన్ నడిఁనివజ, విరి సరిదు దేవుణుమాట వెన్ఇవరిజ్, నడిఁపిస్సెజ్ ప్రబు వానివలె, వన్నిజ్ ఎద్రు సుడఁదెజ్ లోకాజ్ తయార్ కినివందిజ్ యా లెకెండ కినాన్లె. అందెజె వాండ్రు పుట్టివెలె మిజి గొప్ప సర్ద కినాన్లె. మరి, నండొండారిజ్ సర్ద కిబిస్నాన్లె”, ఇజి వెహ్తాన్.

18 నస్తవలె జెకరియ దేవుణు దూతెజ్ వెన్బాతాన్, “యాక ఎలాగ నాను నెస్తెజ్? నాను డొక్ర. నా బోదెల్బా డొక్కి ఆతాద్”, ఇజి.

19 అందెజె దేవుణు దూత, “నాను గబ్రియెలు. దేవుణు పడఃకాద్ నిల్ని మంజినికాన్. నీ వెట వర్గిజి, నిజి యా నెగ్గి కబ్బు వెప్తాజ్ దేవుణు నజి పొక్త మనాన్.

20 గాని నాను వెప్తా మాటెజ్ నీను నమిఇతి. అందెజె యాకెజ్ జర్గినిదాక, నీను గుల్ల ఆజి మంజినిలె. నాను వెప్తాకెజ్ జర్గిదెజ్ దేవుణు ఏర్పాటు కితి కాలమ్దు, పూర్తి ఆనెలె”, ఇజి వెప్తాన్.

21 నస్తివలె లోకుర్ జెక్రయెజ్ కాప్ కిజి మహార్. వీండ్రు ఎండనిజ్ దేవుణు గుడిఃదు నిసా ఆల్సెం ఆతాన్ ఇజి బమ్మ ఆజి మహార్.

22 వాండ్రు వెల్లి వాతివెలె, వరి వెట వర్గిదెజ్ అట్వెతాన్. అయావలె దేవుణు గుడిఃదు వినిజ్ దేవుణు ఇనికదో ఉండ్రి దర్ననం* తోరిస్తాన్ ఇజి నెస్తార్. వెయు రఇతిజ్, వాండ్రు వరిజ్ కియు సయ్న కితాన్. వాండ్రు గుల్ల ఆజి మహాన్.

23 వన్ని పణి కాలం వీజితిజ్ వాండ్రు వన్ని ఇండ్రో సాహాన్.

24 సెగం రోస్కు సాహి వెన్కా, వన్ని ఆల్ని ఎలిసబెతు పాత డిఃస్తాద్. అయ్దు నెలదాక అది ఇండ్రోనె మహాద్.

25 “ప్రబునె నా వందిజ్ యాక కితాన్. ఏలు నా ముస్కు కణక పెప్తా బస్తాండ్రె లోకుర్ ఎద్రు నజి మహి సిగుసేట్టు లాగితాన్”, ఇజి వెప్తాన్.

యేసు పుడుఃగు వందిజ్ వెప్సినాన్

26 ఎలిసబెతు పాత డిఃసి ఆరునెలాదు, దేవుణు గబ్రియెలు దూతెజ్, గలిలయ ప్రాంతమ్దు మన్ని నజరేతు ఇని పట్నమ్దు పొక్తాన్.

27 యోసేపు ఇన్ని ఒరెన్ వన్నిజ్ వెన్బాతి ఉండ్రి విడ్డి బోదెలిబాన్ దేవుణు దూత సాహాన్. అయ విడ్డి బోదెలి పేరు మరియు. యోసేపు దావీదు కుటుమ్దికాన్.

* **1:22 1:22** దర్ననం ఇహిజ ఇనికాదో ఉండ్రి నజతి కల లెకెండ్ టిటాజ్ తోరి ఆనికాదె అయాక దేవుణు సత్ఉదాన్ తోరి ఆజినాద్

28 దేవుణు దూత లోకసాహంద్రె, మరియుమ్యోజ్ సుడఃజి, “వందనం, ప్రబు నీ వెట మనాన్. నిజి నెగెండ దీవిస్త మనాన్”, ఇజి వెహ్లాన్.

29 అయ మాటెజ్ వెహదె, మరియు నండొ బాద ఆతాద్. వన్ని మాటెజిదిజ్ అర్లం ఇనికదో ఇజి దన్ని గర్భమ్దు బమ్మ ఆతాద్.

30 అయావలె దేవుణు దూత దన్నిజ్, “మరియ నీను తియెల్ ఆమ. దేవుణు నీ ముస్కు కనికారం తోరిస్త మనాన్.

31 నీను పాత డిఃస్తిదె, ఒరెన్ కొడొఃదిజ్ ఇడ్మిలె. వన్నిజ్ యేసు ఇజి పేరు ఇడఃఅ.

32 వాండ్రు పెరికాన్ ఆనాన్. విజుదనిజ్ అతికారం మని దేవుణు మరిసి ఇజి కూకె ఆనాన్లె. వన్ని అనిగొగొర్ ఆతి దాపీదు రాజు ఆతివజ, దేవుణుఆతి ప్రబు వన్నిజ్ రాజు కినాన్లె.

33 వాండ్రు, యాకోబుజ్ తెగ్గతివరిజ్ ఎలాకాలం ఏలుబడిః కినాన్లె. ఏలుబడిః కిదెజ్ అతికారం వన్నిజ్ ఎలాకాలం మంజినాద్లె”, ఇజి వెహ్లాన్.

34 అయావలె అది, “నాను ఎసెజ్బా మొగకొడొః వెట కూడఃఎనె. యాక ఎలాగ జర్గినాద్?”, ఇజి దేవుణు దూతెజ్ వెన్బాతాన్.

35 అందెజె దేవుణు దూత, “దేవుణు ఆత్మ నీ ముస్కు వానాన్లె. మొసాప్ కితిజ నీడ పిడఃక్కాద్. అయలెకెండ, విజు దన్నిజ్ అతికారం మన్ని దేవుణు సత్తు నిజి పిడఃక్కాద్. అందెజె పుట్టికాన్ దేవుణు బాణిజ్ వానికాన్. వాండ్రు దేవుణు మరిసి ఇజి కూకె ఆనాన్లె.

36 నీ డగ్రుహి లోకుఆతి ఎలిసబెతు డొక్రి కాలమ్దు ఒరెన్ బయిజ్ పాత డిఃస్త మనాద్. గొడ్డు బోదెలి ఇజి కూకె ఆతిదనిజ్ ఏలు ఆరు నెలెజ్.

37 విజు కిదెజ్ దేవుణు అట్టికాన్”, ఇజి వెహ్లాన్.

38 అయావలె మరియ, “ఇదిలో, నాను దేవుణు పణిమణిసి. నీను వెహ్లా లెకెండనె నజి జర్గిపిద్”, ఇజి వెహ్లాద్. అకవెహంద్రె దేవుణు దూత దని బాణిజ్ సాహాన్.

మరియ ఎలిసబెతుబాన్ ససాన్సినాద్

39 అయావలెనె, మరియు తయార్ ఆతాద్. ఆతాదె, యూదయ దేసెమ్ది గొరొణ్ ప్రాంతమ్దు మని ఉండ్రీ పట్నమ్దు బేగి సొహాద్.

40 అబ్బె మని జెకరియ ఇండ్రొ సొహాదె, ఎలిసబెతుజ్ దసూల్ఆతాదె, నమొస్తె వెహ్తాద్.

41-42 మరియు వెహ్తా వందనం ఎలిసబెతు వెహివెలె, దన్ని పొటాద్ మన్ని పిండం సర్దదాన్ కద్లితాద్. ఎలిసబెతు దేవుణు ఆత్తు దాన్ నిండ్రీజి సర్దద ఆజి ఈహు డటం వెహ్తాద్. “అబ! బోదెకా లొఇ, దేవుణు నిజెనె నెగెండ దీవిస్తాన్. నీ పొటాద్ మన్ని కొణ్ణొదిజ్బా దీవిస్తాన్.

43 నా ప్రబుజ్ అయ్సి నా డగ్గు వాదెజ్ నాను ఏపటిదిక ఆవ.

44 ఇదిలో నీ వందనం నా గిబ్బిదు అర్తిజ్, నా పొటాద్ మన్ని పిండం సర్దదాన్ కద్లితాద్.

45 ప్రబు దనిజ్ వెహ్తా మాటెజ్ జర్గినాద్ ఇజి నమకం ఇట్టికాద్ గొప్పది.

మరియ దేవుణుదిజ్ పొగిడిజి పార్జినాద్.

46 అయావలె మరియు ఈహు వెహ్తాద్. “నా పాణం ప్రబు గొప్ప పెరికాన్ ఇజి వెహ్సినాద్.

47-49 వాండ్రు వన్ని పణిమణిసిఆతి నా ఇజ్జి బత్కుదిజ్ నుడ్ఱెతాన్. అందెజె నా పాణం సజి రక్కిన్ని దేవుణు బానె సర్దద ఆజినాద్. గొప్ప సత్తు మన్ని దేవుణు నా వందిజ్ గొప్ప పణిజ్ కితాన్. అందెజె ఏలుదాన్ లోకుర్ విజేరె నా వందిజ్, దేవుణు దీవిస్తాకాద్ ఇజి వెహ్సారె. వాండ్రె నెగ్గి దేవుణు.

50 వన్నిజ్ తియెల్ ఆనివరి ముస్కు వన్ని కనికారం తర తరం మంజినాద్.

51 వాండ్రు వన్ని సత్తుదాన్ గొప్ప పణిజ్ కితాండ్రె తోరిస్తాన్. నానె పెరికాన్ ఇజి వరి లోఇ డ్ఱెబిజి గర్త ఆతి వరిజ్ వాండ్రు సెద్రిస్తాన్.

52 గర్త మని అతికారిజ, అతికారం దాన్ డిష్టాండ్రె ఇజిరి వరిజ్ పెరికార్ కితాన్.

53 బజాతివరిజ్ నెగ్గి టిండి సీజి సర్ద కిబిస్తాన్. మని వరిజ్ వహి కీదానె పోక్తాన్.

54-55 మా అనిరిజ్ 'కనికారం తోరిన్న' ఇజి ఒట్టు కితి వజి వాండ్రు కితాన్. వన్నిజ్ సేవ కిని ఇస్తాయేలు లోకాజ్ కనికారం ఆజి సాయం కితాన్. అబహముజ్ వన్ని కుటుమ్ది వరిజ్ విజేరిజ్ ఎలాకాలం కనికారం తోరిన్న ఇజి ఒట్టు కితాన్. అయాక వాండ్రు ఒడిఃబితాన్", ఇజి మరియ వెహ్తాద్.

56 అది డగ్రు మూండ్రీ నెలెజ్ దాక ఎలిసబెతు బాన్ మహదె దని ఇండ్రో మర్జి సోహద్.

బాప్తీసం సీని యోహాను పుట్టినాన్.

57 నెలెజె నిండ్రీతివలె, ఎలిసబెతుజ్ ఒరెన్ కొణ్ణె పుట్టాన్.

58 ప్రబు దన్నిముస్కు కణక పెహ్తా బేస్తాన్ ఇజి పడఃకాదికార్ని కూలెజ్ వెహరె, దన్నివెట నండో సర్ద ఆతార్.

59 కొణ్ణె పుట్టి ఎనిమిది దినమ్దు వన్నిజ్ సునతి కిదెజ్ కూడిఃతార్. కొణ్ణెదిజ్ అప్పొసి పేరు నన్నిక ఇడదెజ్ వారు ఒడిఃబితార్.

60 నస్తీవలె అయ్సి, "అహు పోని! వన్నిజ్ యోహాను ఇజి పేరు ఇడదెజ్", ఇజి వెహ్తాద్.

61 అందెజె వారు, "మీ కూలెజి లొఇ ఎయెరిజ్బా నిన్ని పేరు సిల్లెద్", ఇజి దనిజ్ వెహ్తార్.

62 వినిజ్ ఇన్ని పేరు ఇడదెజ్ అప్పొసి కోరిజినాన్ ఇజి నెస్తెజ్ వారు కియు సయ్న కిజి జెక్రయెజ్ వెన్బాతాన్.

63 నస్తీవలె వాండ్రు ఉండ్రీ రాసిని బల్ల లొస్తాండ్రె, "విన్ని పేరు యోహాను", ఇజి రాస్తాన్. వారు విజెరె నండో బమ్మ ఆతార్.

64 వెటనె, వన్నిజ్ వర్గిదెజ్ వెయు వాతాద్. దేవుణుదిజ్ పొగిడిఃజి వర్గిదెజ్ మొదోల్స్తాన్.

65 పడఃకాదికార్ విజేరె గొప్ప తియెల్ ఆతార్. యూదయ దేసెమ్ది గొరోబ్ ప్రాంతం విజు లోకుర్ విజేరె యా జర్గితి సజతిజ వందిజ్ వర్గిజి మహార్.

66 యాక వెహికార్ విజెరెబా దని వందిజ్ ఒడిఃబిజి, “యా కొడొః ఎలాగ మహ్తాకాన్ ఆనాన్లెనొ”, ఇజి వెహ్తాన్. ప్రబు సత్తు వన్నివెట మహాద్ ఇజి వారు నెస్తార్.

జెకరియ పొగిడిఃజి పార్జినాన్

67 నస్తివలె వన్ని అప్పొసి జెకరియ, దేవుణు అత్మదాన్ నిండ్రిజి, దేవుణు వెహ్తాజ్ మని సజతిజ వందిజ్ ఈహు వెహ్తాన్.

68 “ఇస్రాయేలు లోకురి దేవుణుదిజ్ పొగిడిఃజినాట్. ఎందనిజ్ ఇహిజ, వాండ్రు వన్ని లోకురిజ్ డిఃబిన్ని వందిజ్ వాత మనాన్.

69 ఒరెన్ సత్తు మని మజి గొప్పుజ రక్కిస్సివన్నిజ్ మా వందిజ్ సిత మనాన్. అయ వాండ్రు వన్ని పణి మణిసి ఆతి దావీదు కుటుమ్దు మనికాండ్రె.

70-71 సేన దినమ్కాజ్ ముజాలె, దేవుణు వన్ని బాణిజ్ వాతి ప్రవక్తెజవెట ఒట్టు కిత మనాన్. ఒట్టు ఇనిక ఇహిజ, “మా పగాతివరి బాణిజ్ మజి రక్కిస్సుఇజి. “మజి దూసిస్సి వరిబాణిజ్ రక్కిస్సు”, ఇజి. అయా ఒట్టువజనె, మజి రక్కిస్సి వన్నిజ్ సితాన్.

72 మరి వాండ్రు వెహ్తాన్, “మా అనిరిజ్ ఒట్టు కితి వజ కనికారం తోరిస్సు ఇజి. వన్ని వందిజ్ కేట ఆతి ఒపుమానం ఒడ్ఃబిన ఇజి.

73-74 మా బుబ్బ ఆతి అబ్రాహము వెట ఒట్టు కితాన్, మా పగ ఆతివరి బాణిజ్ మజి తప్రిస్సు ఇజి, తియెల్ నీల్లెండ వన్నిజ్సేవ కిదెజ్ మజి సాయం కిన ఇజి.

75 మరి, మాటు దేవుణుదిజ్ కేట ఆతి లోకుర్ వజ నీతి నిజాయితిదాన్ మా బత్కు విజు వన్ని ఎద్రు మండ్రెజ్ మజి తయార్ కిన ఇజి”, వెహ్తాన్.

76 మరి, నా కొడొః నీను విజు దన్నిజ్ అతికారం మన్ని దేవుణు ప్రవక్త ఇజి కూకెఅనిలె. ఎందానిజ్ ఇహిజ, నీను ముజాలె సాన్సి ప్రబుజ్ లోకుడగు వాదెజ్ సరి నెగెణ్ కినిలె.

77 నీ వన్ని లోకాజ్ వెహ్సాలె, “దేవుణు వరి పాపమ్కు నెమిసి వరిజ్ రక్సిస్సాన్లె”, ఇజి.

78 మా దేవుణు నండొ కనికారం మనికాన్. వాండ్రు దేవుణు మంజిని బాడ్డిదాన్ పొద్దు సోని లెకెండే రక్సిస్సి వన్నిజ్ తపిస్సాన్లె.

79 ఎందానిజ్ ఇహిజు, సీకటిదు మని వరిజ్ సావు బత్తుదు మని వరిజ్ జాయ్ సీదెజ్. మజీ సమాదనం దాన్ నడిఃపిస్తెజ్. దిని వందిజె వాండ్రు రక్సిస్సి వన్నిజ్ తపిస్సాన్లె”, ఇజి జెకరియ వెహ్సాన్.

80 కొడొః పిరితాన్. దేవుణు ఆత్మ సత్తు దాన్ పిరితాన్. వాండ్రు ఇస్రాయేలు లోకురిజ్ తోర్ని దాక యెరూసలేమ్దిజ్ వెల్లి బీడిఃమ్ బూమిదు ఒరేండ్రె బత్తితాన్.

2

1 అయ కాలమ్దు రోమ గవర్నెంటు అడిఃగి మన్నివిజు లోకురిజ్ జమబంది లెకెజ్ రాస్తెజ్ ఇజి కయిసరు అయుగుస్తు ఉండ్రె ఆత్త సితాన్.

2 కురెనియ ఇని ఒరెన్ సిరియ రాస్తెందిజ్ సుడొఃజి మహివలె యా మొదోహి జమబంది లెకెజ్ రాస్తార్.

3 విజేరె వరి వరి పట్టుమ్కాజ్ పేర్కు రాసె ఆదెజ్ సాహార్.

4 అయలెకెండే యోసేపు ఇనికాన్ ఒరెన్బా సాహాన్. వీండ్రు దావీదు కుటుమ్దికాన్. దావీదు పట్టుం బేత్లెహము. అందెజె వాండ్రు గలిలయ ఇని ప్రాంతమ్ది నజరేతు ఇని పట్టుం దాన్, యూదయ ప్రాంతమ్దు మని బేత్లెహము ఇని పట్టుమ్దు సాహాన్.

5 వన్నిజ్ వెన్బాతి మహి మరియు వెట జమబంది రాసె ఆదెజ్ సాహాన్. అయావలె దన్నిజ్ నెలెజ్ నిండ్రెతె మహా.

6 వారు అబె మహివలె దనిజ్ నోపిజ్ వాతె.

7 అది దని తోల్సుర్ కొడొఃదిజ్ ఏరుకొబాతాద్. వరిజ్ మండ్రెజ్ లార్జి ఇలు దోహ్కెతాద్. దోహ్కొఃఇతిజ్ పుట్టి కొడొఃదిజ్ కసెలిజాణిజ్ సుటిస్తారె, కొడ్డిఃజు సాలాది డోణిద్ త్రెప్తార్.

గొరెజ్ గవుడుఃజు దేవుణు దూత నెగ్గికబ్బు వెహ్సానాన్

8 నస్తవలె, అయ ప్రాంతమ్దు సెగొండార్ గొర్రెజ్ గవ్డుజ్ వరి గొర్రెజ, మడిజ మంద కితారె రెయ్తు కాపుకిజి మహార్.

9 అయావలె ఒరెన్ దేవుణు దూత వరిజ్ తోరె ఆతాన్. ప్రబు జాయ్ వరి సుటులం వాతాద్. వారు నండొతియెల్ ఆతార్.

10 అయావలె దూత వరిజ్, “మీరు తియెల్ ఆమాట్. లోకురిజ్ విజేరిజ్ నండొ సర్ద కిబిస్సి నెగ్గి కబ్బు నాను వెహ్నా.

11 నేండ్రు దావీదు పట్నమ్దు మిజి రక్కిస్సికాన్ ఒరెన్ పుట్ట మనాన్. వాండ్రు ప్రబు ఆతి క్రిస్తు.

12 యాకదె నాను మీజి వెహ్నిదనిజ్ గుర్తు “ఒరెన్ బయిదిజ్ కసెలిజాణిజ్ సుటిస్తారె, సాలాది డోణిద్ త్రెప్తి మనిక సూణిదెర్”, ఇజి వెహ్నాన్.

13-14 వెటనె, దేవుణు మంజిని బాడిది నండొ దూతెజ్ అయ దూతవెట కూడితె. కూడితారె, “విజు దన్నిజ్ అతికారం మన్ని దేవుణుదిజ్ పొగిడిజినాట్. యా లోకమ్దు వాండ్రు ఇస్టం కిని లోకురిజ్ సమాదనం మనీద్’ ఇజి దేవుణుదిజ్ పొగిడిజి మహార్.

15 దూతెజ్ వరిజ్ డిస్తారె, దేవుణు మంజిని బాడిదు సాహార్. సాహి వెనుక గొర్రెజ్ గవ్డుజ్, “మాటు బేత్తెహీముదు సొన్ని, ప్రబు మజి వెహ్పిస్తి యా జర్గితి సజతిజ సూణాట్”, ఇజి ఒరెన్దిజ్ ఒరెన్ వర్గితార్.

16 వారు బేగి సాహారె, మరియుయ్యెజ్, యోసేపుజ్, డోణిదు త్రెప్తి మని కొణొదిజ్ సుడతారె.

17 వారు వన్నిజ్ సుడతారె, యా కొణొ వందిజ్ వరిజ్ వెహ్ని మాటెజ్ విజేరిజ్ వెహ్నార్.

18 గొర్రెజ్ గవుడుజ్ వెహ్నికెజ్ వెహికార్ విజేరె నండొ బమ్ము ఆతార్.

19 గాని మరియు జర్గితి సజతిజ విజు గర్బమ్దు ఇడ్డి దన్నివందిజ్ ఎత్తుకిజి మహద్.

20 గవుడుజ్ వరిజ్ వెహ్నికెజ్, వారు సుడతికెజ్ విజు వన్కా వందిజ్ దేవుణుదిజ్ గవరం సీజి వన్నిజ్ నండొ పొగిడిజి మహ్నా సాహార్. దేవుణు దూత వరిజ్ వెహ్ని వజనె విజు జర్గితె.

21 వుట్టి ఎనిమిది రోస్కు ఆతిజ్, బయిజ్ సునతి కితార్. అయావలె వారు వన్నిజ్ యేసు ఇజి పేరు ఇట్టార్. పాత డిస్ఎండ ముజాలె దేవుణు దూత వెహ్తి పేరునె ఇట్టార్.

22 దేవుణు మోసెజ్ సితీ రూలుజ్దు మన్నివజ సుబ్రమ్వందిజ్ పూజెజ్ కిదెజ్ దినం ఆతాద్. అయావలె యోసేపుని మరియు బయిజ్ దేవుణుదిజ్ ఒవజెపైజ్, యెరూసలేమ్దు ఒత్తార్.

23 ఎందానిజ్ ఇహిజు, మోసె రాస్సెజ్ ప్రబు వెహ్తి రూలుదు మనాద్, “విజు తొలిత వుట్టి కొడొఃదిజ్ దేవుణు వందిజ్ కెట ఇడెదెజ్*.

24 మరి, మోసె రాస్సెజ్ ప్రబు వెహ్తి రూలుదు మని వజ, “జత గువండెజ్నో రుండి పార పొటి పిలెకుజ్నో పూజ నీదెజ్†”, ఇజి. అయావజ ఒత్తార్.

25 అయావలె, సుమెయోసు ఇనికాన్ ఒరెన్ యెరూసలేమ్దు మహాన్. వీండ్రు నీతి నిజయ్తి మనికాన్. దేవుణుదిజ్ తియెల్ ఆతికాన్. ఇస్రాయేలు లోకాజ్ రక్సిన్ని వన్ని వందిజ్ ఎద్రు సుడెఃజి మహాన్. దేవుణు ఆత్మ వన్ని వెట మహాన్.

26 ప్రబు ఏర్పాటు కితి పొక్తి క్రిస్తుజ్ తొవిండ, నీను సాఇలె’, ఇజి దేవుణు ఆత్మ వన్నిజ్ వెహ్తా మహాన్.

27 దేవుణు వన్నిజ్ నడిఃపిస్తివజ వీండ్రు దేవుణు గుడిఃదు సొహాన్. నస్తివలె, దేవుణు మోసెజ్ సితీ రూలుదు మని లెకెండ కిదెజ్ అయ్సి అపొసిర్ కొడొః ఆతి యేసుజ్ తత్తార్.

28 అయావలె సుమెయోసు కొడొఃదిజ్ కికాణిజ్ పెహ్తాండై దేవుణుదిజ్ పొగిడిఃజి ఈహు వెహ్తాన్.

29 “ప్రబువా, నీను వెహ్తి మాటెజ్ వజ నాను వన్నిజ్ సుడెఃత. అందెజె నీ వణి మణిసి ఆతి నజి ఏలు సమాదనం దాన్ కూక్సి ఒఅ.

30-31 ఎందానిజ్ ఇహిజు, లోకుర్ విజెరె సుడెఃదెజ్ నీను తయార్ కితి రక్సిన్నివన్నిజ్నా కణకాణిజ్ నాను సుడెఃత మన్న.

32 వాండ్రు ఇస్రాయేలు ఆఇ వరిజ్ దేవుణు సరిదు నడపిస్తిజ్ జాయ్లెకెండ ఆనాలె. నీ ఇస్రాయేలు లోకాజ్ గొప్ప గవరం వాండ్రు

* 2:23 2:23 నిర్గమ 13:2,12. † 2:24 2:24 లేవి 12:8.

కల్గిస్తానలె.

33 అయావలె వాండ్లు కొడొః వందిజ్ వెహ్తి మాటెజ్ వెహారె అయ్సి అపొసిర్ నండొ బమ్మ ఆతార్.

34-35 సుమెయోను వరిజ్ దీవిస్తాండ్రె, వన్ని అయ్సి ఆతి మరియెజ్, “ఇస్తాయేలు లోకుర్ నండొండార్ నాసనం ఆనివందిజ్, నండొండార్ బత్కిని వందిజ్ దేవుణు వినిజె ఏర్పాటు కితాన్. వీండ్లు దేవుణు ఏర్పాటు కితి ఉండ్రె గుర్తు. లోకుర్ అయాక నెక్కు పొక్కార్. ఆహె, వారు మన్నుదు విని వందిజ్ ఒడొబితికెజ్ వెల్లి ఆనె. అయాక నీను సూణివెలె కూడం గుత్తి సొహి లెకెండొ నీ మన్నుదు దుకం వానాద్లె”, ఇజి వెహ్తాన్.

36-37 నస్తవలె పనుయెలు గాడ్చి ఆతి అన్న ఇని ఉండ్రె ప్రవక్త మహాద్. అది ఆసిరు ఇని జాతిదు మనికాద్. అది పెండ్రె ఆజి ఏడు పంటెజ్ మాసి వెట బత్కితాద్. ఎనబయ్నాల్లి పంటెజ్ దాక ముండ మొప్ప మహాద్. అది నండొ డొక్క ఆతాద్. దేవుణు గుడిః దాన్ ఎసెజ్బా డిస్ఎండ, రెయు పొగాల్ ఉపాస్దాన్ పార్లనమ్దాన్ దేవుణుదిజ్ పొగిడిఃజి మాడిఃసి మహాద్.

38 ఆ గడిఃయదునె, అది దేవుణు గుడిఃదు యోసేపు, మరియ, యేసుబాన్ సొహాదె దేవుణుదిజ్ పొగిడిఃతాద్. యెరూసలేమ్ది లోకుర్ రోమ అతికారిజ అడిఃగి మహార్. వారు వరిజ్ డిఃబిస్సి ఒరెన్ వన్నిజ్ ఎద్దు సుడొఃజి మహార్. ఆహె ఎద్దు సుడొఃజి మహి వరివెట కొడొఃవందిజ్ వెహ్తాద్.

39 యోసేపుని మరియ మోసె రాస్తెజ్ ప్రబు వెహ్తి రూలుజ్దు కిదెజ్ వెహ్తి మనికెజ్ విజు కితార్. కితి వెనుక, మహ్తారె గలిలయదు మని నజరేతు ఇని వరి పట్నమ్దు సొహార్.

40 కొడొః సత్తు దాన్ పిరితాన్. వన్నిజ్ నండొ బుద్ది మనాద్. దేవుణు వన్నిజ్ దీవినె మహాన్.

యేసు పెద్దలిజవెట వర్గిజినాన్.

41 ఏంటు ఏంటు యేసు అయ్యేసి అపోసిర్ యెరూసలేమ్దు పన్ను‡ పండొయ్దిజ్ సొన్ని మహార్.

42 వారు ఏంటు సొన్ని మహి అలవాటువజ, యేసుజ్ పన్నెండు పంటజ్ మహివలె పండొయ్దిజ్ సొహార్.

43 పండొయ్ వీజితిజ్, వారు మర్జి వాజి మహార్. గాని కొడొః ఆతి యేసు యెరూసలేమ్దు నిహన్. వన్ని అయ్యేసి అప్పొసిర్ అయాక నెన్ఎతార్.

44 వీండ్రు మంద లోఇ మనాన్ ఇజి ఒడెఃబిజి, ఉండ్రి రోజు వారు నడిఃజి వాతార్. వెనుక వారు వరి కూలెజబాన్ నెల్వ ఆతి వరిబాన్ వన్నిజ్ రెబాజినార్.

45 వాండ్రు తోరెతిజ్, వన్నిజ్ రెబాజి యెరూసలేమ్దు మర్జి వాతార్.

46 మూండ్రి దినమ్కు వెనుక, వాండ్రు, దేవుణు గుడిఃదు బోద కినివరి నడిఃమి బస్తిక సుడెఃతార్. వాండ్రు వరి మాటెజ్ వెంజి, వరిజ్ మరి వెన్బాజి మహార్.

47 వన్ని మాటెజ్ వెహికార్ విజేరె, వాండ్రు మహి వెహి మాటెజి వందిజ్, వన్ని బుద్ధి వందిజ్ నండొ బమ్మ ఆతార్.

48 వన్ని అయ్యేసి అపోసిర్ వన్నిజ్ సుడెఃతిజ్ నండొ బమ్మ ఆతార్. వన్ని అయ్యేసి ఈహు వెహిద్ “నా మరిన్, నీను ఎందనిజ్ మజి ఈహు కితి? ఇదిలో నీ బుబ్బని నాను నండొ బాద ఆజి నిజి రెబాజి వాతాప్”, ఇజి వెహిద్.

49 దనిజ్ వాండ్రు, “మీరు నజి ఎందనిజ్ రెబాతిదెర్. నాను నా బుబ్బి పణిదు మండ్రెజ్వలె ఇజి మీరు నెన్ఇదెరా?”, ఇజి వెహిన్.

50 గాని వాండ్రు వరిజ్ వెహి మాటెజ్ వారు అర్లం కిఎతార్.

51 వెనుక వాండ్రు వరివెట సొతాండ్రె నజరేతు వాతాన్. అబ్బె వరిజ్ లోజిజి మహాన్. వన్ని అయ్యేసి యా జర్గిజిని విజు సజతిజ్ దని మన్నుదు ఇడ్డి మహాద్.

‡ 2:41 2:41 పులాజ్ సిల్లి రొట్టెతయార్ కిజి తిని పండొయనె పన్ను పండొయ

52 యేసు బుద్ధిడు, వయుసుదు పిరితాన్. దేవుణు, లోకుర్ మరి మరి వన్నిజ్ ప్రేమిసి మహార్. వన్ని ముస్కు సర్ద ఆజి మహార్.

3

1 పొంతి పిలాతు ఇనికాన్యూదయ రాస్త్రిం ఏలుబడిః కిజి మహాన్. హేరోదు గలిలయ రాస్త్రిమ్దిజ్ అతికారి. హేరోదుజ్ తంబెర్సిఆతి పిలుప్పు ఇతూరియని త్రకోనీతి రాస్త్రిమ్కాజ్ అతికారి. అబిలేనే రాస్త్రిమ్కాజ్ లుసానియ అతికారి. అయావలె తిబెరియ కయసరు ఇనికానె విరిజ్ విజేరె ముస్కు రాజు. వాండ్రు పదిహేను పంటెజాణిజ్ విరిజ్ ఏలుబడిః కిజినె వాజినాన్.

2 అయావలె, అన్నని కయప పుజెరిజ ముస్కు పెరి పుజెరి. అయావలె బీడిమ్ బూమిదు, జెకరియ మరిసి ఆతి యోహాను వెట దేవుణు వర్గితాన్.

3 అందెజె వాండ్రు, “మీరు పాపమ్కు డిఃసి బాప్తినం లాగె ఆదు. దేవుణు మీ పాపమ్కు సెమిస్సాన్”, ఇజి యెర్దాను గడ్డ పడఃకాదు మన్ని ప్రాంతం విజు సొన్నిబోదిసి మహాన్.

4 యెసయ ప్రవక్త రాస్తివెలె విన్నివందిజ్ ఈహు వెప్పినాన్. “బీడిమ్ బూమిదు ఒరెన్ ఈహు డేల్పి వెప్పినాన్. “ప్రబుజ్ లోకుడగు వాదెజ్ సరినెగెణ్ కిఅ. వన్నిజ్ నడిదెజ్ సరితినాజ్ కిదు.

5 విజు గాతెజ్ నిండ్రీన్అ. విజు గొరొక్ని మెటెజ్ బయలు కిఅ. వెకొ సరిజ్ తినానికెజ్ కిఅ. కరుకు సరిజ్ నున్నజ్తికెజ్ కిఅ.

6 అయావలె విజేరె, దేవుణు పరిజ్రక్కిన్ని దన్నివందిజ్ నూణార్లె*”, ఇజి. ఆహె రాస్తిమహి లెకెండ్ యోహాను బోదిస్తాన్.

7 యోహాను వన్నిడగు బాప్తినం లాగెఅదెజ్ వాజిని మంద లోకురిజ్ ఈహు వెప్తాన్ “మీరు విసం మన్నిసరాన్ లెకెండ్ మన్నికిదెర్, దేవుణుబాణిజ్ కోపం వాజినాద్ ఇజి నమ్మిజి మీరు వాతిదెరా? సిల్లెద్. వన్ని కొపమ్దాన్ తప్రెఅదెజ్ ఇజి మీరువాతిదెరా? నిజమే అయలెకెండ్ ఇజి నాను ఒడిఃబిదెజ్ సిల్లెద్.

* 3:6 3:6 యెసయ 40:3-5.

8 మీ పాపముకు ఒప్పుకొణ్ణి డిసి సీజి దన్నిజ్ తగితి పణిజ్ కిజి తోరిస్తు. “మాపు అబ్రాహము తెగ్గాతికాప్”, ఇజి మీరు మీ మన్నుదు వర్గిమాట్. ఎందానిజ్ ఇహిజ, యా పణుకుజాణిజ్ అబహముజ్ కొణ్ణిరిజ్ తయార్ కిదెజ్ దేవుణు అట్నాన్”, ఇజి నాను మిజి వెహ్సిన.

9 దేవుణు మరెక మొదొల్కత్తి విసిర్దెజ్ కియుదు గొడెలి అస్తి వన్నిజ్ పొలిత మనాన్. నెగ్గి పట్టు అన్ ఇ మరెకాజ్ విజు కత్తి సినుద్ విసిర్నాన్”, ఇజి వెహ్సన్.

10 అయావలె లోకుర్ విజెరె, “అహిజ మాపు ఇనిక కిదెజ్?”, ఇజి వెన్బాతార్.

11 యోహాను వెహ్సన్, “రుండి సొకెజ్ మన్నికాన్ ఉండ్రీ సిలివన్నిజ్ సీదెజ్. అయలెకెండ్ టిండి మన్నికాన్ సిల్లివన్నిజ్ సీదెజ్”, ఇజి.

12 పన్ను పెర్నికార్బా బాప్తిసం లాగి ఆదెజ్ వాతార్. వారు, “ఓ బోదకినికి, మాపు ఇనిక కిదెజ్?”, ఇజి వెన్బాతార్.

13 దనిజ్ వాండ్రు, “మిజి ఎసొ లొస్తాజ్ ఆడ్ర సిత మనాదొ, నసొ లొస్తు. నండొ లొస్తాట్”, ఇజి వెహ్సన్.

14 నస్తివలె నెగొండార్ ఉద్దం కినికార్, “మాపు ఇనిక కిదెజ్?”, ఇజి వెన్బాతార్. అందెజె వాండ్రు, “బెద్రిసి ఎయెబాన్ డబ్బు డిబిస్తాట్. అనయం వెహ్సి డబ్బు లొస్తాట్. మీ జితం దానె సర్దు ఆదు”, ఇజి వెహ్సన్.

15 వీండ్రు క్రీస్తుసు ఇజి యోహాను వందిజ్ లోకుర్ విజెరె వరి మన్నుదు ఒడెబితార్. వారు ఆస దాన్ క్రీస్తుజ్ ఎద్దు సుడెజి మహార్.

16 అయావలె యోహాను వరిజ్ విజెరిజ్ వెహ్సన్, “నాను మిజి ఏరుదాన్ బాప్తిసం సీజిన. నజీ మిస్తి నండొ పెరికాన్ మరి ఒరెన్ వాజినాన్. వన్ని జోడ్కు బేల్టు కుతెజ్ నాను ఏపటికాన్ ఆఎ. వాండ్రు మిజి దేవుణు ఆత్మదాన్ సినుదాన్ బాప్తిసం సీనాలె.

17 వాండ్రు గాలి ఇడెని సేహి కీదు అస్త మనాద్. వాండ్రు వన్నికలమ్దిజ్ సుబ్బరం కిజి, గింజెజ్ కొటు కిజి గాలి ఇడెజినాన్. గింజెజ్ గాదిద్ ఇడ్నాన్. పొటుదిజ్ నమ్మి ఇ సినుదు సుర్నాన్.

18 యా మాటెజ్ అవిండ, మరి నండొ సజతిజ్ వెహ్ని లోకురిజ్ పణిసి వెహ్తాన్. సువార్త బోదిసి వెహ్తాన్.

19 వాండ్రు హేరోదు ఇని అతికారిజ్ వెహ్తాన్, వన్ని కొడెసిసి హేరోదియవెట హేరోదు పాపం కిత్తాన్ ఇజి. మరి, హేరోదు కిత్తి విజు తప్పుజబా వెహ్తాన్.

20 అందెజె వాండ్రు యోహానుజ్ జెలిదు ఇట్టాన్. ఆహె హేరోదు కిత్తి విజు తప్పుజవెట యోహానుజ్ జెలిదు ఇడిస్తి తవుబా కూడితాద్.

యేసు బాప్తీసం లాగెఆజినాన్

21 యోహానుజ్ జెలిదు ఇడ్చి ముజాల, ఉండ్రొ రోజు లోకుర్ విజెరె బాప్తీసం లాగె ఆతార్. అయావలె యేసు బా బాప్తీసం లాగె ఆతాన్.

22 వాండ్రు పార్లనం కిజి మహివలె, ఆగాసం రెయ్ ఆతాదె దేవుణు అత్తు ఉండ్రొ పార పొటిజ్ మూర్తి లెకెండ్ డిఃగ్జి వన్ని ముస్కు వాతాద్. అయావలె, “నీనె నాను ప్రేమిస్సి నా మరిన్. నీ వందిజ్ నాను నండొ సరద ఆజిన”, ఇజి పరలోమ్దాన్ ఉండ్రొ జాటు వాతాద్.

23 యేసు వన్ని సేవపణి మొదొల్నివెలె వన్నిజ్ డగ్రుదిజ్ ముప్పుయ్ పంటెజ్ వయ్సు మహాన్. వీండ్రు యోసేపు మరీన్నె ఇజి ఒడిఃబిజి మహార్. యోసేపు హెలి మరిసి

24 హెలి మత్తతు మరిసి మత్తతు లేవి మరిసి లేవి మెల్కి మరిసి మెల్కి యన్న మరిసి యన్న యోసేపు మరిసి

25 యోసేపు మత్తతియ మరిసి మత్తతియ ఆమోసు మరిసి ఆమోసు నాహోము మరిసి నాహోము ఎస్లికి మరిసి ఎస్లికి నగ్గయ మరిసి

26 నగ్గయ మయతు మరిసి మయతు మత్తతియ మరిసి మత్తతియ సిమియ మరిసి సిమియ యేసెక మరిసి యేసెక యోదా మరిసి

27 యోదా యోహాన మరిసి యోహాన రేపా మరిసి రేపా జెరుబాబెలు మరిసి జెరుబాబెలు సయిల్తీయెలు మరిసి సయిల్తీయెలు నేరి మరిసి

28 నేరి మెల్కి మరిసి మెల్కి అది మరిసి అది కోసాము మరిసి కోసాము ఎల్కాదాము మరిసి ఎల్కాదాము ఏరు మరిసి

29 ఏరు యొహానవ మరిసి యొహానవ ఎలియెజెరు మరిసి ఎలియెజెరు యోరియ మరిసి యోరియ మత్తతు మరిసి మత్తతు లేవి మరిసి

30 లేవి సిమొను మరిసి సిమొను యూద మరిసి యూద యోసేపు మరిసి యోసేపు యోనాము మరిసి యోనాము ఎల్యాకిము మరిసి

31 ఎల్యాకిము మెలెయా మరిసి మెలెయా మేన్నా మరిసి మేన్నా మత్తత మరిసి మత్తత నాతాను మరిసి నాతాను దావీదు మరిసి

32 దావీదు, యెసయ మరిసి. యెసయ ఓబెదు మరిసి ఓబెదు బోయసు మరిసి బోయసు సల్కను మరిసి సల్కను నయస్సోసు మరిసి

33 నయస్సోసు అమ్మినాదబు మరిసి అమ్మినదాబు అరాము మరిసి అరాము ఎస్రోము మరిసి ఎస్రోము పెరెసు మరిసి పెరెసు యూదా మరిసి

34 యూదా యాకోబు మరిసి యాకోబు ఇసాకు మరిసి ఇసాకు అబ్రాహము మరిసి అబ్రాహము తేరహు మరిసి తేరహు నాహోరు మరిసి

35 నాహోరు సేరుగు మరిసి సేరుగు రయూకు మరిసి రయూకు పెలెగు మరిసి పెలెగు హెబెరు మరిసి హెబెరు సేలహు మరిసి

36 సేలహు కెయినాను మరిసి కెయినాను అర్పక్సదు మరిసి అర్పక్సదు సేము మరిసి సేము నోవహు మరిసి నోవవు లెమెకు మరిసి

37 లెమెకు మెతుసెలె మరిసి మెతుసెలె హనోకు మరిసి హనోకు యెరుదు మరిసి యెరుదు మహలెలు మరిసి మహలెలు కెయినాను మరిసి

38 కెయినాను ఎస్రోసు మరిసి ఎస్రోసు సేతు మరిసి సేతు ఆదాము మరిసి ఆదాము దేవుణు మరిసి.

4

యేసుజ్ పరిస కిజినాన్

1 యేసు దేవుణు ఆత్మదాన్ పూర్తి నిండ్రితాండ్రె, యోర్దాన్ గడ్డదాన్ మర్జి వాతాన్.

2 నలపయ్ రోస్కు దేవుణు ఆత్మ వన్నిజ్ బీడిఃమ్ బూమిదు నడిఃపిస్తాన్. అబె, సయ్తాను వన్నిజ్ పరీస కిదెజ్ సుడఃతాన్.

వాండ్రు అయా రోస్కాజ్ ఇనికబా ఉణెఎండ మహాన్, కడఃవెరిదు వన్నిజ్ బజ కట్టాద్.

3 అయావలె సయ్యాన్, “నీను దేవుణు మరిసి ఇహిజ, యా పణుకు టిండి ఆని లెకెండ వెహాఅ”, ఇజి వెహాన్.

4 అందెజె యేసు, “లోకు బత్తిజనిక టిండిదానె ఆవద్*”, ఇజి దేవుణు మాటదు రాస్త మనాద్”, ఇహాన్.

5-6 అయావలె సయ్తాన్ వన్నిజ్ ఎత్తు మని బాన్ ఒతండ్రె, లోకమ్దు మని విజు దేసెమ్కు జామె తోరిస్తాన్. “యా లోకమ్ది అతికారం సంసారం, విజు నాను నిజి సీన. ఎందనిజ్ ఇహిజ అయాకెజ్ విజు నజెనె దేవుణు ఒపజెప్ప మనాన్. నజి ఇస్తం ఆతి ఎయెరిజ్బా సీదెజ్ నజి అక్కు మనాద్.

7 అందెజె నీను నజి పొగ్డిజి మాడిఃస్తిజ, యాకెజ్ విజు నీవి ఆనె”, ఇహాన్.

8 నస్తవలె యేసు, “నీను నీ దేవుణు ఆతి ప్రబుజ్నె పొగిడిజి మాడిఃనీ, వన్నిజె సీవకిదెజ్† ఇజి దేవుణు మాటదు రాస్త మనాద్”, ఇజి మర్జి వెహాన్.

9 వెన్కా వన్నిజ్ యెరూసలెమ్దు కూక్త ఒత్తాండ్రె, దేవుణుగుడిః కోసాదు నిల్ప్తాండ్రె, “నీను దేవుణు మరిసి ఇహిజ ఇబ్బెణిజ్ అడిఃగి డాల్అ.

10-11 ఎందనిజ్ ఇహిజ, “‘నిజి నెగ్రెండ కాపాడఃదెజ్ నీ వందిజ్ వన్ని దూతారిజ్ దేవుణు ఆడ్ర సీనాన్. నీ పాదం పణుకుదు తగ్గిఎండ వారు నిజి పరి కికాణిజ్ పెర్న అస్సార్‡’, ఇజి దేవుణు మాటదు రాస్త మనాద్”, ఇజి వన్నిజ్ వెహాన్

12 అందెజె యేసు, “‘నీ దేవుణుఆతి ప్రబుజ్, పరిస కిదెజ్ ఆవద్§’, ఇజి దేవుణు మాటదు రాస్త మనాద్”, ఇజి మర్జి వెహాన్.

13 సయ్తాన్ విజు పరిసెజ్ వీస్తాండ్రె సెగం కాలం వన్నిజ్ డిఃస్తసాహ మహాన్.

* 4:4 4:4 ద్వితి 8:3. † 4:8 4:8 ద్వితి 6:13. ‡ 4:10-11 4:10-11 కీర్తన 91:11-12. § 4:12 4:12 ద్వితి 6:16.

యేసు గలీలయదు వన్ని సేవపణి మొదొల్సినాన్

14 యేసు దేవుణు ఆత్మ సత్తుదాన్ గలీలయ ప్రాంతమ్దు మర్జి సొహాన్. అయా ప్రాంతం విజు వన్ని వందిజ్ మాటెజ్ సెద్రితె.

15 వాండ్రు యూదురి మీటిజ్ ఇల్కాజ్ నేర్పిస్తాన్. విజెరె వన్నిజ్ పొగిడితార్.

యేసుజ్ నజరేతుదాన్ పేర్జినార్

16 వెనుక, వాండ్రు పిరీతి వన్ని పట్టుమ్దు సొహాన్. అయాక నజరెతు. వన్ని అలవాటు వజ విస్త్రాంతి దినమ్దు యూదురి మీటిజ్ ఇండ్రొ సొహండ్రె దేవుణు మాట సద్విదెజ్ ఇజ నిహాన్.

17 మీటిజ్ ఇండ్రొణి పణిమణిసి వన్నిజ్ యెసయ ప్రవక్త రాస్తి పుస్తకం సితాన్. వాండ్రు అయాక రెక్తిజ్ ఈహు రాస్తి మనికెజ్ వన్నిజ్ దొహ్కాద్.

18-19 “ప్రబు పొక్తి దేవుణు ఆత్మ నావెట మనాన్. అందెజె వాండ్రు బీద ఆతి వరిజ్ సువార్త వెహ్తాజ్ నజి ఏర్పాటు కితాన్. తోహా ఆతి వరిజ్, “మిజి విడుఁదల వాతాద్”, ఇజి వెహ్తాజ్, గుడ్డి వరిజ్, “మీ కణుకుజ్ తోర్నె”, ఇజి వెహ్తాజ్, నల్లితి వరిజ్ డిఃస్పిస్తిజ్, దేవుణు వన్ని లోకురిజ్ రక్సిన్నికాలం వాతాద్ ఇజి వెహ్తాజ్ వాండ్రు నజి పొక్త మనాన్*”, ఇజి రాస్తి మనికెజ్ వన్నిజ్ దొహ్కాద్.

20 యాకెజ్ సద్విజి, పుస్తకం మూక్తాండ్రె పణిమణిసిజ్ మహ్తా సితండ్రె బస్తాన్. మీటిజ్ ఇండ్రొ మహికార్ విజెరె వన్నిజ్ డిట బేస్తార్.

21 వాండ్రు వరిజ్, “ఏలు నాను సద్వితి దేవుణు మాటెజ్ మీరు వెహివెలెనె అయాక పూర్తి ఆతె”, ఇజి వెహ్తాన్.

22 వారు విజెరె వన్ని వందిజ్ నెగ్గికెజ్ వెహ్తార్. వన్ని వెయ్దాన్ వాతి నెగ్గి మాటెజ బమ్మ ఆజి, “వీండ్రు యోసేపు మరిసి గదె?”, ఇజి వెహ్తార్.

23 యేసు వరిజ్ వెహ్తాన్, “ఓ గురు, నిజి నీనె నెగెణ్ కిబ్బె ఆఅ’, ఇని బుద్ది మాట మీరు తవ్ఎండ నజి వెహ్పాదెర్. మరి, మీరు నజి,

* 4:18-19 4:18-19 యెసయ 61:1-2.

‘నీను కపర్నహొము ఇని పట్నమ్దు కిత్తి పణిజ్ మాపు వెహాప్. అయా పణిజ్ ఇబ్బె నీ సొంత పట్నమ్దుబా కిత’, ఇజి వెహ్సాదెర్.

24 ఎమేణి ప్రవక్తెజ్ బా సొంత పట్నమ్దు లోకుర్ గవరం సిఎర్, ఇజి నిజం నాను మీ వెట వెహ్సాన.

25 వెండ్రు, ఏలియ దినమ్కాజ్, ఇస్రాయేలు దేసమ్దు మూండ్రీ పంటెజ్ ఆరు నెలెజ్ దాక పిరు రఎండ మహాద్. గొప్ప కరు వాతివలె, అబె నండో రాండి బోదెక్ మహె ఇనిక నిజమ్నె.

26 గాని, దేవుణు ఏలియెజ్ వరి ఎయెర్బాన్బా పోక్ఎతాన్. సిదోను ప్రాంతమ్ది సారెపాతు ఇని నాటోణి రాండి బోదెలిబానె పోక్తాన్.

27 అయాలెకెండ, ఏలీసా ప్రవక్త కాలమ్దు, ఇస్రాయేలు దేసమ్దు నండొండార్ పెరికన్టం దాన్ మహార్. గాని వారు ఎయెర్బా నెగెణ్ ఆవతార్. సిరియ దేసమ్దు మని నయమాన్ ఒరెండ్రె నెగెణ్ ఆతాన్”, ఇజి నాను మిజి వెహ్సాన. ఇజి యేసు వెహ్సాన్.

28 యా మాటెజ్ వెహివలె, యూదురి మీటిజ్ ఇండ్రో మహికార్ విజెరె వెరి కోపం ఆతార్

29 వారు నిహరె, పట్నమ్దాన్ వన్నిజ్ పేర్తార్. వారు వన్నిజ్ మెటుదు ఒతార్. వరి పట్నం అయా మెటుద్నె తయార్ కిత మనాద్. గడియ బుర్ర కిజి వన్నిజ్ అర్పైజ్ ఇజి ఒతార్.

30 గాని మంది నడిమిజానె, వన్నిసరి వాండ్రు సొహాన్.

యేసు దెయమ్దిజ్ పేర్జినాన్

31 వెన్కా వాండ్రు గలిలియతి కపెర్నహుము ఇని పట్నమ్దు వాతాన్. విస్తాంతి దినమ్దు యూదురి మీటిజ్ ఇండ్రో బస్తాండ్రె లోకురిజ్ నేర్పిసి మహాన్.

32 వాండ్రు నెన్పిన్సి మాటెజ్ వెహరె, లోకుర్ నండో బమ్మ ఆతార్. ఎండనిజ్ ఇహిజ, నండో అతికారం దాన్ వాండ్రు వెహ్సాన్.

33-34 యూదురి మీటిజ్ ఇండ్రో, ఒరెన్ దెయం అస్తికాన్ మహాన్. వాండ్రు, “నజరెతు వాండ్రు ఆతి యేసువా, మా వెట నిజి ఇని పణి?

మజీ నాననం కిదెజ్ వాతిదా? నీను ఎయిదొ ఇజి నాను నెన్ను. నీను దేవుణు బాణిజ్ వాతి నెగ్గి వాండ్లు”, ఇజి డటం గగోల్ ఆజి వెహ్లాన్.

35 అందెజె యేసు, “అలెజి మన్అ. వినిజ్ డిసి వెల్లి రఅ”, ఇజి డటం అయా దెయమ్దిజ్ వెహ్లాన్. నస్తివలె అయా దెయం, అది అస్తి వన్నిజ్, వరి విజెరె నడిఃమి అర్హాదె వన్నిజ్ ఇని నస్టం కిఎండ డిఃస్ట సాహాద్.

36 అయావలె లోకుర్ విజెరె నండొ బమ్మ ఆతార్. “అబ్బు, యాక ఎసాహి మాట. వీండ్లు దేవుణు సత్తుదాన్, అతికారమ్దాన్ సాన్అ ఇజి దెయమ్కాజ్ వెహ్నినాన్. అవి డిసి సాన్సినె”, ఇజి ఒరెన్దిజ్ ఒరెన్ వర్గితార్.

37 వన్ని వందిజ్ మాటెజ్ అయా ప్రాంతమ్దు విజు సెద్రితె.

యేసు నండొండారిజ్ నెగెండ్ కిజినాన్

38 యేసు యూదురి మీటిజ్ ఇండ్రొణాజ్ నిజితండ్రె, సిమొను వన్ని ఇండ్రొ సాహాన్. అయావలె వన్ని మీమ్సి నండొ నోబు దాన్ మహాద్. దనిజ్ నెగెణ్ కిఅ ఇజి వారు బతిమాల్తార్.

39 అందెజె వాండ్లు దని డగ్గు సాహాండ్రె, “నోబు సాన్అ”, ఇజి డటం వెహ్లాన్. డటం వెహ్లాజ్ నోబు దనిజ్ డిఃస్ట సాహాద్. వెటనె అది నిజితాదె, వరిజ్ మర్యాద కితాద్.

40 పొదు అర్పి మహాద్. అయావలె లోకుర్ నండొ రకమ్కాణిజ్ బాద ఆజి మహి వరిజ్ విజెరిజ్ వన్ని డగ్గు తతార్. కస్టమ్దాన్ మహి వరి విజెరె ముస్సు కికు ఇడ్డి వరిజ్ నెగెణ్ కితాన్.

41 యాకదె ఆవిండ, నండొ దెయమ్కు, నీనె దేవుణు మరిసి, ఇజి గగోల్ ఆజి నండొండారిజ్ డిఃస్ట సాహె. వాండ్లు అలెజి మండ్రు ఇజి వన్యాజ్ డటం వెహ్లాన్. వాండ్లు క్రిస్తు ఇజి దెయమ్కు నెస్త మహె. అందెజె వాండ్లు వన్యాజ్ వర్గివిండ కితాన్.

42 పెందాల్నె వాండ్లు సోతాండ్రె బీడిఃమ్ బూమిదు సాహాన్. లోకుర్ వన్నిజ్ రెబాజి వాతార్. వన్నిజ్ సుడఃతిజ్ వాండ్లు వరిజ్ డిసి సాన్ఎండ, వన్నిజ్ ఆప్ కిదెజ్ సుడఃతార్.

43 గాని వాండ్లు, “నాను మహి పట్నమ్కాజ్ బా దేవుణు ఏలుబడిః కిని కాలం వందిజ్ సువార్త వెప్తాజ్వలె. దిని వందిజ్ దేవుణు నజీ పోక్తాన్”, ఇజి వరిజ్ వెప్తాన్.

44 వెన్కా వాండ్లు యూదయ దేసమ్దు మని యూదురి మీటిజ్ ఇల్కాజ్ బోదిసి మహాన్.

5

యేసు సిసూరిజ్ కూక్చినాన్

1 ఉండ్రీ రోజు, యేసు గనెసరెతు సెరుడగ్గు నిహమహాన్. నండో లోకుర్ దేవుణు మాటెజ్ వెండ్రెజ్ నెకెఆజి వన్ని ముస్కు అర్చి మహార్.

2 నస్త్రీవలె జాలెరిబు సెరు దరీద్ డిఃస్తి మహి రుండి డోణిజ్ వాండ్లు సుడఃతాన్. అయా జాలెరిబు వరి వల్లెజ్ నొర్జి మహార్.

3 వాండ్లు దని లోఇ ఉండ్రీ డోణిద్ ఎక్తాన్. ఆక సిమొనుతి. ఎక్తాండ్రె దరిదాన్ కండెక్ నెక్తు ఇజి వన్నిజ్ వెప్తాన్. వాండ్లు డోణిద్ బస్తాండ్రె నండో లోకాజ్ నెస్పిసి మహాన్.

4 వాండ్లు వెప్పి వీజితివలె, సిమోనుజ్, “ఏరు నిరీ మని బాన్ డోణి నడిఃపిన్అ. మొయెజ్ అస్తాజ్ మీ వల్లెజ్ విసీర్తు”, ఇహాన్.

5 అందెజె సిమొను, “ఓ బోదకినికి, రెయు విజు మాపు అరల ఆతాప్. గాని మజీ ఇనికబా దొహ్కాతె. అహిజ్బా నీను వెప్పిని మాట వజ వల్లెజ్ పొక్తా”, ఇజి వన్నిజ్ వెప్తాన్.

6 వారు అయాలెకెండే కిత్తార్. నండో మొయెజ్ అస్తార్. వరివల్లెజ్ కింజిని వజ ఆతె.

7 అయావలె వారు వేరె డోణిద్ మని, వరి జత్త కూడఃజి పణికిని వరిజ్, “వాజి మజీ తోడుః కిదు”, ఇజి కియు సయన కిత్తార్. వారు వాతారె, రుండి డోణిజ్ మొయెజ్ నిహ్తార్. డోణిజ్ ముడుగ్గులెకెండే ఆతె.

8 సీమోను ఇని పేతురు యాక సుడఃతాండ్రె, యేసు కాల్యు ఎద్రు ముణుకుజ్ ఊరితండ్రె, “ప్రబువా, నజీ డిఃసి సొన్అ, నాను పాపం కితికాన్”, ఇజి వెప్తాన్.

9 ఎందానిజ్ ఇహిజు, వాండ్రుని వన్నివెట మనికార్ విజెరె వారు అస్తి యా మొయెజ్ కొట్టు సుడెతారె నండొ బమ్మ ఆతార్.

10 అయలెకెండెనె, సీమోనువెట కూడెజి పణి కిని యాకోబు ని యోహానుబా బమ్మ ఆతార్. వారు జెబదయి మరిసిర్. అందెజె యేసు, “తియెల్ఆమా. నిసా కాలం నీను మొయెజ్ అస్తి పణికితి. ఏలు లోకాజ్ నా సిసూర్కిదెజ్ నెన్పిస్తాలె”, ఇజి సిమోనుజ్ వెప్తాన్.

11 వారు వరి డోణిజ్ సెరు ఒడ్డుదు తత్తారె, విజు డిస్తార్. వన్నివెట సాహార్.

కుస్తురోగం ఆతివన్నిజ్ నెగెండ్ కిజినాన్

12 యేసు ఉండ్రె పట్టుమ్దు మహివలె కస్తురోగం* ఇనిపెరి జబ్బు లావుఆతి ఒరెన్ అబ్బె మహాన్. వాండ్రు యేసుజ్ సుడెతివెలె ముణుకుజ్ ఊర్జి మాడిస్తాండ్రె, “ప్రబువా, నాను నెగెండ్ ఆదెజ్ ఇజి నిజి మన్ను మహిజు నజి నెగెణ్ కిదెజ్ అట్టి”, ఇజి బతిమాలతాన్.

13 అందెజె యేసు వన్నికియు సాప్పి వన్నిజ్ ముట్టి, “నజి మన్ను మనాద్, నీను నెగెణ్ ఆఅ”, ఇజి వెప్తాన్. వెటనె వన్నిజ్ మహి అయా కస్తురోగం వన్నిజ్ డిస్తాద్.

14 యేసు వన్నిజ్, “ఎయె వెటబా ఇనికబా వెప్పా. గాని నీను తినాజ్ సాన్ని నీ ఒడెంట్ పుజెరిజ్ తోరిన్అ. నీను నెగెణ్ ఆతి వందిజ్ మోసె ముజాలె ఆడ్రసితి వజ దేవుణుదిజ్ సంత సిఅ. ఆహా నీను నెగెణ్ ఆతి ఇజి లోకురిజ్తోరిన్అ”, ఇజి కసితం వెప్తా పోక్తాన్.

15 గాని వన్ని వందిజ్ మాటెజ్ మరి ఒదె, నాహ్కాజ్ విజు సెద్రితె. అందెజె నండొ లోకుర్ వన్నిమాటెజ్ వెండ్రెజ్, వరి కస్తుమ్కాణిజ్ నెగెణ్ ఆదెజ్ ఇజి వన్నిడగు కూడెజి వాజి మహార్.

* **5:12 5:12** కిక్కాజ్ పాదమ్కాజ్ డెస్సెజ్ తెవ్జి సాని పెరిజబ్బునె ముజాలె కుస్తురోగం జబ్బు వాతిబాన్ ముట్టిజు వారు నెన్వర్ ముజాలె కుస్తురోగం మన్నికార్ నాటో మండ్రెజ్ అక్కుసిల్లెద్ వారు పట్టు వెల్లి మండ్రెజ్ వారు సుబ్బరం ఆఇకార్ మటిలె ఆతికార్ఇజినె ఒడిబినార్ అందెజె, వారుపుజెరిజు డగు సాన్నినెగెండ్ ఆతార్ ఇజి పుజెరిజు వెప్తిజానె నాటో వాదెజ్ ఆనాద్. అయవలె వారు సుబ్బరం ఆతమనార్ ఇజినె నమకం

16 గాని వాండ్లు, నడిమి నడిమి పార్దనం కిదెజ్ ఇజి ఎయెర్ సిల్లి బాడిడు సొన్ని మనాన్.

కిక్కు కాల్కు అర్తివన్నిజ్ నెగెండ్ కిజినాన్.

17 ఉండ్రి నాండిజ్, యేసు ఉండ్రి ఇండ్రోబసి బోదిసి మహాన్. గలీలయ, యూద దేసమ్దు మన్ని విజు నాహ్కణిజ్, యెరూసలెమ్దాన్ వాతి పరిసయరుని యూదురి రూలు నెస్సిస్సికార్ అబ్బె బసి వెంజి మహార్. కస్టమ్దు మన్నివరిజ్ నెగెణ్ కిదెజ్ దేవుణుసిత్తి సత్తు వన్నివెట మనాద్.

18 నస్తీవలె, కిక్కు కాల్కు అర్తి పక్కువాయు ఇని జబ్బుది వన్నిజ్, సెగొండార్ ఉండ్రి సాపాద్ పిండిత తత్తార్. లోఇబసి యేసు ఎద్దు ఇడ్డెజ్ నండ్ అరిల ఆజి మహార్.

19 అబ్బె మందలోకుర్ మహిజ్, వన్నిజ్ యేసు డగ్గు ఒతెజ్ అట్ఎతార్. అందెజె వారు వన్నిజ్ ఇల్లు ముస్కు ఒతార్. ఒతారె, రేకం బొరొ కితారె సాపదాన్ మంద నడిమి యేసు ఎద్దు డిష్టార్.

20 యేసు వన్నిముస్కు మన్ని వరి నమకం సుడతాండ్రె, “కూలాయెన్, నీ పాపమ్కు నాను సెమిస్త మన్న”, ఇజి వన్నిజ్ వెహ్హాన్.

21 అయావలె పరిసయరు ని యూదురి రూలుజ్ నెస్సిస్సికార్ వరి లోఇ ఈహు వర్గితార్. “వీండ్రు ఎయెన్? నాను నీ పాపమ్కు సెమిస్త మన్న ఇజి వెహ్హి దేవుణు వెట సమానం ఆజి దేవుణుదిజ్ దూసిస్పాన్. దేవుణు ఒరెండ్రె పాపమ్కు సెమిస్సికాన్ గదె”, ఇజి.

22 వారు ఒడతాంబితిక యేసుజ్ తెలితాద్. వాండ్రు వరిజ్, “ఎందనిజ్ మీరు అహు మీ మన్నుదు ఒడతాంబిజినిదెర్?

23 యా జబ్బుది వన్నిజ్ నీ పాపమ్కు నాను సెమిస్త మన్న ఇజి వెహ్హిక్కు సులునా? నీను నిజ్జి నడియ ఇజి వెహ్హిక్కు సులునా?

24 లోకు మరిసి ఆతి నజి లోకు పాపమ్కు సెమిస్తాజ్ బూమి ముస్కు అతికారం మనాద్ ఇజి మీరు నెస్తాజ్వలె ఇజి వెహ్హాండ్రె, అయా కికు

కాల్కు అర్తి పక్వవాయు వన్నిజ్, “నాను నిజి వెహ్సిన, నిజ్జి సాప అసి ఇండ్రో సోన్అ”, ఇజి వెహ్సన్.

25 వెటనె వాండ్రు విజెరె ముజాలె నిజితండ్రె, వాండ్రు గూర్తి మని సాప నిక్తాండ్రె దేవుణుదిజ్ పొగ్డిఃజి ఇండ్రో సోహాన్.

26 వారు విజెరె నండో బమ్మ ఆతారె, దేవుణుదిజ్ పొగ్డిఃతారె. వారు దేవుణుదిజ్ నండో తియెల్ ఆజి, “అబ్బ! మాటు నేండ్రు నండో బమ్మఅతి పణిజ్ నుడఃతాట్”, ఇజి వెహ్సర్.

లేవి ఇన్ని ఒరెన్వన్నిజ్ కూక్సినాన్

27 యాక కిత్తి వెన్కూ, యేసు సోతాండ్రె, లేవి ఇని ఒరెన్ పన్ను పెర్నివన్నిజ్ నుడఃతాన్. వాండ్రు పన్ను పెర్ని వరి ఆపిసుదు బస్త మహాన్. యేసు వన్నిజ్, “నీను నా సిసూడు ఆఅ. నా వెట రఅ”, ఇజి వెహ్సన్.

28 లేవి విజు డిస్తాండ్రె, నిజ్జి వన్ని వెట సోహాన్.

29 వెనుక లేవి యేసు వందిజ్ వన్ని ఇండ్రో ఉండ్రీ పెరి విందు కితాన్. పన్ను పెర్నికార్ని మరి నండోడార్ వరి వెట ఉండెజ్బస్తార్.

30 అయావలె పరిసయ్రుని వరి జటుద్ మని యూదురి రూలుజ్ నెస్పిస్సికార్ యేసు సిసూరిజ్, “ఎందనిజ్ మీరు పన్నుపెర్నివరివెట, మరి నెఇ వరివెట ఉణిజి తింజినిదెర్”, ఇజి మొరొ ఆతార్.

31 అందెజె యేసు వరిజ్, “నెగెండ సిల్లి వరిజె డాక్టరు కావాలి. నెగెండ మన్నివరిజ్ ఎందనిజ్లు మరి డాక్టరు.

32 నాను పాపం కిజిని వరిజ్ కూక్సీ, వరి పాపమ్కు వారు ఒప్పుకోడిఃజి డిన్పిసిని వందిజ్ వాత మన్ను. మాపు నీతినిజాయితి మనికాప్ ఇజి ఒడఃబిని వరిజ్ కూక్సెజ్ రవ”, ఇజి వెహ్సన్.

ఉపాస్వందిజ్ యేసుజ్ వెన్బాజినార్

33 అయావలె, పరిసయ్రుని వరి జటుద్మని యూదురి రూలు నెస్పిస్సికార్ వన్నిజ్, “యోహాను సిసూర్ డిఃసిడిఃస్ఎండ ఉపాస్ కిజి పార్లనం కిజినార్. అయలెకెండనె పరిసయ్యురు సిసూర్బా. గాని నీ సిసూర్ ఉణిజి తింజి మంజినార్”, ఇజి వెహ్సర్.

34 అందెజె యేసు, “పెండ్లి దజడః పెండ్లి కూలెజవెట మన్నివెలె వారు ఉపాస్ కిజినారా?

35 పెండ్లి దజడఃజ్ వరి నడిఃమిహన్ బని రోస్కు వానెలె. అయావలె వారు ఉపాస్ అయా రోస్కాజ్ మంజినార్”, ఇజి వెహ్హాన్.

36 వాండ్రు వరిజ్ కతవజ ఉండ్రి నెన్పిస్తాన్. “ఎయెన్బా కొత్త సొక్కదాన్ ఉండ్రి ముక్క కిసి పడాఃయి దనిజ్ పొక్ఎన్. అయాలెకెండ్ కితిజ, వాండ్రు కొత్త సొక్క కిన్పిస్తాన్. కింజితి కొత్త ముక్క పడాఃయి దనిజ్ తగ్గవద్.

37 మరి, ఎయెన్బా కొత్త ద్రాక్కకల్లు పడాఃయి తోలు సన్నిదు వాక్ఎన్. అయాలెకెండ్ వాండ్రు వాక్తిజ కొత్త ద్రాక్కకల్లు పొజువాజి అయా తోలుసన్ని పెడెల్నాద్. ద్రాక్కకల్లు విజు వాజ్న సొనాద్. సన్నిపాడానాద్.

38 అందెజె కొత్త ద్రాక్కకల్లు కొత్త తోలు సన్నిదు వాక్తెజవెలె.

39 ఎయెన్బా పడాఃయి ద్రాక్కకల్లు ఉటివెనుక కొత్తక కోరిఎన్. ఎందనిజ్ ఇహిజ, ‘పడాఃయిక నెగ్గిక’, ఇజి వెహ్హాన్”.

6

1 ఉండ్రి విస్తాంతి దినమ్దు యేసుని వన్ని సిసూర్పంట గుడ్డెదాన్ సొన్ని మహార్. అయావలె వన్ని సిసూర్ సెరెక్ తెవ్తారె, వరికిదాన్ నులుసి, తింజి మహార్.

2 నస్తవలె సెగొండార్ పరిసయ్దు, “ఎందనిజ్ మీరు దేవుణు మోసెజ్ సెతి రూలుజ్ తప్పినిపణి విస్తాంతి దినమ్దు కిజినిదెర్?” , ఇజి వెన్బాతార్.

3 అయావలె యేసు, “దావీదురాజుని వన్నివెట మహికార్, బజ కట్టివెలె, ఇనిక కితాండ్రో ఇజి మీరు దేవుణుమాటదు ఎసెజ్బా సద్విఇతిదెరా?

4 వాండ్రు ఇనిక కితాన్ ఇహిజ, దేవుణుగుడిఃదు డుగితాండ్రె దేవుణు ఎద్రు ఇడ్రి రొట్టెజ్ లాగితండ్రె తిహాన్. పుజెరిజ్ తప్ప మరి ఎయెర్బా అయాకెజ్ తిండ్రెజ్ ఆవిద్. గాని వాండ్రు తిహాండ్రె వన్నివెట మన్నివరిజ్బా సిత్తాన్.

5 అందెజె లోకుమరిసి ఆతి నజీ విజు వన్కాజ్ ముస్సు అతికారం మనాద్. మరి, విస్తాంతి దినమ్దు ఇనిక కిదెజ్ ఇజి లోకాజ్ వెప్తాజ్ బా అతికారం మనాద్”, ఇజి వరిజ్ వెప్తాన్.

6 ఉండ్రీ నాండిజ్ విస్తాంతి దినమ్దు, యూదురి మీటిజ్ కిని ఇండ్రో సాహండ్రె, నెస్సిసి మహాన్. అబ్బె ఉణెర్ కియు అర్దికాన్ ఒరెన్ మహాన్.

7 పరిసయ్యరు ని యూదురి రూలుజ్ నెస్సిస్సికార్, యేసుజ్ ఇన్ని దనిజ్ బా నేరం మొప్పెజ్ ఇజి నుడేజి మహార్. అందెజె, యేసు యా జబుది వన్నిజ్ విస్తాంతి దినమ్దు నెగెణ్ కినాండ్రో ఇజి బాగ నుడేజి మహార్.

8 అహిజ, యేసు వారు ఒడేబిజినిక నెస్తాండ్రె, కియు అర్ది వన్నిజ్, “నీను వాజి విజెరె నడిఃమి నిల్ అ”, ఇజి వెప్తాన్. అయావలె వాండ్రు నిజితండ్రె అబ్బెనిహాన్.

9 అయావలె యేసు వరిజ్”, నాను మిజీ వెన్ బాజిన, దేవుణు మోసెజ్ సీతి రూలుజ్ వజ, విస్తాంతి దినమ్దు నెగ్గి పణిజ్ కిదెజా, సెఇ పణిజ్ పణి కిదెజా? పాణమ్దిజ్ నిల్ ప్తాజా, పాణమ్దిజ్ అర్ ప్తాజా?”, ఇజి వెన్ బాతాన్.

10 వెన్ బాతాండ్రె వరిజ్ విజెరిజ్ బస్తాండ్రె, అయా కియు అర్ది వన్నిజ్, “నీ కియు సప్ అ”, ఇజి వెప్తాన్. వాండ్రు ఆహె కితాన్. వన్ని కియు నెగెణ్ ఆతాద్.

11 అయావలె వారు వెర్రి కోపమ్దాన్ నిండ్రితారె, యేసుజ్ ఇనిక కిదెజ్ ఆనాద్ ఇజి ఒరెన్దిజ్ ఒరెన్ వర్రితార్.

పన్నెండు మణిసిర్ సిసూర్

12 ఆ దినమ్కాజ్ ఉండ్రీ నాండిజ్ యేసు పార్దనం కిదెజ్ ఇజి గొరొత్ సాహాన్. సాహండ్రె ఆ రెయ్యూ విజు దేవుణుదిజ్ పార్దనం కిత్తాన్.

13 పెందాల్ ఆతివెలె వాండ్రు వన్ని సిసూర్ జ కూక్తాండ్రె, వరిలోఇ పన్నెండు మణిరిజ్ ఏర్పాటు కిత్తాన్. వరిజ్ అపొస్తుడు ఇజి కూక్తాన్.

14-16 వీరు ఎయెర్ ఇహిజ, పేతురు ఇజి వాండ్రు పేరు ఇడ్డి సిమొను, వన్ని తంబెర్ని ఆతి ఆంద్రెయ, యాకోబు, యోహాను, పిలిపు, బర్తలోమాయి, మత్తాయి, తోమా, అల్పాయి మరిసి ఆతి

యాకోబు, యూదయ దేసెం వందిజ్ ఉసార్ ఆజిని సిమోను*, యాకోబుజ్ మరిసి ఆతి యూద, ఇస్కరియొతు యూద. యా ఇస్కరియొతు యుదనె, వెన్కా యేసుజ్ యూదురు అతికారిజి కిదు ఒపజెప్పికాన్.

17 వాండ్రు యా పన్నెండు మణిసిర్ సిసూర్వెట డిగిజి వాతండ్రె, ఉండ్రె బయిలుదు నిహన్. వన్ని సిసూరు నండొండార్, యూదయ దేసమ్దు మని విజు నాహ్కాణికార్, యెరూసలెమ్దాన్, సమ్దరం పడఃకాద్మని తూరు, సీదోసు పట్టుమ ప్రాంతమ్కాజ్వాతి నండొ లోకుర్ అబె మహార్. వారు వన్ని మాటజ్ వెండ్రెజ్, పరిజ్ మన్ని కస్టమ్కు సొన్పె ఆదెజ్ ఇజి వాతార్.

18 దెయమ్కు అస్తి నండొ బాద ఆజి మహికార్ నెగెణ్ ఆతార్.

19 దేవుణు సత్తు వన్నిబాణిజ్ వాజి విజెరె నెగెణ్ ఆజి మహార్. అందెజె లోకు విజెరె వన్నిజ్ ముట్టెజ్ ఇజి ఆస ఆతార్.

20 అయావలె వాండ్రు వన్ని సిసూర్జ సుండఃతాండ్రె, ఈహు వెప్పినాన్. “బీదదికార్ ఆతి మీరు గొప్ప వారు. ఎందనిజ్ ఇహిజు, దేవుణు మిజి ఏలుబడిః కిజినాన్.

21 ఏలు బజ సాజిని మీరు గొప్ప వారు. ఎందనిజ్ ఇహిజు, దేవుణు మిజి కావాలస్తికెజ్ మీ మన్సు నిండ్రు సీనాన్. యేలు అడఃబాజిని మీరు గొప్ప వారు. ఎందనిజ్ ఇహిజు, మీరు సిక్కిదెరై.

22 లోకు మరిసి ఆతి నజీ నమ్మితి వందిజ్ లోకుర్ మిజి దూసిసి కేట కినార్. నిందెజ్మొప్పి నీను సెఇక ఇజి వెప్పి నెక్కొక్కార్. అయావలె మీరు గొప్ప వారు.

23 నిన్ని కస్టమ్కు వానివలె సర్ద ఆజి డాట్తు. ఎందనిజ్ ఇహిజు, దేవుణు మంజిని బాడిదు మిజి మన్ని పలితమ్కు గొప్ప నండొ మనె. యా లెకెండనె, మిజి బాద కిజిని విరి అనిసిర్, పరి కాలమ్దు మహి ప్రవక్తెజు బాద్ధ కిత్తార్.

* 6:14-16 6:14-16 రోమది ఏలుబడిఃదాన్ యూదయ దేసమ్దిజ్ విడుదు కిదెజ్ ఉసార్దాన్ సుడిఃజిని యూదయ సజం మనాద్. అయాసజమ్దికాన్ ఒరెనె సీమోను

24 గాని, ఓ ఆస్తిమనికిదెరా, అబాయా మిజీ ఎసా గొప్ప బాదెజ్ వానెలె. ఎందానిజ్ ఇహిజ, మిజీ విజు సుకం దొహ్క మనాద్.

25 ఏలు పొట పంజు ఉణిజినికిదెరె, అబాయా మిజీ ఎసా గొప్ప బాదెజ్ వానెలె. మీరు బజ సానిదెర్లె. యేలు సిక్కినికిదెరె. అబాయా మిజీ ఎసా గొప్ప బాదెజ్ వానెలె. మీరు దుకం కిజ అడఃబానిదెర్లె.

26 లోకు విజెరె మీ వందిజ్ నెగ్గికెజ్ వెహ్ని వెలె, అబాయా మిజీ ఎసా గొప్ప బాదెజ్ వానెలె. ఎందానిజ్ అయలెకెండెనె వరి అనిసిర్ అబద్దం వర్గిని ప్రవక్తెజబా కిత్రార్.

ప్రేమ వందిజ్ వెహ్నినాన్

27 నా మాటెజ్ వెంజిని మిజీ నాను వెహ్నిన, మీ పగాతివరిజ్ ప్రేమిస్తు. మిజీ దూసిస్సివరిజ్ నెగ్గికెజ్ కిదు.

28 మిజీ సాయెప్ సీని వరిజ్, “దేవుణు మిజీ నెగ్గికెజ్ సిపిన్”, ఇజి దీవిస్తు. మిజీ బాదెజ్ కిని వరి వందిజ్ పార్దనం కిదు.

29 ఎయెన్బా మిజీ ఉండ్రి లెపాద్ డెయితిజ, మరి ఉండ్రి లెప బా తోర్నిస్తు. ఎయెన్బా మీరు వ్డెఃగితి మని సాల్య ఒతిజ, వన్నిజ్ మీ సొక్కబా సిఅ.

30 మిజీ లొస్సివరిజ్ విజెరిజ్ సీదు. మీ సొంతతిక పెర్జి ఒసిని వరిజ్ ఆక మరి లొస్మాట్.

31 లోకుర్ మిజీ ఎలాగ కిదెజ్ ఇజి మీరు కోరిజినిదెరొ అయాలెకెండె మీరు వరిజ్ కిదు.

32 మిజీ ప్రేమిస్సివరిజె మీరు ప్రేమిస్తిజ, దేవుణు మిజీ ఇనాయం సీనాన్ ఇజి ఒడిఃబిజినిదెరా?. పాపం కినికార్బా వరిజ్ ప్రేమిస్సి వరిజ్ ప్రేమిస్సార్.

33 మిజీ నెగ్గికెజ్ కినివరిజె మీరు నెగ్గికెజ్ కితిజ, దేవుణు మిజీ ఇనాయం సీనాన్ ఇజి ఒడిఃబిజినిదెరా? పాపం కినికార్బా ఆహె కిజినార్.

34 అప్పు మర్జి సీనార్ ఇజి నెస్సివరిజె మీరు సితిజ, దేవుణు మిజీ ఇనాయం సీనాన్ ఇజి ఒడిఃబిజినిదెరా? పాపం కినికార్బా ఆహె

కిజినార్. వారు సితికెజ్ విజు మర్జి సీనార్ ఇజి ఒడిఃబిజి పాపం కిజిని వరిజ్ సీజినార్.

35 గాని మీరు మీ పగ్ ఆతి వరిజ్ ప్రేమిస్తు. వరిజ్ నెగ్గికెజ్ కిదు. మర్జి సీనార్ ఇజి ఆస సిల్లెండ, అప్పు సీదు. అయావలె మిజి నండో ఇనాయమ్కు ఆనెలె. మీరు విజు దనిజ్ అతికారం మని దేవుణు మరిసిర్ ఆనిదెర్. ఇహిజు, మీరు వాండ్రు కినిలెకెండ కినిదెర్. ఎందనిజ్ ఇహిజు, దేవుణు మేలుదిజ్ నెన్ఇవరిజ్బా సెఇ పణిజ్ కిని వరిజ్బా దయ తోరిస్సాన్.

36 మీ బుబ్బు ఆతి దేవుణు ఎలాగ కనికారం ఆతికాండ్రో అయావజు మీరుబా మండ్రు.

తీర్పు కిదెజ్ ఆవద్

37 ఒరెన్ వన్ని ముస్కు వెహ్లాట్. అయ లెకెండ దేవుణు మీ ముస్కు వెహ్ఎన్. లోకు కిని వన్కాజ్ మీరు తీర్పు కిమాట్. అయాలెకెండ మీ ముస్కు దేవుణు తీర్పు కిఎన్. లోకుర్ మిజి బాదెజ్ కితిజు, మీరు మర్జి కివిండ వరిజ్ డిఃస్తు. అయాలెకెండ దేవుణు మిజి డిఃస్సాన్లె.

38 మహి వరిజ్ సీదు. దేవుణు మిజి సీనాన్లె. మిజి నండో సీనాన్లె. తిగ్జి, కుదిలిసి, వజ్జి సొని లెకెండ మీ ఒడిఃద్ సీనాన్లె. మీరు కొలిజి సితివజనె మిజి దోహ్కాద్లె.

39 నస్తవలె వాండ్రు కత వజు యాక నెన్పిస్తాన్. అయాక ఇనిక ఇహిజు, “ఒరెన్ గుడ్డి వన్నిజ్ మరి ఒరెన్ గుడ్డి వాండ్రు సరి తోరిస్తెజ్ అట్నాండ్రా? తోరిస్తెజు, వారు రిఎర్బా గాతదు అర్నార్గదె?

40 సద్వినికాన్ నెన్పిన్ని వన్నిముస్కు పెరికాన్ ఆవన్. గాని సదు పూర్తి నెస్తికాన్ ఎయెన్బా వన్నిజ్ నెన్పిస్తి వన్నివజు మంజినాన్.

41 మీ కణకాదు మన్ని తూలం నన్నిక సుడఃవిండ మీ తంబెరిజు కణకాద్ మన్ని కాసరాదిజ్ ఎందానిజ్ బేసిని?

42 నీ కణకాదు మన్ని తూలం నన్నిక లాగ్ఎండ, మీ తంబెరిజ్, ‘ఓ తంబెరి నీ కణకాదు మన్ని కసరాదిజ్ లాగ్న’, ఇజి ఎలాగ వెహ్లాజ్ ఆనాద్. వేసం కినికిదెరె, మీ సొంత కణకాదు మన్ని తూలం ననిక

ముజాలె లాగ్దు. అయావలె మీ తంబెరిజ కణకాద్ మన్ని ఇజిరి కసరాదిజ్ నెగెండ్ సుడిఃజి లాగ్దెజ్ అట్టి.

43 నెగ్గి మరాత్ సెజ పట్టు అన్ఉ. అయాలెకెండ్ సెజ మరాత్ నెగ్గి పట్టు అన్ఉ.

44 విజు మరెకాజ్బా పట్టు సుడఃజి నెస్తెజ్ ఆనాద్. ఎయెర్బా బొడః పట్టు సాప్పు తుపెజాణిజ్కొయిఎర్. అయాలెకెండ్ ద్రాక్స పట్టు బా సాప్పు అటదాన్ కొయిఎర్.

45 నెగ్గి మన్ను మన్నివన్నిజ్ కూలిజ్ కొట్టు కిత్తి మన్నిలెకెండ్ వన్ని మన్నుదు నెగ్గికెజె మంజినె. అందెజె వన్ని వెయుదాన్ నెగ్గి మాటెజ్ వానె. సెజ మన్ను మన్నివన్నిజ్ సెజకెజె మంజినె. అందెజె వన్ని వెయుదాన్ సెజ మాటెజ్ వానె.

46 నాను వెస్తా మాటెజ్వజ మీరు కివీండ మరి మీరు ఎండనిజ్ ప్రబువా, ప్రబువా ఇజి నజీ కూక్కినిదెర్?

47 నా డగ్రువాజి నా మాటెజ్ వెంజి అయావజ కినికాన్ ఎయెరిజ్ పొలిత మనాంత్తొ ఇజి నాను నెన్పిసిన.

48 వాండ్రు పునాది నిరీడ్ కార్సి సట్టుముస్కు పునాది కితాండ్రె ఇల్లు తొప్పి వన్ని లెకెండ్ మనాన్. పెరి గడ్డ వాతాద్. ఇల్లుదిజ్ పెరి గడ్డ డెయితిజ్బా అది అర్ఎతాద్. ఎండనిజ్ ఇహిజ, అది నెగ్గెండ తొహ ఆత మనాద్.

49 గాని నా మాటెజ్ వెంజిబా అయావజ కిఇకాన్, బూమి ముస్కు పునాది పొక్ఎండ ఇల్లు తొప్పి వన్ని లెకెండ్ మనాన్. పెరిగడ్డ డెయితిజ్ నెణమె అయా ఇల్లు అర్తాద్. ఇల్లు పూర్తి పాడాతాద్.

7

1 వాండ్రు వెస్తాజ్ మన్నిమాటెజ్ విజు లోకురిజ్ వెన్పిసి వీస్తాండ్రె, కపెర్నహుము ఇన్ని పట్టుమీదు వాతాన్.

2 అబ్బె రోమ సయినమ్దిజ్ సదాతిపతి* ఒరెన్ మహాన్. అతికారిజ్ నండొ ఇస్తం ఆతి ఒరెన్ వెట్టిపణి కినికాన్ వన్నిజ్ మహాన్.

* 7:2 7:2 వంద విధెం కినివరిజ్ నడిఃపిసినికాన్.

వాండ్లు జబు లావు ఆతాదె సాదెజ్ డగు ఆత మహాన్.

3 అయా అతికారి యేసు వందిజ్ వెహండ్రె, సెగొండార్ యూదుర్ పెద్దెల్జ వన్ని డగు పోక్టార్. ఎందనిజ్ ఇహిజ, వాండ్లు వాజి వన్ని వెటి పణి కిని వన్నిజ్ నెగెణ్ కిదెజ్ ఇజి.

4-5 వారు వన్ని డగు వాతారె, “యా అతికారి మా లోకాజ్ నండ్రె ప్రేమిస్తాండ్రె మజి మీటిజ్ కిదెజ్ ఇజి ఇల్లు తొహిస్త సితాన్. అందెజె నీను వాజి వన్ని వెటి పణిమణిసిజ్ నెగెణ్ కిదెజ్ వాండ్లు తగ్గికాన్”, ఇజి మరి మరి బతిమాల్తార్.

6 అందెజె యేసు పరివెట సాహాన్. వాండ్లు ఇల్లు డగు వాతాన్. అయావలె నతాదిప కూలెజ, “మీరు యేసు బాన్ సొన్ని ఈహు వెప్పు, “ప్రబువా, నీను వందమా. నా ఇండ్రె నీను వాదెజ్ నాను ఏపటితికాన్ ఆవు.

7 గాని నెగెణ్ ఆఅ ఇన్ని నీ మాటదాన్ నా వెట్టిపణి మణిసి నెగెండ్ర ఆనాన్లె, ఇజి నాను నెసిన.

8 ఎందానిజ్ ఇహిజ, నా ముస్కు అతికారం మనికార్ మనార్. నా అడిగి ఉద్దం కినికార్ మనార్. నాను ఒరెన్ వన్నిజ్ సొన్అ ఇహిజ సొనాన్. మరి ఒరెన్ వన్నిజ్ రఅ ఇహిజ, వానాన్. నా పణిమణిసిజ్ యాక కితి ఇహిజ కినాన్”, ఇజి వెహండ్రె పోక్టాన్.

9 యేసు యా మాటెజ్ వెహండ్రె, వన్ని వందిజ్ బమ్మ ఆతాన్. వాండ్లు వన్ని వెట వాతిమన్ని లోకుదరిజ్ మహ్తాండ్రె, “అబ్బు, ఇస్తాయేలు లోకుర్ లోఇబా విన్నిజ్ మన్ని నమకం లెకెండ్ర, నమకం మని ఒరెన్ వన్నిజ్బా నాను సుడెఁత ఇజి మీ వెట నాను వెహిన్”, ఇజి వెహ్తాన్.

10 వన్నిబాన్ వాతివరిజ్ యేసు మహ్తా పోక్టాన్. వారు ఇండ్రె సాహారె, నెగెణ్ ఆతి వెటిపణి మణిసిజ్ సుడెఁతార్.

సాతి వన్నిజ్ బత్కిస్తాన్

11 యాక కితి వెన్కా, యేసు నాయి ఇని పట్టుమ్దు సొన్ని మహాన్. వన్ని సిసూర్ని మంద లోకు వన్నివెట కూడెఁజి సొన్ని మహాన్.

12 వాండ్రు పట్నం వెల్గు డగ్గు వాతివెలె సాతికాన్ ఒరెన్ వన్నిజ్ సోప్తారె, సెగొండార్ పిండిజి ఒసి మహార్. సాతికాన్ అయ్సిజ్ ఒరెండ్రె మరిసి. అది ముండ బోదెలి. పట్నమ్ది మంద లోకుర్ దన్నివెట మహార్.

13 ప్రబు ముండ బోదెల్దిజ్ సుడఃతివెలె, వన్ని పాణం నొతాద్. అడఃబామా', ఇజి దన్నిజ్ వెహ్తాన్.

14 వాండ్రు డగ్గు వాతండ్రె, జజుద్ ముట్టిజ్, పిండిజి ఒసి మహికార్ నిహార్. యేసు సాతి వన్నిజ్, “ఓ దజడః, నాను నిజి వెహ్సిన, నిజ్అ ఇజి”, ఇజి వెహ్తాన్.

15 అయావలె సాతికాన్ నిజ్జి బస్తాండ్రె, వర్గిదెజ్ మొదొల్స్తాన్. యేసు, వన్నిజ్ అయ్సిజ్ ఒపజెహ్తాన్.

16 వారు విజెరె బమ్మ ఆజి తియెల్ ఆతార్. “ఒరెన్ పెరి ప్రవక్త మా నడిఃమి వాతాన్. వన్ని లోకురిజ్ సాయం కిదెజ్ దేవుణు వాతాన్”, ఇజి వెహ్తారె దేవుణుదిజ్ పొగిడిఃతార్.

17 యేసు వందిజ్ యా మాటెజ్ యూదయ దేసెం ని డగ్గు మని ప్రాంతమ్కాజ్ విజు సెద్రితె.

యేసుని యోహాను సిసూరు వర్గిజినార్.

18-19 బాప్తీసం సీని యోహానుజ్ సిసూర్ యా జర్గితి పణిజు వందిజ్ యోహానుజ్ వెహ్తార్. నస్తివలె వాండ్రు వరి లోఇహాన్ రివర్ సిసూర్జు కూక్తాండ్రె, “వానికి నీనెనా? సిలిజు, మాపు మరి ఒరెన్ వందిజ్ ఎద్రు సుడఃదెజా?”, ఇజి ప్రబుజ్ వెన్బాదెజ్ యేసుడగ్గు పొక్తాన్.

20 వారు యేసుడగ్గు వాతారె, “నీనెనా వాజినికి? సిలిజు మాపు మరి ఒరెన్ వన్నిజ్ ఎద్రు సుడఃదెజా? ఇజి వెన్బాదెజ్ బాప్తీసం సీని యోహాను మజీ నీ డగ్గు పొక్తాన్”, ఇహార్.

21 అయావలెనె, యేసు జబ్బుదివరిజ్ బాదదాన్ మన్ని వరిజ్, దెయమ్కు అస్తి వరిజ్ నండొండారిజ్ నెగెణ్ కితాన్. నండొ గుడ్డిది వరిజ్ సూణిలెకెండ కితాన్.

22 అందెజె వాండ్రు వన్నిడగు వాతివరిజ్, “గుడ్డిదికార్ సుడెః ఆజినార్. సొటదికార్ నడిఃజినార్. కస్తమ్దికార్ ఇని పెరిజబ్బు మన్నికార్ నెగెణ్ ఆజినార్. బొయిరదికార్ వెంజినార్. సాతికార్ నికెఆజినార్. బీదాతివరిజ్ సువార్త వెహెఅజినాద్. ఇజి యాలెకెండ్ మీరు సుడెఃతికెజ్, వెంజనికెజ్ మర్రి సొన్ని యోహానుజ్ వెప్తు.

23 నా ముస్కు నమకం డిన్ఎండ మంజనికాన్ దేవుణు సీని దీవనమ్కు మంజనికాన్ఆనాలె”, ఇజి వరిజ్ వెహాన్.

24 యోహాను సిసూర్ సొహి వెనుక, యేసు యోహాను వందిజ్ మంద లోకు వెట ఈహు వెహెజ్ మొదొల్స్తాన్. “ఇనిక సుడెఃదెజ్ మీరు బీడిమ్బూమి ప్రాంతమ్దు సొహిదెర్? గాలిదిజ్ కద్దిజిని గడ్డిదిజ్ సుడెఃదెజా?

25 సిల్లిజ, మరి ఇనిక సుడెఃదెజ్ సొహిదెర్? మెతాని సొక్కెజ్ తొడిఃగితి మని ఒరెన్ వన్నిజ్ సుడెఃదెజా? సిల్లె, నండొ దర మన్ని సొక్కెజ్ తొడిఃగిజి, నుకం బత్రినికార్ రాజురి ఇల్కాజ్ మంజినార్.

26 అహిజ, మీరు ఇనిక సుడెఃదెజ్ సొహిదెర్? ఒరెన్ ప్రవక్తెజ్నా? ఒబ, ఒరెన్ ప్రవక్త ముస్కు పెరివన్నిజ్ సుడెఃదెజ్ సొహిదెర్ ఇజి నాను మిజి వెహిన్

27 విన్నివందిజ్ దేవుణు మాటదు ఈహు రాస్త మనాద్, “ఇదిలో, నాను నా కబ్బుతనివన్నిజ్ నీ ముజాల పొక్కిన వాండ్రు నీ ముజాల నీ సరి నెగెణ్ కిన్నాన్+”.

28 బోదెకాజ్ పుట్టి వరిలోఇ యోహాను ఇంక పెరికాన్మరి ఎయెన్బా సిలెన్. గాని దేవుణు ఏలుబడిః కిని లోకుర్ లొఇ తగిసి కొటికాన్ యోహాను ముస్కు పెరికాన్ ఇజి నాను మిజి వెహిన్”.

29 యేసు వెహిక్కెజ్ వెహారె లోకుర్ విజెరె పన్ను పెర్నికార్బా దేవుణు కిజినిక విజు నాయమ్దానె కిజినాన్ ఇజి లోకుర్ ఎద్రు ఒప్పుకోటార్. ఎండనిజ్ ఇహిజ, వారు యోహాను బాణిజ్ బాప్తినం లాగె ఆత మహార్.

30 గాని పరిసయరుని యూదురి రూలు నెస్పిస్వికార్ యోహాను సీని బాప్తినం లాగె ఆవితార్. వారు వరి వందిజ్ దేవుణు ఎతు కితి సజతి

† 7:27 7:27 మలాకి 3:1.

నెక్క పొక్టార్.

31 యా తరమ్ది లోకాజ్ నాను ఇన్ని దని దనటాన్ పోల్సి వెహైజ్? వారు ఇని దనిజ్ పోలిత మనార్?

32 వారు, సతాదు బసి మంజి పెండ్లి ఇండ్రో ని సాతి ఇండ్రో జర్గిజిని దని వందిజ్ ఎత్తు కిజి కర్జిజిని కొడొఃరిజ్ పోలిత మనాద్. అయా కొడొఃరి ఒరెన్ దిజ్ ఒరెన్ కూకె ఆజి ఈహు కర్జిజినార్. “మాపు పిరుడిః ఊహ్వాక్తాప్ గాని మీరు కర్జిఇతిదెర్. మాపు సాతి ఇండ్రోణి పాటెజ్ పార్తాప్ గాని మీరు అడఃబాఇతిదెర్”.

33 ఎందానిజ్ ఇహిజు, బాప్తినం సీని యోహాను మాముల్ బోజనం ఉణిజి, ద్రాక్కు కడు ఉణెఎండ వాతాన్. అందెజె మీరు, “వినిజ్ దెయం అస్తాద్”, ఇజి వెప్పినిదెర్.

34 లోకు మరిసిఆతి నాను ఉణిజి తింజి వాజినాన్. అందెజె మీరు ఇదిలో వీండ్రు టిండి కకుర్తికాన్, సోస్పికాన్, పన్ను పెర్నివరిజ్ పాపం కినివరిజ్ కూలాయెన్ ఇజి వెప్పినిదెర్.

35 గాని దేవుణుబాణిజ్ వాతి గెణం మనికార్ అయా గెణం నిజమాతిక ఇజి వరి విజు నెగ్గి పణిజాణిజ్ రుజుప్ కిజినార్.

పాపం కిత్తి బోదెల్ దిజ్ సెమిసినాన్

36 పరిసయరు లొఇ ఒరెన్ వన్నివెట బోజనం కిదెజ్ యేసుజ్ కూక్తాన్. అందెజె యేసు పరిసయరు ఇండ్రో సాహండ్రె, వన్ని వెట బోజెనమ్ దిజ్ బస్త మహాన్.

37 ఆ నాటొ పాపం కిజి మహి ఉండ్రి బోదెలి మహాద్. యేసు పరిసయరు ఇండ్రో బోజెనమ్ దిజ్ బస్త మహాన్ ఇజి నెస్తాదె, నూనాజ్ పణుకుదాన్ ‡ తయార్ కితి ఉండ్రి సీసారు నెగ్గి వాసనం సీని నూనె తత్తాద్.

38 యేసు, కాల్కు వెన్కా ముహ్తాండ్రె బస్త మహాన్ కాక అది వెనక వన్ని పాదమ్ క డగ్రు నిహాద్. నిహదె అడఃబాజి మహాద్. అది దన్ని

‡ 7:37 7:37 యా నూనాజ్ పణుకు పేరు అలబాస్టరు ఇజి యా పణుకు నండొ కరీదితిక తెల్లాజ్ మంజినాద్ యాక గిసి లోకుర్ పునెజ్ తయార్ కిజినార్.

కణెర్దాన్ వన్ని పాదమ్కాజ్ ఊత్తాదె దని కొప్పుదాన్ తెల్తాద్. వన్ని పాదమ్కాజ్ ముదు కితాదె వాసనం సీని జటమామ్సి నూనె రాస్తాద్.

39 వన్నిజ్ కూక్తి పరీసయి వాండ్రు యాక సుడఃతాండ్రె, వీండ్రు నిజం ఇక ఒరెన్ ప్రవక్త ఇహిజ, వినిజ్ ముట్టి బోదెలి ఎయిదో ఎలాగ మర్తికాదో ఇజి నెస్తాన్ మరి. ఎండనిజ్ ఇహిజ, ఇది పాపం కినికాద్, ఇజి మన్నుదు ఒడిబితాన్.

40 అందెజె యేసు, “ఓ సిమోను నీవెట ఉండ్రీ మాట వెప్తాజ్ మనాద్”, ఇజి వన్ని వెట వెప్తాజ్, “బోదకినికి వెహాఅ”, ఇహాన్.

41 అయావలె యేసు”, ఒరెన్ అప్పు సీతి వన్నిజ్ రిఎర్ అప్పు లొస్తికార్ మహార్. వరి లొఇ ఒరెన్ అయ్దు వందెజ్ వెండి రుపాయిజు మరి ఒరెన్ యాబయి వెండి రుపాయిజు సీదెజ్ మనాద్.

42 అప్పు తిర్స్తెజ్ వరిజ్ డబ్బు సిల్లెద్. అందెజె వరిజ్ రిఎరిజ్ బా డబ్బు లొన్ఎండ డిస్తాన్. ఏలు, విరి లొఇ ఎయెన్ వన్నిజ్ నండో ప్రేమిస్తాన్? ఇజి వెన్బాతాన్.

43 అందెజె సిమోను, “వాండ్రు ఎయెరిజ్ నండో సితండ్రె, లొన్ఎండ డిస్తె సితాండ్రో వాండ్రె నండో ప్రేమిస్తాన్, ఇజి నాను ఒడఃబిజిన”, ఇహాన్. అందెజె యేసు, “నీను నెగెండ ఎత్తు కితిదె వెప్తా”, ఇహాన్.

44 ఇహండ్రె, ఆ బోదెల్ దరొట్ సుడఃజి సిమోనుజ్ ఈహు వెప్తాన్. “యా బోదెల్ దిజ్ నీను సుడఃజిని గదె. నాను నీ ఇండ్రో వాత. నీను నా పాదమ్కు ఊర్పాదెజ్ ఏరు సిఇతి. గాని ఇది దని కణెర్దాన్ నా పాదమ్కు ఊత్తాదె, దని కొప్పుదాన్ తేలితాద్.

45 నీను నజీ ముదు కిజి డగ్రు కిఇతి. గాని ఇది నాను వాతి బాణిజ్ అసి నా పాదమ్కు ముదు కిజినె మనాద్.

46 నీను నా బురాదు నూనె రాస్ ఇతి. గాని ఇది నా పాదమ్కాజ్ వాసనం సీని నూనె రాస్తాద్.

47 అది నండో ప్రేమిస్తాద్. అందెజె దని నండో పాపమ్కు దేవుణు సెమిస్తాన్, ఇజి నాను నీ వెట వెప్సిన. ఎయెరిజ్ దేవుణు తక్కు సెమిస్త మనాండ్రో, వాండ్రు తక్కునె ప్రేమిస్తాన్”.

48 మరి యేసుదనిజ్, “దేవుణు నీ పాపమ్కు సెమిస్త మనాన్”, ఇజి వెప్తాన్.

49 వన్ని వెట ఉండెజ్ బస్తి మహికార్, “పాపమ్కు సెమిస్త మన్న ఇజి వెహైజ్ వీండ్రు ఎయెన్?” , ఇజి ఒరెన్దిజ్ ఒరెన్ వర్గిజి మహార్.

50 అందెజె యేసు, “నీను నా ముస్కు నమకం ఇడ్డి. అందెజె నీ పాపమ్కాణిజ్ దేవుణు రక్సిస్తాన్ ఇజి ఆ బోదెల్దిజ్ వెహైన్.

8

యేసు విత్తు వందిజ్ వెహిని కత

1 సెగం రోస్కు సాహి వెనుక, యేసు, దేవుణు కిని ఏలుబడిః వందిజ్ సువార్త పట్టుమ్కాజ్ నాహ్కాజ్ బోదిసి వెహిని వాజి మహాన్.

2-3 పన్నెండు మణిసి సిసూరు వన్ని వెట మహార్. దెయం బాణిజ్, కష్టమ్కాణిజ్ నెగెణ్ ఆతి సెగిండెక్ బోదెక్బా వన్ని వెట మహా. వన్కా లోఇ ఏడు దెయమ్కాణిజ్ యేసు డిన్పిస్తి మగ్దలెనె ఇని మరియ, హెరొద్ ఇంత్రో ఎజమాని పణి కిజి మహి కూజ ఇని వన్ని ఆల్ని యెహన, సుసనయ, మరి నండో బోదెక్బా మహా. వన్కాజ్ కల్లితి మన్ని లోఇ అవిక, యేసువన్ని సిసూర్ వందిజ్ కర్చు కిజి మహార్.

4 విజు పట్టుమ్కాణిజ్ లోకుర్ యేసుడర్గు వాజి మంద ఆతివెలె, వాండ్రు ఉండ్రీ కత వజి ఈహు నెన్పిస్తాన్.

5 “ఒరెన్ రయేతు వాండ్రు విత్కు వితెజ్ సాహాన్. వాండ్రు విత్కు విత్ని మహిజ్ సెగం సరి పడఃకాద్ అరై. అరై విత్కాజ్ మట్టి సొన్ని మహార్. ఆగాసమ్ది పొటిజ్బా వాతెనె పెహ్తా తివె.

6 మరి సెగం సటు ముస్కు మన్ని డులిదు అరై. నేరితె గాని తడిః సిల్లెండ ఆతిజ్ సాతె.

7 మరి సెగం సొప్పు తపుజ్ నడిఃమి అరై. సొప్పు తుపెజ్వెట పిరితె గాని వన్కాజ్ తిగితె.

8 మరి సెగం నెగ్గి బూమిదు అరై. ఆకెజ్ పిరితెనె పంట నెగిండ పండితాద్. నండో జణి ఆతాద్. విత్తి విత్తుదిజ్వంత వంతుజ్లెకెండ ఆతె. యేసు యా మాటెజ్ వెహిని, ‘రుండి గిబిజాణిజ్ వెంజి అయావజి నడిఃదు’ ”, ఇజి వెహైన్.

9 వెనుక వచ్చిసినూర్ యా కతవజ నెస్పిస్తి దనిజ్ అర్థం ఇనిక ఇజి వెన్బాతార్.

10 వెన్బాతిజ్ వాండ్రు, “దేవుణు కిని ఏలుబడిః వందిజ్ డాజితి మహి సజతిజ్ దేవుణు మిజి తెలివి కిత మనాన్. గాని మహికార్ దేవుణు మాటదు వెష్టా లెకెండ్, ‘సుడఃజినార్ గాని తొవర్, వెంజినార్ గాని అర్థం కివర్*’. అందెజె వరిజ్ కతవజ నాను నెస్పిసిన.

11 యా కతవజ నెస్పిస్తి దనిజ్ అర్థం ఇనిక ఇహిజ, విత్తు ఇహిజ దేవుణు మాట.

12 విత్తు అర్థిసరి పడఃకాద్ పొలితికార్ ఎయెర్ ఇహిజ, దేవుణు మాట వెనికార్. గాని వారు దేవుణుదిజ్ నమిజి, వాండ్రు వరిజ్ రక్సిన్ఎండ మంజిని వందిజ్ సయ్తాను వాజి వరి మన్నుదు మన్ని దేవుణు మాట పెర్ది బనాన్.

13 విత్తు అర్థి సట్టుముస్కు మని డుల్లిదిజ్ పొలితికార్ ఎయెర్ ఇహిజ, దేవుణు మాట వెనివెలె సర్దదాన్ మన్నుదు ఇడ్కికార్. గాని వెల్ల లొఇ సొని లెకెండ్ దేవుణు మాట వరి మన్ను లొఇ సొన్ఎద్. వారు సెగం కాలం నమినార్ గాని కస్టం వానివలె డిఃస్నార్.

14 విత్తు అర్థి సాప్పు తపుజ్ నడిఃమి పొలితికార్ ఎయెర్ ఇహిజ, దేవుణు మాట వెంజి నమకం బా ఇడ్నార్. గాని వారు ఆహె బత్కిజి సొనివలె బత్కువందిజ్ మన్ని విసారం, సంసారం, సుకం వందిజ్ ఒడఃబినార్. యాకెజ్ వరి నమకం తిగ్జి పొక్కినె. వరి బత్కుడాన్ ఇన్ని లాబంబా సిల్లెద్.

15 విత్తు అర్థి నెగ్గి బూమిదిజ్ పొలితికార్ ఎయెర్ ఇహిజ, దేవుణు మాట వెనికార్. వారు వరిజ్ తగ్గి నెగ్గి మన్నుదు దేవుణు మాట ఇడ్నార్. కస్టమ్కు వాతిజ, వారు అయాకెజ్ ఒరిసి నమకమ్దాన్ పిరినార్.

దీవ వందిజ్ వెహినాన్.

* 8:10 8:10 యెసయ 6:9.

16 ఎయెన్బా దీవ కసిసి వెన్కా తబల మూక్సినో, మంసం అడ్గినో ఇడ్ఎన్. గాని లోఇ వానివరిజ్ జాయి తోరదెజ్ ఇజ దీవ కంతూదునె ఇడ్నార్.

17 డాఃజీతిక ఇనికబా వెల్లి ఆనాద్. ముస్తిక ఇనికబా తోరెఆజి వెల్లితనె.

18 అందెజె మీరు వెంజినికెజ్ అర్దం కిజి మండ్రు. ఎందనిజ్ ఇహిజు, నా బాణిజ్వెంజి అర్దం కిజిని వన్నిజ్ దేవుణు మరి తెలివి కినాన్. గాని వెంజి అర్దం కిఇవన్నిజ్వాండ్రు అర్దం కిత మన ఇజ ఒడఃబితికెజ్బా లాగ్నాన్.

19 నస్తివలె యేసు అయ్సిని తంబెరసిర్ వన్నిజ్ సుడఃదెజ్ వాతార్. గాని లోకుర్ నండో మహిజ్ వన్ని డగ్రు సాండ్రెజ్ అట్వితార్.

20 అయావలె ఒరెన్, “నీ యాయ ని తంబెరిజు నిజి సుడఃదెజ్ కోరిజి వెల్లి నిహ మనార్”, ఇజి వన్నిజ్ వెప్తాన్.

21 వెప్తాజ్ యేసు, “దేవుణు మాటెజ్ వెంజి అయావజి నడిఃనికారె నా యాయ నా తంబెరిజు”, ఇజి వెప్తాన్.

యేసు పెరిగాలి తుపాన్దిజ్ ఆప్కిజినాన్

22 నస్తివలె ఉండ్రీ నాండిజ్ యేసు వన్నిసినూర్జు, “గనెసరెతు ఇన్ని సెరు అతాహ పడఃక సొనాట్”, ఇజి వెప్తాన్. అందెజె వారు ఉండ్రీ డోణిదు ఎక్తారె సొహార్.

23 వారు సొన్ని మహిజ్, యేసు నిద్ర కితాన్. అయావలె పెరి గాలి తుపాన్సెర్దు ముస్కు వాతాదె, డోణిదు ఏరు నిండ్రీజినాద్. వారు పెరి ప్రమాదమ్దు మనార్.

24 అయావలె సినూరు వన్ని డగ్రు సొహారె, “ప్రబువా, ప్రబువా మాపు సానా సొనాప్లె”, ఇజి వన్నిజ్ నిక్తార్. వాండ్రు నిజితండ్రె పెరిగాలి ఉల్లాలుజుదిజ్, “పలక్ ఆదు”, ఇజి డటం వెప్తాన్. పెరిగాలి అణస్తాద్. విజు అలెతె.

25 అయావలె వాండ్రు, “ఎందనిజ్ మిజి నా ముస్కు నమకం సిల్లెద్?”, ఇజి వరిజ్ వెన్బాతాన్. వారు బమ్మజి తియెల్దాన్,

“వీండ్లు గాలిదిజ్ వీరుదిజ్ అణస్తు ఇజి ఆడ్ర వెహ్లాజ్ అవి లోజిజినె. వీండ్లు ఎయెండ్రో”, ఇజి ఒరెన్వెట ఒరెన్ వర్లితార్.

దెయమ్కు అస్తివన్నిజ్ నెగెండ్ కిజినాన్.

26 వారు గరసినియ ఇని లోకురి ప్రాంతమ్దు వాతార్. అయా ప్రాంతం గలిలయ ప్రాంతమ్దిజ్ ఎద్రు మనాద్.

27 వాండ్రు సెరుగటుద్ డిగితివెలె, ఆ పట్టుమ్దికాన్ ఒరెన్ యేసుడగ్రు వాతాన్. వాండ్రు దెయమ్కు అస్తికాన్. నండో కాలమ్కాణిజ్ సొక్కెజ్ తోడిఃగిఎండ, ఇండ్రో మన్ఎండ, దూకిజాజ్† మహాన్.

28 వాండ్రు యేసుజ్ సుడఃతాండ్రె డటం డేల్లి వన్ని పాదమ్క ఎద్రు ముణుకుజ్ ఊరితాన్. ఊరితండ్రె, “విజు దనిజ్ అతికారం మన్ని దేవుణు మరిసి ఆతి యేసు, నా వెట నిజి ఇన్ని పణి, నజి బాద కిమ ఇజి నిజి బతిమాల్లిన్”, ఇజి డేల్లి వెహ్లాన్.

29 ఎందానిజ్ ఇహాజ, యేసు, వినిజ్ డిఃసి వెల్లి సొన్అ ఇజి ఆ దెయమ్దిజ్ ఆడ్ర సిత మహాన్. అది వన్నిజ్ నండో సుట్కు అసి మహాద్. అందెజె వన్నిజ్ గొలుస్కాణిజ్ కాల్యాజ్ కికాజ్ తొహ్ని కావ్ కిని వరిజ్ ఇట్టాద్. గాని వాండ్రు గొలుస్కాజ్ తెప్పి, దెయమ్కు వన్నిజ్ బీడిమ్బూమిదు ఉలుప్పి మహె.

30 యేసు వన్నిజ్, “నీ పేరు ఇనిక?”, ఇజి వెన్బాతాన్. నండో దెయమ్కు వన్ని లోఇ మహిజ్ వాండ్రు, “సేన”, ఇజి వెహ్లాన్.

31 మజి దర్దిదు షొక్మా ఇజి మరి మరి బతిమాల్తె.

32 నస్తవలె నండో పండ్రీజ్ మంద గొరొణ్ సెల్కాదు మెయిజి మహె. అందెజె వన్కా లోఇ సొండ్రెజ్ మజి సెల్వ సిదా”, ఇజి వన్నిజ్ బతిమాల్తె. అందెజె వాండ్రు సెల్వ సితాన్.

33 అయావలె దెయమ్కు వన్నిజ్ డిఃస్సెనె పండ్రీజు లోఇ సొహె. ఆ పండ్రీజ్ మంద గొరొత్దాన్ ఉహ్కీ వాజి సెర్దుదు అర్దెనె సాతె.

† 8:27 8:27 అయ కాలమ్దు మొడః సట్టు పణుకుదు దొలస్తి సాలమ్దు ఇడజి పెరి పణుకయదాన్ మూక్కి మహార్.

34 పండ్రిజ్మేప్పి మహికార్ జర్గితి దనిజ్ సుడేతారె ఉహ్కీ సొన్ని ఆ పట్టుమది వరిజ్, పట్టుమది వల్సెజ మని వరిజ్ జర్గితికెజ్ వెహ్తార్.

35 లోకుర్ యా జర్గితికెజ్ సుడేదెజ్ సొహార్. వారు యేసు డగ్రు వాతిజ్ దెయమ్కు డిస్తి సొహికాన్ సొక్కెజ్ తొడిగిజి నెగ్గి బుద్దిదాన్ యేసు పాదమ్క అడిగి బస్తి మహి సుడేతార్. సుడేతారె తియెల్ ఆతార్.

36 యాక సుడేతికార్ దెయం అస్తికాన్ ఎలాగ నెగెణ్ ఆతాన్ ఇజి మరి లోకురిజ్ వెహ్తార్.

37-38 అయావలె గరసినియ లోకురి ప్రాంతమ్దు మన్ని లోకుర్ విజెరె, నండొ తియెల్ ఆతార్. అందెజె, “మజి డిసి సొన్అ”, ఇజి యేసుజ్ వెహ్తార్. అందెజె యేసు డొణి ఎక్తాండ్రె మర్జి సొన్ని మహిజ్, దెయమ్కు డిస్తి సొహికాన్, “నాను బా నీ వెట వానా”, ఇజి బతిమాలితాన్.

39 గాని యేసు, “నీను మర్జి ఇండ్రొ సొన్అ. దేవుణు నీ వందిజ్ కిత్తి గొప్ప పణి విజు వెహ్అ”, ఇజి వెహ్తాండ్రె పొక్తాన్. వాండ్రు సొహాండ్రె యేసు వన్నివందిజ్ కిత్తి గొప్ప పణి పట్టుం విజు వెహ్తాన్.

యేసు సాతి అయిలిజ్ నిక్సినాన్, జబ్బుఆతి మహిబోదెల్దిజ్ నెగెణ్ కిజినాన్

40 యేసు మర్జి వాతివెలె, నండొ లోకుర్ వన్నిజ్ ఎద్రు సుడేజి మహార్. అందెజె వారు వన్నిజ్ డగ్రు కిత్తార్.

41-42 నస్తివలె, యూదురి మీటిజ్ ఇండ్రొణి అతికారి యాయిరు ఇనికాన్ యేసు పాదం ముస్కు అర్తాండ్రె, “నజి ఒరెదె గాలు. అది సాదెజ్ డగ్రు ఆత మనాద్. దనిజ్ డగ్రు పనెండు పంటెజ్. అందెజె నీను నా ఇండ్రొ రఅ”, ఇజి బతిమాలితాన్. వాండ్రు సొన్ని మహిజ్ నండొ లోకుర్ వన్ని ముస్కు నెకె ఆజి అర్చి మహార్.

43 అయావలె ఉండ్రె బోదెలి పనెండు పంటెజాణిజ్ వెల్లి ఆని జబ్బుదాన్ బాద ఆజి మహాద్. ఎయెర్బా దనిజ్ నెగెణ్ కిదెజ్ అట్వెతార్.

44 యేసు వెన్నాళ్ల వాతాదె, వాండ్రు తొడిగితిమన్ని వన్నినిరీ సొక్కది సెంగుదిళ్ల ముట్టాద్. ముట్టి వెటనె దనిళ్ల వాజి మహి నల అణస్తాద్.

45 యేసు, “నజీ ముట్టికాన్ ఎయెన?” , ఇజి వెన్బాతాన్. విజెరె, “మాపు నెన్ఎప్”, ఇజి వెప్టార్. అయావలె పేతురు, “బోదకినికిదా, నండొ లోకుర్ కూడితారె నీ ముస్సు అర్పినార్ గదె”, ఇజి వెప్టాన్.

46 గాని యేసు, “నజీ ఎయెండ్రొ ముట్టాన్. నా లొఇదాన్ దేవుణు నత్తు వెల్లి సొసి సొని లెకెండ్ నజీ తెలిజినాద్”, ఇజి వెప్టాన్.

47 అయావలె అది యేసుజ్ల డాజ్జి సొండ్రెజ్ల అట్ఎ ఇజి నెస్తాదె వణక్కి వాతాదె వన్ని పాదం ఎద్రు ముణుకుజ్ల ఊర్జి వజితాద్. నాను ఎండనిళ్ల వన్నిజ్ల ముట్ట ఎలాగ వెటనె నెగెణ్ ఆత ఇనిక విజెరె ఎద్రు అది వెప్టాద్.

48 అందెజె యేసు”, గాలు, నీను నా ముస్సు నమకం ఇడ్డి. అందెజె నీను నెగెన్ఆతి. సమాదనమ్దాన్ సొన్ఆ”, ఇజి దనిళ్ల వెప్టాన్.

49 యేసువర్గిజి మహివలెనె, యాయెరు ఇండ్రొణికాన్ ఒరెన్ వాతండ్రె, “నీ గాలు సాతాద్. బోదకినివన్నిజ్ల మరి వందిస్సు”, ఇజి వన్నిజ్ల వెప్టాన్.

50 యేసు అయా మాట వెహండ్రె, “తియెల్ ఆమ. నా ముస్సు నమకం ఉండ్రె ఇడెఆ. అది నెగెణ్ ఆనాద్”, ఇజి యాయెరుజ్ల వెప్టాన్.

51 యాయెరు ఇండ్రొ వాతివెలె, పేతురు, యాకోబు, యోహాను ఇని వరిళ్ల ని ఇజ్జి దని అయిసి అప్పొసిరిళ్లబా లొఇ ఒతాన్. గాని మహివరిళ్ల లొఇ సొండ్రెజ్ల సరి సిఎతాన్.

52 విజెరె దన్ని వందిళ్ల గుండెజు డెయ్ఎ ఆజి, అడెబాజి మహార్. యేసు వరిళ్ల, “అడెబామాట్, అది నిద్ర కిజినాద్ గాని సాఎద్”, ఇజి వెప్టాన్.

53 అది సాతాద్ ఇజి వారు నెస్త మహార్. అందెజె యేసుజ్ల సెకాల్ కిత్తార్.

54 అహిజ, యేసు దన్నికిదు అస్తాండ్రె, “ఇజ్జి బయి నిజ్ఆ”, ఇజి వెప్టాన్.

55 దనిజ్ పాణం మర్జి వాతిజ్ అది నిజితాద్. అయావలె వాండ్రు దనిజ్ బోజనం సీదు ఇజి ఆడ్ర సితాన్.

56 దని అయ్సి అపొసిన్ నండో బమ్మ ఆతార్. గాని వాండ్రు యాక ఎయెరిజ్బా వెహూట్ ఇజి వరిజ్ ఆడ్ర సితాన్.

9

సిసూరిజ్ పణి బపజెప్పినాన్

1 యేసు పన్నెండు మణిసి సిసూరిజ్ కూక్కి కుడుఃష్టాండ్రె విజు దెయమ్కాజ్ పేర్దెజ్, కస్టమ్కాజ్ నెగెణ్ కిదెజ్ వరిజ్ సత్తుని అతికారం సితాన్.

2 వాండ్రు, “దేవుణు ఏలుబడిః కినాన్ ఇజి సువార్త బోద్దిస్తెజ్, కస్టమ్కాణిజ్ మహి వరిజ్ నెగెణ్ కిదెజ్”, ఇజి వరిజ్ పోక్తాన్.

3 మరి వాండ్రు వెప్తాన్, “మీరు పయాణం వందిజ్ కీదు డుడ్డు గాని, సన్ని గాని రొట్టె గాని, డబ్బు గాని రుండి సొక్కెజ్ గాని ఇనికబా ఒత్తెజ్ ఆవ్దె.

4 మీరు ఎయె ఇండ్రో సొనిదెరో, అయా పట్ను డిఃస్సిదాక బానె మండ్రు.

5 మిజి ఎయెర్ డగ్రు కివిండ మహిజ ఆ పట్నమ్దాన్ డిఃసి సొనివలె మీ పాదమ్కాణి డుల్లిబాన్ దుల్పు. దేవుణు మాట వారు నెక్త పొక్తిజ్ దేవుణు వరిజ్ కోపం ఆతాన్ ఇజి తోరిస్తెజ్ ఆహె డుల్లి దులుపు”, ఇజి వరిజ్ వెప్తాన్.

6 అందెజె వారు సోతారె, నాహూజ్ విజు బూలాజి, సువార్త బోదిసి, ఎంబెబా కస్టమ్దాన్ మహి వరిజ్ నెగెణ్ కిజి మహార్.

7-8 గలీలయ ముటదిజ్ రాజు ఆతి హేరోదు యేసుని వన్నిసిసూరు కిత్తి పణిజ్ వందిజ్ వెహివెలె అసల అర్దం ఆఎండ మహాన్. ఎందనిజ్ ఇహిజ, సెగొండార్ యోహాను సాతండ్రె మర్జి నిజితాన్ ఇజి, సెగొండార్ ఏలియ ప్రవక్త తోరె ఆతాన్ ఇజి మరి సెగొండార్ పూర్బా కాలమ్దు మహి ఒరెన్ ప్రవక్త నిజిత వాతాన్ ఇజి యేసు వందిజ్ వర్గిజి మహార్.

9 అయావలె హేరోదు, “నాను యోహాను బుర్ర డెయిన్త గదె. మరి ఎయి వందిజ్ యా సజతిజ్ నాను వెంజిన? వాండ్రు ఎయెన్?”, ఇజి వన్నిజ్ సుడెదెజ్ ఆస ఆతాన్.

అయ్దు వేలు లోకాజ్ బజ తిర్పినాన్.

10 అపొస్తుడు మర్జి వాతారె, వారు కితి పణిజ్ విజు యేసుజ్ వెప్తార్. వాండ్రు వరిజ్ వెట కూక్తాండ్రె, బత్తనయుద ఇని పట్టుమ్దు కేట సాహార్.

11 గాని మంద లోకుర్ ఆక నెస్తారె, వన్ని వెన్కా వాజి మహార్. వాండ్రు వరిజ్ డగ్రు కితాండ్రె దేవుణు ఏలుబడిః వందిజ్ వరిజ్ వెప్తార్. కస్టమ్దు మహి వరిజ్ నెగెణ్ కితాన్.

12 పొద్దు డిగ్జి మహివలె, పన్నెండు మణిసి సిసూర్ వాతారె, “మాట్టు ఎయెర్ మనజ బాడిద్ మనాట్. అందెజె యా లోకురిజ్ మండ్రెజ్ బాడిః, ఉండెజ్ టిండి, దొహ్క్సిని వజ పడెకాద్ మన్ని నాహ్కాజ్ వల్సెజి పోకా”, ఇహార్.

13 యాక వెహండ్రె, యేసు, “మీరె వరిజ్ తిండ్రెజ్ ఇనికబా సీదు”, ఇజి వెప్తాన్. వెప్తాజ్ వారు, “మాబాన్ అయ్దు రొట్టెజ్, రుండి మొయెజ్ మనె. నిసా మంద లోకుదిజ్ బోజనం కొండెజ్ మాపు అట్నాపా?”, ఇజి వెప్తార్.

14 (వాతి మని లోకుర్ లొఇ మొగకొడొరెనె డగ్రు అయ్దు వేలుజ్ మనార్) వాండ్రు, “యాబయి మణిసిర్ యాబయి మణిసిర్ వర్స బసె కిదు”, ఇజి వన్ని సిసూర్జి వెప్తాన్.

15 వారు ఆహా కిజి విజెరిజ్ బసె కితార్.

16 నస్తివలె వాండ్రు అయ్దు రొట్టెజ్ని రుండి మొయెజ్ అస్తాండ్రె, ఆగనం దరోట్ బేసి, వన్కాజ్ వందిజ్ దేవుణుదిజ్ వందనం వెప్తాన్. అయాకెజ్ ముకెజ్ కితాండ్రె లోకురిజ్ సీబాజి సీదు ఇజి వన్ని సిసూర్జి సితాన్.

17 వారు విజెరె పొట పంజు తిహార్. తిహి వెనుక మిగిలితి ముకెజ్ పనెండు గంపెజ్ సిసూరు కెప్తార్.

18 ఉండ్రీ నాండిజ్ యేసు ఒరెండ్రె పార్దనం కిజి మహాన్. వన్ని సిసూర్ వన్ని డగ్రు మహార్. అయావలె వాండ్రు, “నాను ఎయెన్ ఇజి లోకుర్ వర్గిజినార్?”, ఇజి వరిజ్ వెన్బాతాన్.

19 వారు, “బాప్తినం సీని యోహాను ఇజి సెగొండార్ వెప్పినార్. సెగొండార్ ఏలియ ప్రవక్త ఇజినార్. మరి సెగొండార్ పూర్బా కాలమ్దు సాతి ప్రవక్తెజి లోఇ ఒరెన్ మర్జి నిజితాన్ ఇజి వర్గిజినార్”, ఇజి వన్నిజ్ వెప్టార్.

20 “అహిజ, మీరు నాను ఎయెన్ ఇజి వెప్పినానిదెర్?”, ఇజి వరిజ్ వెన్బాతిజ్, పేతురు, “దేవుణు ఏర్పాటు కితి పోక్తి క్రిస్తు”, ఇజి వెప్టాన్.

21 యాక ఎయెవెట వెహ్యట్ ఇజి కసితం వరిజ్ ఆడ్ర సితాన్.

22 మరి, “లోకు మరిసి ఆతి నాను నండొ కస్టమ్కు ఓరిస్తెజ్వలె. యూద వెద్దెల్జ, పెరి పుజెరిజు, యూదురి రూలు నెస్పిస్పికార్ నజీ వెల్లి కినార్. లోకుర్ నజి సప్నార్లె. సాజి మూండ్రె దినమ్కాజ్ దేవుణు నజీ నిక్నాన్లె”, ఇజి వెప్టాన్.

23 మరి వాండ్రు వరిజ్ విజెరిజ్ ఈహు వెప్టాన్. “ఎయెన్బా నా వెట వాదెజ్ ఇహిజ, వాండ్రు వన్ని సొంత ఇస్టమ్కు డిసి, వన్నిజ్ వాని కస్టమ్కు రోజు ఓరిసి సాదెజ్బా తయార్ ఆజి నా వెట వాదెజ్.

24 ఎయెన్బా వన్ని సొంత పాణమ్దిజ్ కాపాడెదెజ్ సుడెతిజ, వన్నిజ్ ఎల్లకాలం దేవుణు వెట బత్కిని బత్కు దోహ్కెద్. గాని ఎయెన్బా నా వందిజ్ వన్ని పాణం సీతిజ, వన్నిజ్ ఎల్లకాలం దేవుణు వెట బత్కిని బత్కు దోహ్కాద్.

25 ఒరెన్ వాండ్రు, వాండ్రు కోరితి విజు, యా లోకమ్ది సంసారం సుకం విజు దోహ్కె ఆజి, వన్నిజ్ ఎలాకాలం దేవుణు వెట బత్కిని బత్కు దోహ్కెండ మహిజ, ఇన్ని లాబం?

26 నా వందిజ్ నా మాట వందిజ్ సిగు ఆని ఎంబె వన్నిజ్బా నాను నెస్సు ఇజి వెప్టెజ్ లోకు మరిసి ఆతి నానుబా సిగు ఆన. నాను దేవుణు జాయ్దు ఒడెబిదెజ్ అట్ఇ నని సొకుదాన్ వానా. అయావలె

నా బుబ్బుదిని, దూతెజది జాయ్ ఒడ్డెబిదెజ్ అట్టణ సోకుబా నా వెట మంజినాద్. అయావలె నా వందిజ్ నా మాట వందిజ్ సిగు ఆతి వన్ని వందిజ్ నానుబా సిగు ఆన.

27 నాను మిజి నిజం వెప్పిన, “ఇబ్బె నిహి మన్ని వరి లొణ సెగొండార్, దేవుణు వన్ని లోకురిజ్ ఏలుబడిః కిజినిక సూణిదాక సావర్”.

యేసుజ్ మూర్తి మారిసినాద్.

28 యా మాటెజ్ వెప్తి డగ్రు ఉండ్రి వారం వెన్కా వాండ్రు, పేతురు, యాకోబు, యోహాను ఇన్ని వరిజ్ వెట్ట కూక్తాండ్రె, పార్లనం కిదెజ్ ఉండ్రి గొరొత్ ఎక్తార్.

29 వాండ్రు పార్లనం కిజి మహివలె వన్ని మొకమ్ది మూర్తి మారితాద్. వన్ని సొకెజ్ తెలాజ్ ఆతె, జిగి జిగి మెరిసి మహె.

30-31 అయావలె, దేవుణు మంజిని బాడ్డిదాన్ రిఎర్ వన్ని వెట వర్గిజి మహార్. దేవుణు బాణిజ్ వాతి జాయ్ వరి సుటులం మహాద్. వారు మోసె, ఏలియ ఇనికార్. యేసు యెరూసలెమ్దు సాజి, ఆహె దేవుణు ఎతు కితిక బేగి పూర్తి కిని వందిజ్ వర్గితార్.

32 పేతురు ని వన్ని వెట మహికార్ బాగ నిద్ర కితార్. తెలి ఆతి మహిజ్ వారు యేసుజ్ మని దేవుణు జాయ్దిజ్ వన్ని వెట నిహి మని రిఎరిజ్బా సుడ్డెతార్.

33 ఆ రిఎర్ వన్ని బణిజ్ సొన్ని మహిజ్, పేతురు యేసుజ్, “బాబు, మాటు ఇబ్బె మనిక గొప్ప నెగెద్. అందెజె నిజి ఉండ్రి మోసెజ్ ఉండ్రి ఏలియెజ్ ఉండ్రి మండ్రెజ్ మూండ్రి గుడుఃనిజ్ తోహనాప్.*

34 వాండ్రు ఆహె వర్గిజి మహిజ్ మొసాప్ వాతాదె వరిజ్ పిడ్డెగ్గితాద్. వారు మొసాప్ లొణ సొహివలె సిసూరు తియెల్ ఆతార్.

35 అయావలె, “వీండ్రు నాను వీర్పాటు కితి నా మరిను. విని మాటెజ్ వెండ్రు”, ఇజి ఉండ్రి జాటు మొసాప్దాన్ వాతాద్.

* 9:33 9:33 వాండ్రు వెప్తిక ఇనికదొ వన్నిజె తెలివద్

36 అయా జాటు వాతి వెనుక యేసుజ్నేనె తోరితాద్. సిసూరు సుడఃతి వన్యాజ్ ఉండ్రీ దనిజ్బా అయా దినమ్కాజ్ మహి ఎయెరిజ్బా వెహ్ఎండ అల్లెత మహార్.

దెయం అస్తి ఒరెన్ కొణొడిజ్ నెగెణ్ కిజినాన్

37 మహా నాండిజ్, వారు ఆ గొరొణ్ డిగ్జి వాతివలె నండొ లోకుర్ వన్నిజ్ ఎద్దు వాతార్.

38 అయావలె ఆ మంద లోకు లొఇ ఒరెన్, “ఓ బోదకినికి, నా మరిసిజ్ కనికారం తోరిన్అ ఇజి నాను నిజి బతిమాల్జిన. వాండ్రు నజి ఒరెండ్రె మరిసి.

39 ఉండ్రీ దెయం వన్నిజ్ అస్నాద్. వెటనె వాండ్రు డెడిఃస్నాన్. వెయ్దాన్ పంపుల్ వాజి అది వన్నిజ్ గజగజ వణికిసి అర్ప్పాద్. వన్నిజ్ నండొ బాద కిజి వందిసినె డిఃస్నాద్.

40 దనిజ్ సొన్పిస్టెజ్ నీ సిసూర్జ బతిమాల్త గాని వారు కిదెజ్ అట్ఎతార్”, ఇజి మొరొ కిత్తాన్.

41 అందెజె యేసు, “యా తరమ్దు మనికిదెరా, మీరు తప్పు సరిదు నడఃపె ఆజినికిదెర్. నమకం సిలికిదెర్. ఎసొడ్ రొస్సు మీవెట మంజిన? మీరు కినికెజ్ ఎసొ ఓరిస్టెజ్?”, ఇజి వెహ్తాండ్రె, “నీ మరిసిజ్ ఇబ్బె తగ్అ”, ఇజి వన్నిజ్ వెహ్తాన్.

42 ఆ కొణొః వాజిమహివలె వన్నిజ్ అసి మహి దెయం వన్నిజ్ అర్ప్తాదె గజ గజ వణకిస్తాద్. అయావలె యేసు ఆ దెయమ్దిజ్ సొన్అ ఇజి డటిసి వెహ్తాన్. కొణొడిజ్ నెగెణ్ కితాండ్రె అపొసిజ్ ఒపజెప్తాన్.

43 లోకుర్ యా జర్గితిక సుడఃతారె, దేవుణు గొప్ప సత్తు మనికాన్ ఇజి నండొ బమ్మ ఆతార్.

44 యేసు కితి పణి వందిజ్ లోకుర్ విజెరె బమ్మ ఆజి మహివలె, వాండ్రు ఈహు వన్ని సిసూరిజ్ వెహ్తాన్. “నాను యేలు వెహ్సిని మాటెజ్ బాగ వెంజి పొన్ఎండ మండ్రు. లోకు మరిసి ఆతి నాను లోకు కీదు ఒపజెపె ఆనాలె”, ఇజి.

45 గాని వాండ్లు వెళ్లి మాటెజ్ వరిజ్ అర్దం ఆవెతాద్. దేవుణు ఆక డాప్తాన్. ఎందనిజ్ ఇహిజ వారు అర్దం కిఎండ మండ్రెజ్. ఆ మాట వందిజ్ వన్నిజ్ వెన్బాదెజ్ వారు తియెల్ ఆతార్.

పెరికాన్ ఎయెన్ఇజి గొడఃబ రేప్పినార్

46 సిసూరు లొఇ ఎయెన్ పెరికాండ్రొ ఇజి ఉండ్రొ ఇజ్రి గొడబ వాతాద్.

47 యేసు వరి మన్నుదు మన్ని ఆలోసన నెస్తాండ్రె ఒరెన్ ఇజ్రి కొడొడిజ్ అస్తాండ్రె వన్ని పడఃకాద్ నిల్వ్తాన్.

48 నిల్వ్తి వెన్కా వాండ్లు వరిజ్, “ఎయెన్బా యా ఇజ్రి కొడొడిజ్ నా మున్ను. నమకం ఇడ్తికాన్ఇజి ఒడిఃబిజి డగ్గు కితిజ, నజి డగ్గు కితి వజ. నజి డగ్గు కితికాన్ నజి పొక్తి దేవుణు డగ్గు కితి వజ. మీ లొఇ ఎయెన్ తగిజి మంజి నాండ్రొ వాండ్రె పెరికాన్”, ఇజి వెప్తాన్.

49 అయావలె యోహాను, “బోదకినికి, నీ సత్తుదాన్ దెయమ్కాజ్ పొక్తి మహి ఒరెన్ వన్నిజ్ మాపు సుడఃతాప్. వాండ్లు మా వెట మనికాన్ ఆఎన్. అందెజె మాపు వన్నిజ్ అడ్డు కితాప్”, ఇజి వెప్తాన్.

50 అందెజె యేసు, “వన్నిజ్ అడ్డు కిమాట్. ఎందనిజ్ ఇహిజ, మీ మున్ను పగ సిలికాన్ మీ దరిజ్ మనికానె”, ఇజి వన్నిజ్ వెప్తాన్.

యెరూసలెమ్దు పయాణం కిజినాన్

51 యేసు పరలోకమ్దు సొండ్రెజ్ దినమ్కుడగ్గు ఆతివెలె వాండ్లు మన్ను పూర్తి నమకం కిజి యెరూసలెమ్దు సొండ్రెజ్ సోతాన్.

52 వాండ్లు వన్నిజ్ మండ్రెజ్ బాడ్డిః తయార్ కిదెజ్ ఇజి సెగొండారిజ్ ముజూల్ పొక్తాన్. వారు దని వందిజ్ సమరియ ఇనన్ని దేసెమ్ది ఉండ్రొ నాటొ వాతార్.

53 గాని నాటొణికార్ వన్నిజ్ డగ్గు కిఎతార్. ఎందనిజ్ ఇహిజ వాండ్లు యెరూసలెమ్దు మన్ని దేవుణు గుడిఃదు సొని ఒరెన్ యూద వాండ్రు.

54 సిసూర్జ లొఇ యాకోబు, యోహాను ఇనికార్ యాక సుడఃతారె, “ప్రబువా, యా లోకురిజ్ నాసనం కిదెజ్ ఆగాసం దాన్ మాపు సిసు తప్పిసైజ్ నిజి ఇస్టమ్నెనా?”, ఇజి వెన్బాతార్.

55 యేసు వరి దరొట్ మహ్తాండ్రె వరిజ్ గటిజ వెహ్తాన్.

56 నస్తివలె వారు మరి ఉండీ నాటో సోహార్.

57 వారు సరిదాన్ సొన్ని మహివలె, ఒరెన్, “నీను ఎంబె సోహిజ్బా నాను నీ వెట వానా”, ఇజి వన్ని వెట వెహ్తాన్.

58 అందెజె యేసు, “నక్కెజ మండ్రెజ్ బోరోజ్మన్నె. ఆగాసమ్ది పొటిజ మండ్రెజ్ గూడుకు మనె. గాని లోకు మరిసి ఆతి నజీ బుర్ర అడ్డు కిదెజ్బాడి సిల్లెద్”, ఇజి మర్జి వెహ్తాన్.

59 వాండ్రు మరి ఒరెన్ వన్నిజ్, “నా వెట రఅ”, ఇజి వెహ్తాన్. అయావలె అయా వాండ్రు, “ప్రబువా, ముజాల నాను సొన్ని నా బుబ్బెజ్ ముసి వానా”, ఇజి వెహ్తాన్.

60 అందెజె యేసు, “సాతికారె వరి సాతివరిజ్ముస్తెజ్. గాని నీను సొన్ని దేవుణు ఏలుబడిః వందిజ్ బోదీన్అ”, ఇజి వెహ్తాన్.

61 మరి ఒరెన్, “ప్రబువా, నీ వెట నాను వానా. గాని నాను ముజాల మర్జి సొన్ని నా ఇండ్రోణి వరిజ్ వెహ్తాన్ వాన”, ఇజి వెహ్తాన్.

62 అందెజె యేసు, “మేడిః ముస్కు కియు ఇడ్డి వెస్కా మర్జి బేస్సికాన్ ఎయెన్బా దేవుణు ఏలుబడిః కినివరి లొఇ ఎండనిజ్ పణిదిజ్ రఇకాన్”, ఇజి వెహ్తాన్.

10

డబయ్ మణిసి సిసూరిజ్ నువార్త వందిజ్ పోక్సిన్.

1 యాక జర్రితి వెనుక, ప్రబు మరి డబయ్ మణిసి సిసూరిజ్ ఏర్పాటు కితాన్. వాండ్రు సొని విజు పట్టుమ్కాజ్ విజు బాడిఃదు వన్ని ముజల రిఎరిజ్ రిఎరిజ్ పోక్తాన్.

2 పోక్సి, వాండ్రు వరిజ్ ఈహు వెహ్తాన్, “కొయ్దెజ్ మన్నిపంట లెకెండ్రె లోకుర్ నండొండార్ మన్నె. గాని తక్కునె కొయ్నికార్ తక్కునె అందెజె వన్ని పంట కొయ్నివందిజ్ పణికిని వరిజ్ పోక్అ, ఇజి కొత్త ఏజుమానిజ్ బతిమాలదు ఇజి వెహ్తాన్.

3 మీరు సొండ్రు! ఇదిలో, కార్నుకుడిఃజ నడిఃమి గొర్రె పిల్లెకాజ్ పోక్తిలెకెండ్రె నాను మిజి పోక్సిన్.

4 మీరు సన్ని గాని, డబ్బుజ్ ఇడ్డి సన్ని గాని, సన్నిదు మరి ఉండ్రీ జత జోడోకు గాని ఒతెజ్ ఆవద్. మీరు సర్దు ఎయెరిజ్ నెగెణ్ మనిదా ఇజి నిల్ని వర్గిజి, సమయం పాడు కిమ.

5 మీరు ఎయె ఇండ్రో బా సొనివలె, “యా ఇండ్రో మంజిని వరిజ్ సమాదనం కల్లిపిద్ ఇజి ముజాల వెప్తు.

6 సమాదనం కోరిజినికాన్ ఒరెన్ బాన్ మహిజ, మీ సమదనం వన్ని మున్సు. మంజినాద్. సిలిజ, మర్జి మీ బానె వానాద్.

7 వారు ఇనిక సితిజ్ బా ఉణిజి తింజి బానె మండ్రు. ఎండనిజ్ ఇహిజ, పణి కిని వన్నిజ్ వన్నిజ్ కావాలి కెజ్ దోహ్ కెజ్ తగ్గికాన్. ఇల్కు ఇల్కు బూలమాట్.

8 మరి మీరు ఎమేణి పట్నమ్దు సొనివలె వారు మిజి డగ్రు కిజి ఇనిక సితిజ ఆకదె ఉండు.

9 బాన్ మని కస్టమ్ది వరిజ్ నెగెణ్ కిదు. దేవుణు ఏలుబడిః కిని కాలం మీ డగ్రు వాత మనాద్ ఇజి వరిజ్ వెప్తు.

10-11 గాని మీరు ఎమేణి పట్నమ్దుబా సొనివెలె వారు మిజి డగ్రు కివిండ మహిజ, అయా పట్నమ్ది వీదిజ సొన్ని, “మా పాదమ్కాజ్ కస్తి మన్ని మీ పట్నమ్ది డుల్లిబా ఇబ్బె దుల్ప్పి సొన్సినాప్. ఎండనిజ్ ఇహిజ, దేవుణు మీ మున్సు కోపం ఆత మనాన్ ఇజి తోరిస్తెజ్. గాని ఒడోబిదు ఏలుబడిః కిని కాలం డగ్రు ఆత మనాద్ ఇజి తప్విండ నెస్తు”, ఇజి వెప్తు.

12 నాను మిజి వెప్పిన, దేవుణు తీర్పు కిని దినమ్దు యా పట్నమ్ది వరిజ్ సిక్కు మరి నండో మంజినాద్. సొదోమ పట్నమ్దు మహి లోకురిజ్ నసా మన్ఎద్.

13 ఓ కొరాజి పట్నమ్దు మనికిదెరా, అబాయా మిజి ఎసా పెరి కస్టమ్కు వానెలె. ఓ బెత్సెయుద పట్నమ్దు మనికిదెరా, అబాయా మిజి ఎసా గొప్ప పెరి కస్టమ్కు వానెలె. ఎండనిజ్ ఇహిజ, మీ నడిఃమి కితి బమ్మాతి గొప్ప పణిజ్ తూరు సీదోను ఇని పట్నమ్కాజ్ కినిక ఇహిజ, వారు పూర్బమ్దునె బస్త గరండెజ్ తోహా ఆజి, నీరు వాకె అజి, పాపమ్కు డిఃస్తాప్ ఇజి తోరిస్తార్ మరి.

14 దేవుణు తీర్పు కినివలె మీ పట్టుమకాజ్ సిక్కు, తూరు సిదోను పట్టుమకాజ్ నండొ మంజినాదలె.

15 కపర్నహోము పట్టుమదు మనికిదెరా, ఆగాసం దాక గొప్ప పెరికావ్ ఇజి ఒడిబిజినిదెరా? సిల్లె, దేవుణు మిజీ వాండ్రు మంజిని బాడిదాన్ అర్ప్పాన్లె. ఇహిజ, దేవుణు మిజీ నాసనం కినాన్లె.

16 మరి యేసు వన్ని సిసూరిజ్, “మీ మాట వెనికాన్ నా మాట వెనాన్. మీ మాటదిజ్ నెక్కు పొక్కికాన్, నా మాటదిజ్ నెక్కు పొక్కికాన్. నా మాటదిజ్ నెక్కి పొక్కికాన్, నజీ పొక్కి వన్నిజ్ నెక్కు పొక్కికాన్”, ఇజి వెహ్లాన్.

17 డబయ్ మణిసి సిసూరు సర్దాన్ మర్జి వాతారె, “ప్రబువా, దెయమ్కుబా, నీ అతికారం దాన్ సొండ్రు ఇజి మాపు ఆడ్ర సీజినివలె మజీ లోబడిజినె”, ఇజి వెహ్లాన్.

18 నస్తివలె యేసు, “ఒఒ, సయ్తాను మిరిన్సి లెకెండ్ వన్ని అతికారం సిల్లెండ ఆగాసమ్దాన్ అర్థిక నాను సుడెత

19 సారన్కాజ్ సోర్కుపిజి మట్టెజ్ మిజీ అతికారం సిత మన్ను. సయ్తాను సత్తుదిజ్ గెలిన్దెజ్ మిజీ అతికారం సిత మన్ను. సయ్తాను మిజీ ఇనికబా కిదెజ్ అట్ఎన్.

20 దెయమ్కు మిజీ లోబడిజినె ఇజి సర్ద లావు ఆమ. గాని దేవుణు మీ పేరు వాండ్రు మంజిని బాడిదు రాస్త మనాన్ ఇజి నండొ సర్ద ఆదు”, ఇజి వెహ్లాన్

21 అయావలె యేసు, దేవుణు ఆత్మదాన్ నండొ సర్ద ఆజి, “ఓ బా, నీనె ఆగాసమ్దిజ్ బూమిదిజ్ ప్రబు. నాను నిజీ పొగిడిజిన. ఎండనిజ్ ఇహిజ, గెణం మని వరిజ్, సదు మని వరిజ్, యా నిజమాతి సజతి డాప్తిదె, ఇజ్రి కొడొః లెకెండ్ మని వరిజ్ తోరిన్సి. ఒఒ బా, అయ లెకెండ్ కిదెజె నిజీ ఇస్తం ఆతాద్.

22 నా బుబ్బు నజీ విజు సజతిజ్ నా కీదు ఒపజెప్త మనాన్. మరిసి ఎయెండ్రొ ఇజి అప్పొసిసె నెస్సాన్. మరి ఎయెన్బా నెన్ఎన్. అప్పొసి ఎయెండ్రొ ఇజి మరిసి ని అప్పొసిజ్ తెలివి కిదెజ్ మరిసి ఎర్లితికార్నె నెస్సార్. మరి ఎయెన్బా నెన్ఎన్”, ఇజి వెహ్లాన్.

23-24 వాండ్రు సిసూర్ దరోట్ మహ్తాండ్రె, “దేవుణు వందిజ్ వాండ్రు కిని ఏలుబడిః వందిజ్ మీరు సుడఃతి గొప్ప సజతిజ్ సుడఃదెజ్ అట్టి మీరు అంతు సిల్లి సర్ద మంజినికార్. ఎందనిజ్ఇహిజ, నంఠొ ప్రవక్తరు, రాజురుజు మీరు సుడఃజినికెజ్, సుడఃదెజ్ ఇజి ఆస ఆతార్ గాని సుడఃదెజ్ అట్ఎతార్. మీరు వెహికెజ్ వెండ్రెజ్ ఇజి ఆస ఆతార్ గాని అట్ఎతార్”, ఇజి వన్ని సిసూరిజ్నె వెహ్హన్.

పడఃకాదికాన్ ఎయెన్ ఇనివందిజ్ యేసు వెహ్హినాన్

25 ఉండ్రె నాండిజ్, యూదురు రూలు నెస్పిస్సాన్ ఒరెన్ నిజ్జి, “ఓ బోదకినికి, ఎలాకాలం దేవుణు వెట బత్కిని బత్కు దొహ్క నాను ఇనిక కిదెజ్?”, ఇజి యేసుజ్ పరిక్కు కిజి వెన్బాతాన్.

26 అందెజె వాండ్రు, యూదురి రూలుదు ఇనిక రాస్త మనాద్. బాన్ ఇనిక సద్విజిని?”, ఇజి వెహ్హన్.

27 వాండ్రు, “నీ ప్రబుఆతి దేవుణుదిజ్ నీ పూర్తి మన్నుదాన్, నీ పూర్తి పాణమ్దాన్, నీ పూర్తి సత్తుదాన్, నీ పూర్తి బుద్ధిదాన్ ప్రేమిస్తెజ్”. మరి, “నిజి నీను ప్రేమిసిని లెకెండ్ మహివరిజ్ ప్రేమిన్అ ఇజి రాస్త మనాద్”, ఇజి వెహ్హన్.

28 అందెజె యేసు, “నీను నెగెణ్ వెహ్హి. ఆహె కిఅ. అయావలె నీను ఎలాకాలం దేవుణు వెట బత్కినిలె”, ఇజి వన్ని వెట వెహ్హన్.

29 అయావలె అయా యూదురి రూలు నెస్పిస్సాన్ నీతి నిజాయితి మనికాన్ నాను ఇజి తోరె ఆదెజ్ ఈహు వెన్బాతాన్, “నా పడఃకాదికాన్ ఎయెన్?”, ఇజి.

30 అందెజె యేసు ఈహు మహ్హి వెహ్హన్. “ఒరెన్ యెరూసలెమ్దాన్ డిఃగ్జి యెరికొ పట్నమ్దు సొనివెలె సెగిందార్ ఠొజారి వన్నిజ్ అస్తార్. అస్తారె, వాండ్రు తొడిఃగితి మహికెజ్ లాగితార్. వన్నిజ్ ఇజ్రి పాణం ఇట్టారె డెయితారె డిఃస్త సొహార్.

31 యావలె ఒరెన్ యూదురి పుజెరి ఆ సరిదాన్ సొండ్రెజ్ పణి తాక్తాద్. వాండ్రు వన్నిజ్ సుడఃతాండ్రె పడఃకదాన్ సొహాన్.

32 అయా లెకెండెనె, లేవి* ఒరెన్ ఆ సరిదాన్ నె సొహాన్. గాని వాండ్రుబా సుడేతాండ్రె పడేకదాన్ ఎర్లిజి సొహాన్.

33-34 అయా సరిదాన్ నె ఒరెన్ సమరియ వాండ్రు పయాణం కిజి మహాన్. వాండ్రు అర్తి మని వన్నిజ్ సుడేతాండ్రె వన్ని పాణం నొతాద్. వన్ని డగ్రు సొహాండ్రె ఒలివ ఇని నూనె, ద్రాక్సకల్లు వాక్తాండ్రె వన్ని గాయమ్కాజ్ తోహ్కాన్. వాండ్రు వన్ని సొంత గాడేదె ముస్కు-ఎకిస్తాండ్రె ఉండ్రె లారజి ఇండ్రె సొహాన్. వన్నిజ్ నెగెణ్ సుడేతాన్.

35 మహ్నా నాండిజ్ వాండ్రు రుండి వెండి రుపాయుజ్ లాగితండ్రె లారజి సవ్కారిజ్ సితాన్. సితండ్రె, “వినిజ్ నెగ్రెండ సుడేతా. వినివందిజ్ మరి కర్సు ఆతి మహిజ నాను మర్జి వానివలె అయా డబ్బు నిజి సీన”, ఇజి వన్ని వెట వెప్తాండ్రె సొహాన్.

36 యా కత వెప్తా వీస్తి వెనుక, యేసు వన్నిజ్, “డొజారి అస్తి వన్నిజ్ యా ముఎర్ లొఇ ఎయెన్ పడేకాదికాన్ ఆనాన్, ఇజి నీను వెహ్తా”, ఇజి వెన్బాతాన్.

37 యూదురి రూలు నెన్పిస్సాన్, “వన్ని ముస్కు పాణం నొత్తికాండ్రె, వన్ని పడేకాదికాన్”, ఇహాన్. అందెజె యేసు, “నీను సొన్ని యా లెకెండెనె కిత”, ఇజి వెప్తాన్.

మార్త మరియ

38 యేసు ని వన్ని సీనురు పయనం కిజి సొన్ని మహార్. ఉండ్రె నాటొ సొహార్. అబ్బె మార్త ఇన్ని ఉండ్రె బోదెలి దన్ని ఇండ్రె వన్నిజ్ డగ్రు కిత్రాద్.

39 దనిజ్ మరియ ఇన్ని ఉండ్రె తజిసి మనాద్. అది ప్రబు పాదమ్క డగ్రు బస్తాదె వన్ని బోద వెంజి మహాద్.

40 మార్త విజు పణి వందిజ్ నండొ బాద ఆజి వన్ని డగ్రు వాతాద్. వాతాదె, “ప్రబువా, నాను ఒరెనె పణి కిదెజ్ నా తజి డిస్త మనాద్. నిజి బాద సిల్లెదా? నజి తోడు: కిత ఇజి దనిజ్ వెహ్తా”, ఇజి వెప్తాద్.

* 10:32 10:32 దేవుణుగుడి: రోజు సేవ కిని లేవి జాతిదు మన్నికాండ్రె లేవి ఇనికాన్.

41-42 అందెజె యేసు, “మార్త, నీను నండొ పణిజ వందిజ్ విసారిసి బాద ఆజిని. గాని ముకెలమతిక ఉండ్రె. మరియు అయా నెగ్గి దనిజ్ కోరితాద్. దన్నిబాణిజ్ ఎయెన్బా అయాక లాగ్గి ఒతెజ్ అట్ఎన్”, ఇజి వెప్టాన్.

11

యేసు పార్దనం నెన్పిస్తాన్

1 ఉండ్రె నాండిజ్ యేసు ఉండ్రె బాడిడు పార్దనం కిజి మహాన్. వాండ్రు పార్దనం వీస్తి వెన్కా వన్ని సిసూర్ లొఇ ఒరెన్, “ప్రబువా, యోహాను వన్ని సిసూరిజ్ పార్దనం నెన్పిస్తాన్. అయాలెకెండ్ర్ మజిబా పార్దనం నెస్పిన్అ”, ఇజి వన్నిజ్ వెప్టాన్.

2 అందెజె యేసు వరిజ్, మీరు పార్దనం కినివెలె ఈహు వెప్టు. “ముస్కు మన్ని మా బుబ్బ, లోకుర్ విజెరె నీ పేరు గొప్ప నెగ్గిక ఇజి గవరం సిపిర్. నీను లోకుర్ విజెరిజ్ ఏలుబడి: కిపిన్.

3 రోజు రోజు కావాలిస్తే టిండి మజి సిదా.

4 మజి పాపమ్కు కితి వరిజ్ మాపు సెమిస్తి వజి నీను మా పాపం సెమిన్అ. తప్ప కిబిస్తిసెఇ అసెజ్ మాలోఇ రెవిండ్ర్ మజి ఇడెఅ”, ఇజి వెప్టాన్.

5-6 మరి యేసు వరివెట ఈహు వెప్టాన్. “మీ లొఇ ఒరెన్ వన్నిజ్ ఒరెన్ కూలాయెన్ మనాన్. నీను మదరెయితు వన్నిబాన్ సొన్ని, ‘ఓ కూలవాండ్రు, నజి మూండ్రె రొట్టెజ్ బదలు సిదా. ఎందనిజ్ ఇహిజు, మరి ఒరెన్ కూలాయెన్ పయూణం కిజిని సరిదాన్ నా బాన్ వాత మనాన్. వన్నిజ్ సీదెజ్ నాబాన్ ఇనికబా సిల్లెద్”, ఇజి వెప్టాని.

7 అయాలె వాండ్రు లొఇహాన్, “నజి బాద కిమ. సెహాల కెప్టా మనాద్. నా ఇజ్జి కొణెర్ నా వెట నిద్ర కిజినార్. నిజ్జి సీదెజ్ నాను అట్ఎన్”, ఇజి వెహనండ్రా?

8 నాను మిజి వెప్టాన్, వన్నిజ్ నిజ్జి సీదెజ్ ఇప్టం సిలిజ్బా వాండ్రు నిజ్జి సీనాన్. ఎందనిజ్ ఇహిజు, వాండ్రు కూలాయెన్ ఇజి ఒడిబిజి

అహు కివన్. గాని సిగు డిస్తాండ్రె ఏక ఏక లోసినాన్ ఇజి ఒడిఃబిజి నిజీ కావలస్తిక విజు సీనాన్.

9 అందెజె నాను మిజీ వెహ్సిన, మీరు ఇనిక లోస్సిదెరో, అక్క దేవుణు మిజీ సీనాన్. ఇనిక మీరు రెబాజినిదెరో అక దేవుణు మిజీ సీనాన్. కొత్తు, మీ వందిజ్ దేవుణు సేహ్లా రెనాన్లె.

10 ఎందానిజ్ ఇహిజు, లోస్సి విజెరిజ్ దోహ్కె. రెబాని వన్నిజ్ తోరె ఆజినాద్, కొత్తిని వన్నివందిజ్ సేహ్లా రే ఆనాద్.

11 మీ లోఇ అప్పాసి ఆతికాన్ ఎయెన్బా, వన్ని మరిసి మొయ లోస్తిజు, సరాన్ సీనాండ్రా?

12 కొరు గుడ్డు లోస్తిజు, సోర్కుప్పి సీనాండ్రా?

13 అహిజు, మీరు సెఇకిదెర్ ఆతిజ్బా, మీ కొడోరిజ్ నెగ్గి ఇనాయమ్కు సిదెజ్ నెస్సిదెర్. అహిజు, ముస్సు మన్ని మీ బుబ్బు వన్నిజ్ లోస్సి వరిజ్ ఎసానో దేవుణు ఆత్మ సీనాన్”.

యేసు బయిల్జెబెలు

14 యేసు ఒరెన్ వన్ని బాణిజ్ గుల్ల దెయమ్దిజ్ పేర్జి మహాన్. ఆ దెయం డిఃస్తి సోహి వెన్కా గుల్ల ఆతి మహికాన్ వర్గితాన్. అక సుడఃతారె లోకుర్ విజెరె బమ్మ ఆతార్.

15 గాని వరి లోఇ సెగొండార్, “దెయమ్కాజ్ నెయ్కి ఆతి బయిల్జెబెలు సత్తుదాన్ వీండ్రు దెయమ్కాజ్ పేర్జినాన్ ఇజి వర్గితార్.

16 మరి సెగొండార్ వన్నిజ్ పరిస కిదెజ్ సుడఃతార్. దేవుణునె వినిజ్పోక్త మనాన్ ఇజి రుజుప్ కిదెజ్ ఉండ్రె గుర్తు లెకెండ్రె ఉండ్రె బమ్మ ఆని పణికిజి తోరిన్అ ఇజి వెహ్సార్.

17 వాండ్రు వరి ఆలోసన నెస్తాండ్రె వరి వెట ఈహు వెహ్సాన్, “ఎమేణి దేసెమ్దికార్బా వరిజ్ వారె జటిజ్ ఆజి కేట ఆతిజు పాడాఃనాద్. ఆహె, ఉండ్రె కుటుమ్దికార్బా వరిజ్ వారె జటిజ్ ఆజి కేటఆతిజు, ఆ కుటుం నిల్వద్.

18 అయాలెకెండ్రె సయ్నాను దెయమ్కుబా వరిజ్ వారె జటిజ్ఆజి కేట ఆతిజు, సయ్తాను వరి ముస్సు కిని ఏలుబడిః ఎలాగ

నిల్నాద్? సయ్యాను సత్తుదాన్ నాను దెయమ్కాజ్ పేర్జిన ఇజి మీరు వెప్పినిదెర్ గదె.

19 అహిజ, మీ సొంత లోకుర్ ఇన్ని దని దనటాన్ దెయమ్కాజ్ పేర్జినార్. అందెజె మీ సొంత లోకుర్నె మీరు తప్పిదెర్ ఇజి రుజువ్కిజినార్.

20 నాను దేవుణు సత్తుదాన్ దెయమ్కాజ్ పేర్త మన్నుఇహిజ దేవుణు ఏలుబడిః కినిక మీడగ్రు వాతమనాన్ ఇజి రుజువ్ ఆజినాద్.

21 విజు అయుదమ్కు తొడిఃగిజి ఒరెన్ సత్తుమనికాన్ వన్నిఇల్లు అస్తి విజు కాప్ కితిజ, ఇనికబా సొరిసొన్ఎద్.

22 గాని వినిజ్ మిస్తి నండొ సత్తు మనికాన్ ఒరెన్ వినిజ్ అస్తాండ్రె విని ముస్సు గెలిస్తిజ, వీండ్రు నమ్మితి అయుదమ్కు విజు వాండ్రు లాగ్గి, విని అస్తి సీబాన సీనాన్.

23 నా దరిజ్ మన్ఇకాన్ నజి పగాతికాన్. నా వెట మంద కిఇకాన్, సెద్రిస్నాన్.

24 ఉండ్రె దెయం ఒరెన్ వన్నిజ్ డిఃస్తి సొహి వెనుక, దనిజ్ మండ్రెజ్ బాడ్డి రెబాజి బయిలుదు బూలాజినాద్. గాని ఎంబెబా దనిజ్ బాడ్డి దొహ్కెఇతిజ్, “నాను డిఃస్తి వాతి నా ఇండ్రొ మర్జి సొనాలె”, ఇజి వెప్పిద్.

25 మర్జి వాతిజ్ అది డిఃస్తివాతికాన్ నెగెండ్ సిపాజి సుబ్బరం కిజి ఇల్లు లెకెండ్, నెగెణ్ మనాన్ ఇజి నెస్తాద్.

26 నస్తివలె అది మర్రి సొన్ని దనిజ్ ఇంక సెఇకెజ్ ఆతి మరి ఏడు దెయమ్కాజ్ కూక్కు తనాద్, అవిక్ వన్ని లొఇ సొన్ని అబ్బు కినె. అయవలె వన్ని గతి ముందాహి దన్నిజ్ ముస్సు కన్ణ మనాద్.

27 యేసు యా మాటెజ్ వెప్పి మహివలె, ఆ మంద లొఇ మన్ని ఉండ్రె బోదెలి, “నిజి కాస్తి పొసకితి నీ యాయ అంతు సిల్లి సర్ద మంజనికాద్”, ఇజి డటం వెప్తాద్.

28 అయావలె వాండ్రు, “నిజమనె, గాని దేవుణు మాట వెంజి అయావజ నడిఃని విజెరెబా అంతు సిల్లి సర్ద మంజనికార్”, ఇజి వెప్తాన్.

29 లోకుర్ మరి నండొ కూడిఃతి మహివలె, వాండ్రు ఈహు వెహ్తాన్.
 “యా తరమ్దికార్ నండొ సెఇకార్. వారు ఉండ్రీ గుర్తు లెకెండే ఉండ్రీ
 బమ్మ అని పణి కిఅ ఇజి వెన్బాజినార్. గాని దేవుణు ప్రవక్త ఆతి
 ఓనెజ్ జర్గిదిక ఆఎండ, మరి ఇన్ని గుర్తుబా వరిజ్ తోర్ఎద్.

30 నినవె పట్టమ్దివరిజ్ ఓన ఎలాగ ఉండ్రీ గుర్తు మహండ్రొ
 అయాలెకెండే లోకు మరిసిఆతి నాను యా తరమ్దివరిజ్ ఉండ్రీ గుర్తు
 మనాన్.

31 అక్కరి దినమ్ది తీర్పుదు, దసిణ్ దేసెమ్ది రాణి యా తరమ్ది
 లోకుర్ వెట నిజ్నాదె వరి ముస్కు నేరం మొప్పాద్. ఎండనిజ్ ఇహిజ,
 సొలోమోను వెహ్సిని గెణం మన్ని మాటెజ్ వెండ్రెజ్ బూమి కొసాదు
 మన్ని దని దేసెమ్దాన్ అది వాతాద్. ఏలు సొలోమొనుజ్ మిస్తి
 పెరికాన్ ఇబ్బె మనాన్.

32 కడెవేరి దినమ్ది తీర్పు, నినివె పట్టమ్ది లోకుర్ యా తరమ్ది
 లోకుర్ వెట నిల్నారె, వరి ముస్కు నేరం మొప్పార్. ఎండనిజ్ ఇహిజ,
 ఓన వెహ్తి బోద వెహారె, వారు పాపమ్కు డిసి ఒప్పుకొటార్. ఏలు
 ఓనెజ్ మిస్తి పెరికాన్ ఇబ్బె మనాన్.

ఒడొల్ది దీవందిజ్ వెహ్సినాన్

33 ఎయెర్బా దీవ కసిసి వెనుక డాప్పినొ, తూము ముసిసొ
 ఇడెవర్. గాని లొఇ వానివరిజ్ జాయి తోర్దెజ్ ఇజి దీవ కంతూదుద్నె
 ముస్కునె ఇడ్వార్.

34 నీ ఒడొల్ది దీవ లెకెండె నీ కణుకు. నీ కణుకు నెగ్రెండ మనివలె,
 నిజి విజు సుడెదెజ్ ఆనాద్. అయాకెజ్ సెఇకెజ్ ఆతిజ, నిజి సుడెదెజ్
 అట్ఇ.

35 అందెజె సీకటు మన్ఎండ, నాను నెస్సిన్ని నిజమాతి నజతిజ్
 ఆతి జాయి మీ మన్నుదు మండ్రెజ్ సుడెదు.

36 అందెజె మన్ను పూర్తి అయా జాయిదాన్ నిత్రింతి మహిజ,
 అయాక నాను నెన్పిస్తి వజ, నెగ్రెండ మీరు బత్తిజినిదెర్ ఇజి
 తోర్వాద్. ఉండ్రీ పెరి జాయి నీ ముస్కు డెయితిజ ఎలాగ మంజినాదొ,

అయాలెకెండే అయా జాయి నాను నెస్పిస్తి వజ మీరు బత్తిజినిదెర్ ఇజి తోర్నాద్.

37 యేసు వర్గిజి వీస్తి వెనుక ఒరెన్ పరిసయు వాండ్రు, వన్ని వెట ఉండెజ్ రఅ, ఇజి కూక్తాన్. అందెజె వాండ్రు లోఇ సొహండ్రె ఉండెజ్ బస్తాన్.

38 ఉణి ముజాల వాండ్రు యూదురిజ్ మన్ని అలవాటు వజ కియు నొర్బావీతాన్ ఇజి నెస్తాండ్రె, ఆ పరిసయు వాండ్రు బమ్మతాన్.

39 అందెజె వ్రబు ఈహు వెహ్సాన్, “పరిసయురుజాండె, లోకుర్ మున్సుహాన్ మిడిఃస్తి ఇడ్పి గిన్నెజ్ని సొడువెజ్ లెకెండే మన్నికిదెర్? మీరు మిజిబా వెల్లిహాన్ సుడిఃజు నెగ్గివరి లెకెండే తోర్ ఆజినిదెర్. గాని మీ మన్ను సెఇ బుద్దిజాణిజ్, కకుర్తిదాన్ కూడిఃతి ఆసదాన్ నిండ్రెతి మన్నె.

40 బుద్ది సిలికిదెరా, ఒడొల్ తయార్ కిత్తి దేవుణునె మీ మన్నుదు మన్ని ఆలోసనమ్కు నెసినికాన్

41 మీరు కనికారం ఆజి, మిజి కల్లితి మన్ని లోఇహాన్ సిల్లి వరిజ్ దాన సీదు. అయావలె దేవుణు ఎద్దు నెగ్గికిదెర్ ఆనిదెర్.

42 పరిసయురుజాండె, అబాయా, మిజి ఎసానొ కస్టమ్కు వానెలె. ఎందానిజ్ ఇహిజు, పుదిన, సదాప, విజు కుసెజ్, విజు దనిజ్బా దసం బాగం సీజినిదెర్. గాని మీరు లోకురిజ్ నాయం కిఇదెర్. దేవుణుదిజ్ ప్రేమిన్ఇదెర్. రుండిబా ఉండ్రెలెకెండే కిజి మంజినిక ఇహిజు ఒద్దె నెగ్గెండే మహాద్ మరి.

43 పరిసయురుజాండె, అబాయా మిజి ఎసానొ కస్టమ్కు వానెలె. ఎందానిజ్ ఇహిజు, యూదురి మీటిజ్ ఇల్కాజ్ ముకెలమాతి బాడిఃదు బస్సెజ్ మీరు ఆస ఆనిదెర్. సతెజు నడిఃమి పెరికార్ ఇజి మాడెఃసె ఆదెజ్ కోరిజినిదెర్.

44 పరిసయురుజాండె, అబాయా, మిజి ఎసానొ కస్టమ్కు వానెలె. ఎందానిజ్ ఇహిజు, మీరు తోర్ఇ దూకిలెకెండే మంజినిదెర్. లోకుర్ దూకి ఇజి నెస్ఎండ వన్నా మున్ను నడిఃజినార్.

45 అయావలె యూదురి రూలు నెస్పిస్సాన్ ఒరెన్, “బోదకినికి,

నీను యా లెకెండ్ వెప్పి మజిబా దుసలాడిఃజిని”, ఇజి వెప్తాన్.

46 అందెజె యేను, యూదురు రూలు నెస్పిస్సికిదెరా, అబాయా మిజి ఎసానొ కస్టమ్కు వానెలె. ఎందానిజ్ ఇహిజు, లోకుర్ కిదెజ్ నసా కస్టం మన్ని యూదురి రూలుజ్, అలవాటుజ్ వారు కిదెజ్ ఇజి వెప్పినిదెర్. గాని మీరు వరిజ్ ఉండ్రి డఃడఃస్కు దాన్బా తోడుః కిఇదెర్.

47 యూదురి రూలు నెస్పిస్సికిదెరా, అబాయా మిజి ఎసానొ కస్టమ్కు వానెలె. ఎందానిజ్ ఇహిజు, మీ అనిరిజ్ సప్తి ప్రవక్తరి, దూకిజ్ ముస్సు మీరు గుండమ్కు పెర్జిన్దెర్.

48 అయావలె వారు కితిపణివెట మీరు కూడిఃతి మనిదెర్ ఇజి రుజుప్ కిజినిదెర్. సాక్సిర్లెకెండ్ మనిదెర్ వారు ప్రవక్తరిజ్ సప్తార్. మీరు వరి గుండమ్కు పెర్జినిదెర్.

49 అందెజె, దేవుణు వన్ని గెణమ్దాన్, ‘నాను వరి నడిఃమి ప్రవక్తెజు, అపొస్తుడుజు పోక్కు. వరి లొఱ సెగొండారిజ్ వారు సప్పార్లె. మరి సెగొండారిజ్ మాలెజ్ కినార్లె.

50-51 యా లోకం పుట్టి బాణిజ్ మొదొల్ని లోకుర్ సప్తి విజు ప్రవక్తరి నల్ల వందిజ్ యా తరమ్ది లోకురిజ్ సిక్కు వానాద్. ఇహిజు, ఏబేలు నల దాన్ మొదొల్ని జెకరియ నల దాక. జెక్యెజ్ సంద సుర్ని మాలి పీటని దేవుణు వందిజ్ కేటఆతి గది, దినిజ్ నడిఃమినె సప్తార్. వరిజ్ విజేరిజ్ సప్తికెజ్ విజు యా తరమ్దివరి పణినె ఇజి నాను నిజం మీవెట వెప్పిన.

52 యూదురి రూలు నెస్పిస్సికిదెరా, అబాయా, మిజి ఎసానొ కస్టమ్కు వానెలె. ఎందానిజ్ ఇహిజు, దేవుణు వందిజ్ మన్ని గెణమ్దు నడిఃపిసిని సేహాలది తాలం మీరు అసినిదెర్. మీరు దేవుణుదిజ్ టెటాజ్ నెన్ఇదెర్. దేవుణుదిజ్ నెస్తెజ్ ఆస మన్ని వరిజ్ మీరు అడ్డు కిజినిదెర్.

53-54 వాండ్రు అబెదాన్ సాహి వెనుక, పరిసయిరు యూదురి రూలు నెస్పిస్సికార్ నండొ కోపమ్దాన్ వన్నిముస్సు నేరం మొప్తార్. వన్ని వెయ్దాన్ వాని మాటెజు లొఱ తపుజ్ అస్తెజ్ ఇజి నండొ సజతిజు వందిజ్ ప్రస్సెజ్ వెనబాజి మహార్.

12

1 నన్నీవలె వెయుజ్ వెయుజ్ లోకుర్ కూడఃజి వాతార్. ఒరెన్ దిజ్ ఒరెన్ మట్టె ఆజి మహార్. అయావలె యేసు ముజాలె వన్ని సిసూర్ వెట ఈహు వర్గిదెజ్ మొదొల్స్తాన్. “మాపు నెగ్గికాప్ ఇజి పరిసయరు తోరె ఆని వేసం, పులాని దూరు లెకెండ్ మనాద్. అందెజె జాగర్త మండ్రు.

2 డాఃప్తిక మన్నికెజ్ విజు తోరెఆనెలె. నెన్ ఏండ ముస్కు మన్నికెజ్ విజు నెసె ఆనెలె.

3 అందెజె మీరు సీకటుదు వర్గితికెజ్ జాయిదు వెనార్. ఇహిజ, డాజ్ జి వర్గితికెజ్ విజెరె వెనార్లె. మీరు గదిజ, గిబ్బుదు వర్గితిక మెడెజ ముస్కు సాట్నార్లె.

4 నా కూలెజాలె మీ వెట వెహ్సిన, ఒడొల్ దిజ్ సప్తి వెనుక మరి ఇనికబా కిదెజ్ అల్ ఇ వరిజ్ తియెల్ ఆమాట్.

5 గాని మీరు ఎయెరిజ్ తియెల్ ఆదెజ్ ఇజి నాను నెన్ పిస్సు ఒడొల్ దిజ్ సప్తి వెనుక, ఎలాకాలం మంజిని బాడిఃదు పొక్తెజ్ అతికారం మన్ని వన్నిజ్ తియెల్ ఆదు. నిజమె నాను వెహ్సిన, వన్నిజ్ తియెలాదు.

6 అయ్దు పంట పొటిజ రుండి కాసుదిజ్ పొన్ నార్ గదె? గాని వన్కాలో ఇ ఉండ్రె దనిజ్ బా దేవుణు పోన్ ఎన్.

7 మీ బురాది కొప్పు విజుబా దేవుణు లెకిస్త మనాన్. తియెలామాట్. మీరు నండొ పంట పొటిజ మిస్తి విలువ మన్నికిదెర్.

8 నాను మిజి వెహ్సిన, లోకుర్ ముజాలెనజి ఒప్పకొణి ఎయె వన్నిజ్ బా లోకుమరిసి ఆతి నాను దేవుణు దూతెజ ఎద్రు ఒప్పకొణా.

9 గాని లోకుర్ ఎద్రు నజి నెన్ ఎ ఇన్ని వన్నిజ్ దేవుణు దూతెజ్ ఎద్రు నాను బా నెన్ ఎ ఇజి వెహ్సా.

10 లోకుమరిసి ఆతి నా ముస్కు ఎయెన్ బా పడః ఇ మాట వర్గితిజ, దేవుణు వన్నిజ్ సెమిస్నాన్. గాని దేవుణు ఆత్మదిజ్ దూసిస్సి ఎయెరిజ్ బా దేవుణు సెమిన్ ఎన్.

11 వారు మిజి యూదురి మీటిజ్ ఇల్కాణిజ్ యూదురి అతికారిజ ఎద్దునో, పెద్దల్జ ఎద్దునో ఒనార్. అయావలె ఎలాగ మర్జి వెప్తాజ్, ఇనిక వెప్తాజ్, ఇనిక వర్గిదెజ్ ఇజి బెజఆమాట్.

12 ఎందానిజ్ ఇహిజ, మీరు వర్గిదెజ్ మనిక అయా గడిఃయద్నె దేవుణు ఆత్మ మిజి నెన్పిస్సాన్.

ఆస్తివన్ని బుద్ధిసిల్లి వన్నివందిజ్ నెన్పిసిని కత

13 అయావలె ఆ మందలోఇ ఒరెన్, “బోదకినికిదా, నా బుబ్బు గణస్తి దనిజ్ నజి వానివంతు సీబాజి సిఅ ఇజి నా అన్నెజ్ వెహాఅ”, ఇజి వెప్తాన్.

14 అయావలె యేసు, “ఒరె, మీ ముస్సు తీర్పు కిని వన్ని వజనో, సీబాజి సీని వన్ని వజనో నజి ఎయెన్ నిల్ప్తాన్?”, ఇజి వెప్తాన్.

15 మరి వరిజ్ వెప్తాన్, “జాగర్త మండ్రు. ఇని దనిజ్ బా లావుఆసెజ్ ఆమాట్. ఎందనిజ్ ఇహిజ, ఎసా ఆస్తిమన్నికాన్ ఆతిజ్ బా, వన్ని ఆస్తిలోఇ వన్ని బత్సు ఆవద్. ఇహిజ ఆస్తివన్నిజ్ నిజమాతి బత్సు సివద్.

16 మరి వాండ్రు వరిజ్ కతవజ ఈహు నెన్పిస్సాన్. “ఒరెన్ ఆస్తి మనివన్నిజ్ బూమిదు నండో పంట పండితాద్.

17 అయావలె వాండ్రు, ‘నా గింజ ఇడదెజ్ నజి బాడ్డి సాల్ఎద్. అందెజె ఇనిక కిదెజ్?’, ఇజి వన్నిమన్నుదు వాండ్రు ఒడిఃబితాన్.

18 ఒడఃబితాండ్రె, ‘నాను ఈహుకిన. నా గాదిజ్ లాగ్గి పెరికెజ్ కిన. అబె నా గింజెజ్, మహి సామానమ్ కుజ్ విజు ఇడ్జు’, ఇజి వెప్తాన్.

19 మరి నాను, నా వెట ఈహు వెహ్పా, ‘నజి నండో పంటెజ్ వందిజ్ నండో ఆస్తి కుడుఃప్త మన్ను. సుకం ఆఅ. ఉణఅ, తిన్అ, సర్ద ఆజి మన్అ’, ఇజి.

20 గాని దేవుణు వన్నిజ్, ఓ బుద్ధి సిలికి, యా రెయునె నీ పాణం లోసిన. అయావలె నీ వందిజ్ ఇడ్డి మనికెజ్ ఎయెరిజ్ ఆనెలె? ఇజి

21 సొంత బత్తు వందిజ్ ఆస్తి కుడుఃప్పి ఎయెరిజ్బా యా లెకెండ్ వానాద్. గాని, దేవుణు ఎద్రు, దేవుణుదిజ్ ఇస్టం ఆనివజ వాండ్రు ఆస్తిమనికాన్ ఆవన్”.

ఇని దనిజ్బా విసారిస్మాట్.

22 మరి, యేసు వన్ని సిసూర్వెట ఈహు వెప్పిసాన్, “అందెజె, నాను మిజి వెప్పిసాన్, మీరు ఇనిక ఉండెజ్ ఇజి పాణం వందిజ్ విసారిస్మాట్. ఇనిక తొడెగిదెజ్ ఇజి ఒడెఃల్వందిజ్ విసారిస్మాట్.

23 ఎందానిజ్ ఇహిజ, టిండి ముస్కు పాణం ముకెలమతిక. సొక్కెజ్ ముస్కు ఒడెఃల్ ముకెలమతిక.

24 కాకిజవందిజ్ సుడెఃదు. అవి విత్ఉ, కొయిఉ, వన్కాజ్ గాదెనొ గప్పెజ్నొ సిల్లు. గాని దేవుణు వన్కాజ్ తిండి సీజినాన్. అహిజ పొటిజ ముస్కు మీరు ఎసా విలువ మనికెదెర్.

25-26 మీ లొఇ ఎయెన్బా విసారిసి వన్ని బత్తుదిజ్ ఉండ్రీ గంటబా కుడుఃప్పి మీ వయ్సు పిరిప్పెజ్ అట్నిదెరా? అట్ఇదెర్. యా ఇజి పణికిదెజ్ మీరు అట్ఇదెర్ ఇహిజ మరి ఎందనిజ్ మహి పెరి నజతిజ వందిజ్విసారిస్మిదెర్.

27 పూజదిజ్ సుడెఃదు. అవి కస్టబడిఃఉ. సొక కిదెజ్ నూలుజ్ తయార్ కిఉ. ఆజ్బ విజు ఆస్తి కలిగితి మన్ని సొలోమెన్రాజు యా ఉండ్రీ పూజలెకెండ్ సొకు మన్ని ఉండ్రీ సొక్కె తొడిఃగివితాన్ ఇజి నాను మిజి వెప్పిసాన్.

28 నేండ్రు మంజి విగెహిజ్ సిసూదు విసిర్ని మడిఃజ మంజిని గడ్డిదిజ్ యా లెకెండ్ దేవుణు సొకు సితాన్, ఇహిజ ఇజిరి నమకం మన్నికిదెరా మరి ఒద్దె నెగెండ సొకెజ్ మిజిసొక్కెజ్ తొడిఃగిన్పివండ్రా?

29 ఇనిక ఉండెజ్, ఇనిక తిండ్రెజ్ ఇన్ని దనిజ్ ఎత్తు కిజి విసారిస్మాట్.

30 ఎందనిజ్ ఇహిజ, దేవుణుదిజ్ నెన్ఇకార్నె విన్క వందిజ్ రెబాజినార్. మిజి యాకెజ్ కావాలె ఇజి మీ బుబ్బాతి దేవుణు నెస్సాన్.

31 గాని దేవుణు మిజి ఏలుబడిః కినాన్ ఇజి ఆనఆదు. అయావలె దేవుణు మిజి కావాలిస్తికెజ్ విజు సీనాన్.

32 ఇజిరిమంద తియోల్ ఆమాట్. దేవుణు, వన్నిబత్తుదు రాజులెకెండ్ ఇట్టి వరిజ్ నెగ్గెకెజ్ సీదెజ్ మీ బుబ్బ ఇస్టంతత మనాన్.

33 మిజీ కల్లితి మనికెజ్ పొర్చి బీదవరిజ్ సీదు. అయావలె మీరు దేవుణు మంజిని బాడిందు మీ వందిజ్ ఆస్తిగణస్సిదెర్. అబ్బె డోజారి రవన్. కరి తిన్ఎద్. అందెజె మీ ఆస్తితకు ఆవద్.

34 ఎందనిజ్ ఇహిజ, మీ ఆస్తిఎంబె మనాదొ, అబెనె మీ మన్నుబా మంజినాద్.

35-36 ఎస్తివలెబా పణికిదెజ్ నడుఃము తొహె ఆజి, తయార్ఆజి మండ్రు. మీ దీవెజ్ ఎస్తివలెబా కసిసి మండ్రు. పెండ్లి విందుదాన్ ఇండ్రొ వాజిని ఎజుమానిజ్ ఎర్దు సుడఃజి మంజిని పణిమణిసిర్ పొలిసి మండ్రు. ఎజుమాని విందుదాన్ వాజి సేప్లా కొత్తివెలె వెటనె సేప్లా వాండ్రు రేనాన్. నన్నివరిజ్ పొలిసి మండ్రు.

37 ఎజుమాని వాతివెలె, వన్ని వందిజ్ తెలి మంజి ఎర్దు సుడఃజి మంజిని పణిమణిసిరిజ్ నెగెద్. నిజమె నాను వెప్పొన, ఎజుమాని, నడుఃము తొహె ఆజి, బోజెనమ్దిజ్ వాతి వరిజ్ బనె కిజి వరిజ్ తిండి సీనాన్.

38 మదరెయితునొ కోడిజామ్నొ ఎజుమాని వాతివెలె, వన్నివందిజ్ ఎర్దు సుడఃజి తెలి మంజిని వన్నిజ్ నెగెద్.

39 ఎమేణి గడియదు డోజారి వానాన్ ఇజి ఇండ్రొణి ఏజుమాని నెస్తిజి వాండ్రు తెలిమంజి వన్నిఇల్లు బొరొ కివిండ సుణాన్ ఇజి మీరు నెస్టు.

40 మీరు నా వందిజ్ ఎర్దు సుడఃజి గడ్డియారు, లోకు మరిసి ఆతి నాను వాన. అందెజె మీరు బా తయార్ ఆజి మండ్రెజ్ వెలె.

41 అయావలె పేతురు, “ప్రబువా, యా కతవజ మజినె నెన్పిస్సిదా, విజెరిజ్ నెన్పిస్సిదా?”, ఇజి యేసుజ్ వెన్బాతాన్.

42 అందెజె యేసు, “నమకం మని, బుద్దిమని గొత్తి మణిసి ఎయెన్? ఎయెన్ ఇహిజ, ఇండ్రొణి మహి గొత్తియారిజ్ సరిఆతి గడ్డియా సుడఃజి వరి కార్డువజ వరిజ్ దొహ్క మన్ని తిండి సామనమ్కు సీదెజ్ ఇజి ఎజుమాని వరిముస్కు ఏర్పాటు కిత్తికాండ్రె.

43 ఎజుమాని మర్జి వానివలె వెహ్తావజ పణికితి వన్నిజ్ నెగెద్.

44 అయ ఎజుమాని వన్నిజ్ కల్లితి మన్ని విజు దనిముస్సు అతికారం మని వన్నిలెకెండ వన్నిజ్ కినాన్, ఇజి నాను నిజం వెహ్సిన.

45-46 గాని, ఉండ్రీ వేల యా గొతియయెన్, 'నా ఎజుమాని వాదెజ్ ఆల్సెం ఆజినాన్' ఇజి వన్నిమస్సుదు ఒడిబిజి, మహి గొతియారిజ్ గొతియాణికాజ్ డెయిజినాన్. వాండ్రు ఉణిజి, తింజి సొస్త మహాన్. ఆహా మహిజ్, వాండ్రు ఎద్రు సుడెఱ దినమ్దు నెన్ ఇ గడియాదు వన్ని ఎజుమాని వానాన్. అయావలె వాండ్రు వన్నిజ్ కత్తి దేవుణుదిజ్ నమ్ ఇ వరివెట వరి వందిజ్ తయార్ కిత్తిమన్ని బాడ్డిదు పొక్నాన్.

47 ఎజుమాని ఇస్టమ్కు నెసిబా అయావజ కిఎండ తయారాజి మన్ఎండ మన్ని గొతియ వన్నిజ్ నండొ సిక్సినాన్.

48 ఎజుమాని ఇస్టమ్కు నెన్ఎండ, సిక్సదిజ్ తగితి పణిజ్ కితి వరిజ్ కండెక్ సిక్సనె సినాన్. ఎయెరిజ్ దేవుణు నండొ సిత్త మనాండ్రొ వన్నిబాణిజ్ నండొ లొస్నాన్. ఎయెన్బాన్ దేవుణు మరి నండొ ఒపజెప్త మనాండ్రొ, వన్నిబాణిజ్ నండొనె లొస్నాన్.

49 సిసు లెకెండ మన్ని దేవుణు సీని సిక్స యా లోకమ్దు తత్తెజ్ నాను వాతమన. ఆక విజెరిజ్ సుర్నాద్. ఏలునె సురుదెజ్ మొదొల్స్తిజ బాగ మంజినాద్, ఇజి ఆస ఆజిన.

50 కస్టం ఇని ఉండ్రీ బాప్తినంబా లాగెఆదెజ్ మనాద్. ఆక్క పూర్తి కినిదాక నజి నండొ విసారం మంజినాద్లె.

51 యా లోకమ్దు సమాదనం తత్తెజ్ నాను వాతమన్న ఇజి మీరు ఒడిబిజినిదెరా? సిల్లె, కేటకిదెజ్నె వాత మన్న.

52 ఏలుదాన్ అయ్దుగురు మంజిని ఉండ్రీ కుటుం వరిజ్ వారె కేట ఆనార్లె. మువీర్ ఉండ్రీ పడెకాద్ రివీర్ మరి ఉండ్రీ పడెకాద్.

53 వారు కేట ఆనార్లె. అప్సొసి మరిసిజ్ని, మరిసి అప్సొసి జ్ని, అయిసి గాల్పిజ్ని, గాడ్లి దని అయ్సిజ్ని, మీమ్సి దన్ని కొడెసిజ్ని, కొడెసి దన్ని మీమ్సిజ్ని పడిఎండ మంజినాద్లె.

54 అయావలె వాండ్రు మందలోకుదిజ్ ఈహు వెహ్తాన్, "పడెమటదాన్ మొసాప్ వాతిక సుడెఱిజ పిర్లు వానాద్లె, ఇజి

మీరు వెహ్నిదెర్. ఆహె జర్గినాద్.

55 దసిణదాన్ గాలి వాతిజ గొప్పఎండ కినాద్ ఇజి వెహ్నిదెర్. ఆహె జర్గినాద్.

56 వేసం కినికిదెరా, మీరు బూమిదు ఆగాసమ్దు జర్గినికెజ్ సుడేజి గుర్తు అసైజ్ నెస్సిదెర్. మరి ఎందానిజ్ యా కాలమ్దు జర్గినికెజ్ గుర్తు అసైజ్ మీరు అట్వండ మంజినిదెర్?

57 ఎమేణిక నాయం ఇజి మిజి మీరె తర్పు కిదెజ్ అట్ఇదెరా?

58 మీ ముస్కు నేరం మొప్తివన్నివెట లాయిరి కోర్టుదు సొన్ని మహివలె సర్దు వన్ని వెట రాజినం ఆదెజ్ సుడేదు. సిలిజ, వాండ్రు మిజి తీర్పు కిని వన్ని డగ్రు ఈడిసి ఒనాన్. తీర్పు కినికాన్ జమాన్జ ఒవజెప్పాన్. వాండ్రు మిజి జెలిదు ఇడ్పాన్.

59 తీర్పు కినికాన్ లొస్సి డబ్బు విజు సీనిదాక జెలిదాన్ వెల్లి వాదెజ్ అట్ఇదెర్ ఇజి నాను మిజి వెహ్నిన.

13

పాపం డిసిసిదు, సిల్లిజ నాసనం వానాద్

1 అయావలె బాన్ మహికార్ సెగొండార్ యేసుజ్, గలీలియాతి సెగొండార్ వరిజ్ వెహ్నార్. ఇనిక వెహ్నార్ ఇహిజ, గలీలియాతికార్ పూజ కిజి మహివలె, పిలాతు వరిజ్ సపిస్తాన్. అయావలె పూజసిత్తి నలని లోకుర్నల కూడితాద్.

2 అందెజె యేసు వరిజ్, "వరిజ్ సప్తారె యా లెకెండ నండొ బాదెజ్కితార్. అందెజె వారు మహి గలీలియాతి వరి విజెరె ఇంక నండొ పాపం కితికార్ ఇజి మీరు ఒడేబిజినిదెరా?

3 సిల్లెద్ ఇజి మీవెట వెహ్నిన. గాని మీరు పాపమ్కు డిసిసిదు. సిల్లిజ, మీరు విజిదెరెబా అయాలెకెండ నాసనం ఆనిదెర్.

4 మరి సుడేదు, సిలొయొము ఇని పట్టుమ్దు నిరిండ తొహ్తిమన్ని గుడి: అర్తిజ్, యెరూసలెమ్దు బత్తిజి మహికార్ పద్వనిమితి మణిసి సాతార్. వారు బత్తిజిని వరి ఇంక నండొ సెఇకార్ ఇజి మీరు ఒడిబిజినిదెరా?

5 సిల్లె ఇజి నాను మీ వెట వెహ్నిన. గాని మీరు పాపం డిసి సీదు. సిలిజ, మీరుబా అయాలెకెండ్ నాసనం ఆనిదెర్.

6 మరి వాండ్రు కతవజ ఈహు నెన్పిస్తాన్. ఒరెన్ వన్నిజ్ ద్రాక్కు టోట మనాద్. అబ్బె వాండ్రు బొడెమరాన్ ఉండ్రీ ఉణుస్తాన్. వాండ్రు దన్నిపట్టు రెబాతివెలె ఇనికబా దొహ్కెతాద్.

7 అందెజె వాండ్రు, 'ఇదిలో నాను మూండ్రీ పంటెజాణిజ్ యా మరాతి పట్టుజ్ రెబాజి వాజిన. గాని ఇనిక బా దొహ్కెతాద్. దినిజ్ కత్తి విసీర్అ. దిన్నిదనాట్ యా బూమి ఎందనిజ్ పాడాడెజ్?', ఇజి టోట కాప్కిని వన్నివెట వెహ్నాన్.

8 అందెజె వాండ్రు, "బాబు యా ఉండ్రీ ఏంటు మనిద్. నాను సుటులం కార్సి గతం పొక్కి సూణాట్.

9 అక్కవట్టు అస్తిజ నెగెద్, అన్ఇజి కత్తి విసీర్అ", ఇజి వెహ్నాన్.

విస్త్రాంతిదినమ్దు నడుఃము వజీతి ఉండ్రీ బొదెలిదిజ్నెగెణ్కిజినాన్

10 ఉండ్రీ విస్త్రాంతిదినమ్దు, యేసు ఉండ్రీ యూదురి మీటిజ్ ఇండ్రొ బొద కిజి మహాన్.

11 అబె పద్ఎనిమితి పంటెజాణిజ్ నడుఃము వక్కి దెయం అస్తి ఉండ్రీ బొదెలి మహాద్. దన్ని నడుఃము వజీతిజ్, అసల నెగెణ్ నిల్దెజ్ అట్ఎద్.

12 యేసు దనిజ్ సుడఃతాండ్రె, "రఅ", ఇజి డగ్రు కూక్తాన్. మరి, "బీబి, నిజి మన్ని కస్టమ్కాణిజ్ నాను డిఃన్పిస్త", ఇజి దనిజ్ వెహ్నాన్.

13 మరి దనిముస్కు వన్ని కికు ఇట్టాన్. వెటనె అది నెగెణ్ నిహదె, దేవుణుదిజ్ పొగిడితాద్.

14 విస్త్రాంతి దినమ్దు యేసు నెగెణ్ కితిజ్, యూదురి మీటిజ్ఇండ్రొణి అతికారి నండొ కోపం ఆతాన్. ఆతాండ్రె, లోకురిజ్పణి కిదెజ్ ఆరు దినమ్కు మనె. అందెజె మీరు ఆ దినమ్కు లొఇ వాజి నెగెణ్ ఆదు. విస్త్రాంతి దినమ్దు రమాట్", ఇజి వెహ్నాన్.

15 అందెజె యేసు, "ఓ వేసం కినికిదెరా, మీ లొఇ విజిదెరెబా మీ డాఃసుదిజ్, మీ గాడఃదెదిజ్ విస్త్రాంతి దినమ్దు సాలాదాన్, డిఃసి ఒసి ఏరు సీజినిదెర్ గదె?

16 అహిజ, అబ్రాహముజ్ తెగ్గతి యా బోదెల్దిజ్ వద్‌ఎనిమితి పంటజ్ నయ్తాను తొవ్తా ఇట్టా మనాన్. విస్త్రాంతి దినమ్‌దు దనిజ్ తొహ్కొక్కి బాణిజ్ డిస్‌పిస్టెజ్ కూడెదా?”, ఇజి వరిజ్ వెహ్నాన్.

17 వాండ్రు యా మాటెజ్ వెప్తావలె వన్ని పగాతికార్ విజెరె సిగు ఆతారె, మొకొం డిప్తార్. గాని లోకుర్ విజెరె వాండ్రు కితి గొప్ప పెరిపణిజు వందిజ్ సర్ల ఆతార్.

18 మరి యేసు వన్ని లోకురిజ్, “దేవుణు వన్ని లోకురిజ్ కిని ఏలుబడిః ఇన్ని దనిజ్ పోలిత మనాద్. ఇనిదనివెట నాను పోలిన్లు?

19 అక్కసర్‌ను గింజదిజ్ పోలిత మనాద్. ఒరెన్ ఆక ఒతండ్రె వన్ని టోటాదు ఉణుస్తాన్. ఆక పిరిసి మరాన్ ఆతాద్. ఆగాసం ముస్కు ఎగ్రిజిని పొటిజ్ దనికొమెజు ముస్కు గూడుక్ తొహ్కొక్కి, ఇజి వెహ్నాన్.

20 మరి వెహ్నినాన్, “దేవుణు వన్ని లోకురిజ్ కిని ఏలుబడిః ఇని దని వెట పోలిత మనాద్?

21 అక్క పులాని దూరుదిజ్ పోలిత మనాద్. ఉండ్రె బోదెలి అక్కఒతాదె మరి నండొ దూరు వెట కలప్తాద్. వాక్కి దూరుదిజ్‌బా పులాజ్ కితాద్.

ఇహ్కు సరి

22 యేసు యెరూసలెమ్‌దు సొండ్రెజ్ ఇజి పయాణం కిజి మహివలె సరి పడెకాద్ మన్ని నాహ్కొజ్ పట్టుమ్‌కాజ్ బోదిసి మహాన్.

23 అయావలె ఒరెన్, “ప్రబువా, సెగొండారె దేవుణు సిక్కుదాన్ తప్తె ఆనారా?”, ఇజి వెన్‌బాతాన్.

24 అందెజె వాండ్రు వరిజ్, “ఇహ్కు దార్‌బందరం దాన్ డుగ్‌దెజ్ నండొ కస్టబడిఃదు. ఎందనిజ్ ఇహిజు, నండొండార్ సొండ్రెజ్ సుడెఃజినార్. గాని వారు సొండ్రెజ్ అట్‌ఎర్ ఇజి మీ వెట వెహ్నినాన్.

25 ఇండ్రొణి ఎజుమాని నిజ్‌జి సేప్లా కెహ్‌తి వెన్కా మీరు వెల్లినిల్లి, సేప్లా కొత్తి “బాబు, మజి సేప్లా రేఅ”, ఇజి వెహ్నినిదెర్. అయావలె వాండ్రు, “మీరు ఎమేణికిదెరో నాను మిజి నెన్‌వ”, ఇజి వెహ్నాన్.

26 అందెజె మీరు, “ని వెట మాపు ఉణిజి, తింజి మహాప్. నీను మా వీదిజు బోదిస్తిగదె”, ఇజి వెహ్నినిదెర్.

27 గాని వాండ్లు, “మీరు ఎమేణికిదెరో, మిజీ నాను నెన్ఎ. సెఇపణి కిని మీరు విజిదెరో, నా బాణిజ్డిసి సొండ్రు”, ఇజి వెహ్నాన్”, ఇజి వెహ్నాన్.

28 మరి వాండ్లు, “అబ్రాహము, ఇస్సాకు, యాకోబురిజ్ విజెరె ప్రవక్తరు దేవుణు మంజిని బాడిడు వాండ్రు ఏలుబడి: కినివెలె మంజినిక సుడేజినిదెర్. గాని వాండ్రు మిజీ వెల్లి కినాన్. అయావలె, మీరు అడఃబాజి, పల్కు కొహ్కీ ఎలాకాలం సిసు మంజిని బాడ్డిడు మంజినిదెర్.

29 మరి, దేవుణు మంజిని బాడిడు వాండ్రు ఏలుబడి: కినివలె, తూర్పుదాన్ పడఃమటదాన్, ఉస్సన్దాన్, దసిణదాన్ నండో యూదురు ఆఇకార్ వాజి వింతుడు బస్సార్.

30 ఇదిలో, పెరికాప్ ఇజి ఒడఃబితికార్ ఇజ్రికార్ ఆనార్. తగిజి మహికార్ ముజుల్ ఆనార్”, ఇజి వెహ్నాన్.

యేసుయెరుసలేంవందిజ్ దూకమాజినాన్

31 అయావలెనె, సెగొండార్ పరిసయ్దు వాతారె, “నీను ఇబ్బెణిజ్ సోసి సొన్అ. హెరోదు నిజి సప్తెజ్ సుడఃజినాన్”, ఇజి యేసుజ్ వెహ్నార్.

32 అందెజె వాండ్రు, “మీరు సొన్ని ఆ పాడు కిని నక్కవెట ఈహు వెప్తు. “నాను నేండ్రు, విగెహిజ్, దెయమ్కాజ్ పేర్జి, కస్టమ్దివరిజ్ నెగెణ్ కిజి, ముఎహి, దినమ్దు పూర్తి కిన.

33 గాని నాను నేండ్రు, విగెహిజ్, ముఎహిజ్ నా సరిదు నాను సొండ్రెజ్వెలె. ఎందానిజ్ ఇహిజ, ప్రవక్త యెరుసలేమ్దిజ్ వెల్లి సాదెజ్ అవన్.

34 ఓ యెరుసలేమ్దు మనికిదెరా, మీరు ప్రవక్తరిజ్ సప్తిదెర్. మీ డగ్రు దేవుణు పొక్తి వరిజ్ పణకాణిజ్ డెయితిదెర్. కొరు దన్నిపిల్లెకాజ్ దన్నిరెక్కెజ్ అడిగి ఎలాగ ఇడ్నాదో, అయావజ మిజీ డగ్రు కిదెజ్ ఎసోడే సుట్కు నాను ఆస ఆత, గాని నిజి ఇస్టం సిల్లెండ మహాద్.

35 ఇదిలో, దేవుణు వన్ని గుడిఃడిసి సొనాన్లె. ప్రబు సిత్తి అతికారమ్దాన్ వాతికాన్ పొగ్డఃఆనికాన్* ఇజి మీరు వెహ్నిదాక

* 13:35 13:35 కీర్తన 118:26.

మీరు నజీ తొడదెర్ ఇజి మీ వెట వెహ్నిన.

14

యేసు పరిసయ్ ఇండ్రో బోజెనమ్దిజ్ సాన్సినాన్

1 ఉండ్రి విస్త్రాంతి దినమ్దు, యేసు పరిసయరు అతికారిజ ఒరెన్ వన్ని ఇండ్రో బోజెనమ్దిజ్ సాహాన్. అయావలె యేసు ఇనిక కినాండ్రో ఇజి వారు బాగసుడేజి మహార్.

2 నస్తవలె కిక్కుకాలుక్ వాస్తికాన్ ఒరెన్ వన్ని ఎద్రు మహాన్.

3 యేసు”, విస్త్రాంతి దినమ్దు నెగెణ్ కినిక మీ యూదురిజ్ రూలుజ్ తప్పికాదా సిలికాదా?”, ఇజి పరిసయరుజని యూదురి రూలు నెస్పిస్సివరిజ్ వెన్బాతాన్.

4 గాని వారు అలెత మహార్. అందెజె యేసు అయా జబుది వన్నిజ్ డగ్రు కూక్తాండ్రె, నెగెణ్ కితాండ్రె పోక్తాన్.

5 వెనుక వాండ్రు వరిజ్, “మీ లొఇ ఎయెది బా గాడేదె గాని కోడిః గాని విస్త్రాంతి దినమ్దు గుటాద్అర్తిజ, దన్నిజ్ వెటనె వెల్లి లాగ్ఇదెరా?”, ఇజి వెన్బాతాన్.

6 యా మాటెజ్ వారు మర్జి వెహ్తాజ్ అట్వితార్.

7 వాతి కాలెజ్, విందుదు ముకెలమాతి బాడిజ్ సుడేజి బాన్ బస్తిక సుడేతాన్. సుడేతాండ్రె కతవజ ఈహు నెస్పిస్టాన్.

8-9 ఎయెన్బా పెండ్లి విందుదిజ్ మిజి కూక్కివెలె, పెరికార్బస్సిబాడిదు బస్మాట్. ఉండ్రి వేలా మిజి ఇంక పెరివన్నిజ్ వాండ్రు కూక్తాన్సు. వాండ్రు వాతిజ, మీ రిఎరిజ్ కూక్తికాన్ వాజి నిజి, “ఇదిలో, నీ బాడ్డిః వినిజ్ సిఅ”, ఇజి వెహ్నాన్. నస్తవలె మీరు సిగు ఆజి వెన్కాహి బాడిదు బస్తెజ్ సానిదెర్.

10 అందెజె మిజి ఎయెన్బా కూక్తిజ, మీరు సొన్ని వెన్కాహి బాడిదు బస్తు. అయావలె మిజి కూక్తికాన్ వాజి, “కూలాయెన్ నీను పెరికార్బస్సి బాడిదు సొన్ని బన్అ”, ఇజి వెహ్నాన్. అయావలె నీ వెట బస్తవరి ఎద్రు నిజి గొప్ప గవరం వానాద్.

11 వన్నిజ్ వాండ్రె పెరికాన్ ఇజి ఒడోబిని ఎయె వన్నిజ్ బా దేవుణు ఇజ్రికాన్ కినాన్. వన్నిజ్ వాండ్రె ఇజ్రికాన్ ఇజి తగిజి ఒడోబిని ఎయె వన్నిజ్ బా దేవుణు పెరికాన్ కినాన్.

12 మరి, యేసు వన్నిజ్ విందుదిజ్ కూక్తి వన్నివెట, “నీను విందు కిదెజ్ ఇహిజ, నీ కూలెజనో, నీ అన్నారిజ్నో, నీ నేస్తమ్కాజ్నో, నీ పడోకాద్ మన్ని సంసారిజనో కూక్తు. ఎందనిజ్ ఇహిజ, ఉండ్రీ వేలా వారు నిజి మర్జి కూక్వార్. అయావలె నీను కిత్తిదన్నిజ్ వారు మర్జి కిజినార్.

13 అందెజె నీను విందు కినివెలె, బీదాతి వరిజ్, నీర్సమ్దివరిజ్, సొటవరిజ్, గుడ్డివరిజ్ కూక్అ.

14 ఎందనిజ్ ఇహిజ, మిజి మర్జి సీదెజ్ వారు అట్ఎర్. అందెజె దేవుణు మిజి దీవిస్నాన్లె. దేవుణు తీర్పు కిని దినమ్దు నీతి మన్ని విజు లోకురివెట నీను సాజి మర్జి నిజ్ని వెలె, నీను కితి నెగ్గి పణి వందిజ్ దేవుణు మిజి మర్జి సీనాన్.

పెరివిందు వందిజ్ వెహ్సినాన్

15 వన్ని వెట ఉండెజ్ బస్తిమహి వరిలోఇ ఒరెన్ యాక విహండ్రె, యేసుజ్, “దేవుణు ఏలుబడిః కినిక టెటాజ్ సూణివెలె, విందుద్ ఉణికాన్ అంతు సిల్లి సర్ద మంజినికాన్ ఆనాన్లె”, ఇజి వెహ్సాన్.

16-17 అందెజె యేసు ఈహు వెహ్సాన్. “ఒరెన్ విందు కిదెజ్ ఇజి వన్ని నండో కూలెజ కబ్బుజ్ పోక్వార్. విందు తయార్ ఆతిజ్, వన్ని పణిమణిసిజ్ కూక్వండ్రె, “ఉండెజ్ రదు. విజు తయార్ ఆతె ఇజి కబ్బు కిత్తివరిజ్ సొన్ని వెహ్సాన్”, ఇజి పోక్వాన్.

18 గాని కూలెజ్ ఉండ్రె లెకెండ్ పణిజ్ వెహ్సా తప్రె ఆతార్. మొదోహికాన్, “నాను ఉండ్రీ మడిజ్ కొట మన్న. నాను అయక సొన్ని సుడోదెజ్ వెలె, నజి సెమిన్అ ఇజి బతిమాల్జిన”, ఇజి వెహ్సాన్.

19 మరి ఒరెన్, “నాను అయ్దు సెర్కు డాను కొట మన్న. ఆకెజ్ నెగెణ్ మనెనో సిలెనో ఇజి సుడోదెజ్ సొన్నిన. నజి సెమిన్అ, ఇజి బతిమాల్జిన”, ఇజి వెహ్సాన్.

20 మరి ఒరెన్, “నాను ఏలు పెండ్లి ఆత మన్న. అందెజె వాదెజ్ అట్ ఏ”, ఇజి వెహ్లాన్.

21-22 పణిమణిసి మర్జి వాతండ్రె, యా మాటెజ్ వన్ని ఎజుమానిజ్ వెహ్లాన్. అయావలె అయా ఇండ్రె ఎజుమాని కొపం ఆతండ్రె, “నీను పట్నమ్క వీదిజు, సందిజు బేగి సొన్ని బీదాతి వరిజ్, నీర్నమ్ది వరిజ్, సొటాది వరిజ్, గుడ్డి వరిజ్ కూక్కి తగ్ అ”, ఇజి పణి మణిసిజ్ వెహ్లాన్. వాండ్రు, “బాబు నీను వెహ్లా లెకెండ కిత. గాని మరి నండొ బాడ్డి మనాద్”, ఇజి వెహ్లాన్.

23 అయావలె ఎజుమాని, “నా ఇల్లు నిండ్రెదెజ్, నీను నాహ్కా వీదిజు సందిజు సొన్ని లోకురిజ్ ఈడిసి తగ్ అ”, ఇజి వన్ని పణిమణిసిజ్ వెహ్లాన్.

24 ఎందానిజ్ ఇహిజు, కూక్కి అయా కూలెజు లొఇ ఒరెన్బా ఆ టిండి రుసి నెస్ ఎన్”, ఇజి మీ వెట వెహ్లాన్.

సిసుడుఆనికాన్ ఎలాగమండ్రెజ్ ఇజి వెహ్లానాన్

25 మంద లోకు వన్ని వెట సొన్ని మహివలె వరిదరిజ్ నుడెజి వాండ్రు ఈహు వెహ్లాన్.

26 “ఎయెన్బా నా సిసూడుః ఆదెజ్ ఇహిజు, నజి ఇంక, వన్ని అయిసి అపొసిజ్ వన్ని ఆలు ని కొణొరిజ్, వన్ని అన్న తంబెరిజ్, వన్ని తజి బీబిజ్ మరి వన్ని సొంత పాణమ్దిజ్బా నండొ ప్రేమిస్తెజ్ ఆవిద్. వాండ్రు నండొ ప్రేమిస్తెజు, నా సిసూడుః ఆదెజ్ అట్ ఏన్.

27 ఎయెన్బా కస్టమ్కు ఓరిసి సాదెజ్బా ఇస్టం ఆజి నా వెట వాతిజునె నా సిసూడుః ఆనాన్.

28 మీ లొఇ ఎయెన్బా ఉండ్రె నిరీ గుడిః తొహ్తెజ్ ఆస వాతిజు, వాండ్రు ముజాల బసి, దనిజ్ కర్పు ఎసొ ఆనాద్ ఇజి లెక్కనుణాన్. పణి పూర్తి కిదెజ్ వన్ని కీదు మనిక ఆనాదొ, సాల్ ఎదొ ఇజి నూణాన్ గదె?

29-30 అయక తొవండ వాండ్రు పునాది పొక్కి, పూర్తి తొహ్తెజ్ అట్ ఇతిజు, అక్కనూణికార్ విజెరె, “వీండ్రు తొహ్తెజ్ మొదొల్స్తాన్ గాని పూర్తి కిదెజ్ అట్ ఎతాన్”, ఇజి వన్నిజ్ కరాయి ఇనార్.

31 ఒరెన్ రాజు మరి ఒరెన్ రాజువెట ఉద్దం కిదెజ్ సొండ్రెజ్ ఇహిజు, వాండ్రు ముజాలె బస్తాండ్రె సుణాన్, ఇరువయ్ వేలుజ్ లోకుర్వెట అయా రాజు వాజినాన్. వన్ని ముస్సు ఉద్దం కిదెజ్ నా పది వెయుజ్లోకుర్వెట వెట నాను అట్టానా, సిలెనా ఇజి.

32 అట్ఇజు, అయా రాజు దూరం మనివెలెనె సల్వాణిజ్ షోక్సి సమాదనం కిదెజ్ వాండ్రు సుణాన్.

33 అయలెకెండెనె, మీ లోఇ ఎయెన్బా వన్నిజ్ కల్లితికెజ్ డిఃన్ఎండ మహిజు, నా సిసూడుః ఆవన్.

34 సోరు నెగ్గికదె, గాని దనిజ్ మన్ని రుసి సోహిజు, ఎలాగ మరి రుసి తప్పిస్తెజ్ ఆనాద్?

35 అయాక బూమిదిజ్బా గాని గత్తమ్దిజ్బా గాని పణిదిజ్ రవద్. అందెజె అయాక వెల్లి విసీర్పార్. గిబ్బిజ్ ఒడఃజి వెండ్రు. అయావజ నడిఃజి మండ్రు”, ఇజి వెహ్హాన్.

15

మురుతి గొరె దోహ్క్సినాద్

1 ఉండ్రీ నాండిజ్ పన్ను పెర్నికార్ని పాపం కిజినికార్ ఇజి యూదురు సుడఃతికార్ విజెరె వన్ని బోద వెండ్రెజ్ వన్ని డగ్రు కూడిఃత మహార్.

2 పరిసయ్రు ని యూదురి రూలుజ్ నెస్పిస్సికార్, “వీండ్రు పాపం కిజిని వరిజ్ డగ్రు కిజి వరివెట కూడఃజి బోజనం కిజినాన్”, ఇజి సణిజీతార్.

3 అందెజె వాండ్రు వరిజ్ కతవజ నెన్పిస్తాన్.

4 “ఉండ్రీ వేల మీ లోఇ ఒరెన్వన్నిజ్ వంద గొరెజ్ మనె. వన్నాలోఇ ఉండ్రీ గొరె మురుతిజు, వాండ్రు అయా తొమ్బయి తొమెది గొరెజు, అడిఃవిదు డిఃసి మురుతి మని గొరెదోహ్పాదాక రెబానాన్గదె?

5-6 అది దోహ్క్తివలె సర్ద ఆజి వన్ని గుంజమ్దు పిండిజి ఇండ్రొ తనాన్. మరి వన్ని కూలెజు పడఃకాతి వరిజ్ కూక్సి, “మురుతి మహి నా గొరె దోహ్క్తె. అందెజె నా వెట సర్ద ఆదు”, ఇజి వెహ్హాన్.

7 అయా వజనె, తోమ్బయి తోమెది మణిసిర్ పాపం ఒప్పుకొండెజ్ అవుసరం సిలి నీతి నిజాయితీదికార్ మనార్. వరి వందిజ్ కల్లిని సర్ద ముస్సు పాపమ్కు డిసి నీతి వన్ని వందిజ్ దేవుణు మంజిని బాడిడు నండొ సర్ద కల్లినాద్, ఇజి నాను మీ వెట వెప్పిన”.

మురుతి రుపయి దొహ్కొన్నాద్.

8 “మరి, ఉండ్రీ బోదెల్దిజ్ పది వెండి రుపాయి మహె. వన్కాలోఇ ఉండ్రీ రుపాయి మురుతిజ, అది దీవ కసిసి, ఇల్లు సిపాజి, అది దొహ్కొద్దాక నెగెండ రెబావీదా?

9 అక్కదొహ్కొవెలె దన్ని కులెజాణిజ్, పడకాతి వన్కాజ్ కూక్కి, “నా మురుతి మహి రుపాయి దొహ్కొద్దాద్. అందెజె నా వెట సర్ద ఆదు”, ఇజి వెహ్నాద్.

10 అయావజనె పాపమ్కు డిసి నీతి వన్ని వందిజ్ దేవుణు వన్ని దూతెజ ఎద్రు సర్ద ఆజినాన్ఇజి నాను మీ వెట వెప్పిన”.

తప్పి సొహి మరిసి మర్జి వాజినాన్

11 మరి వాండ్రు ఉండ్రీ వెహ్నాన్, “ఒరెన్ వన్నిజ్ రిఎర్ మరిసిర్ మహార్.

12 కొగ్రి మరిసి, “ఓ బా, నీను గణస్తి దన్నిలోఇ నజీ వానివంతు సిదా”, ఇజి అపొసిజ్ లొస్తాన్. అందెజె అపొసి వన్ని ఆస్తి వరిజ్ సీబాత సిత్తాన్.

13 సెగం రొస్సు సొహి వెనుక, కొగ్రి మరిసి వన్నిజ్ కల్లితికెజ్ విజు కుడుప్పి, నండొ దూరం మన్ని దేసమ్దు సొహాన్. అబ్బె వాండ్రు సెజ అలవాటుజ ఆతాండ్రె వన్ని ఆస్తివిజు పాడు కిత్తాన్.

14 విజు కర్పు కిత్తివెనుక, ఆ దేసమ్దు గొప్ప కరు వాతాద్. వన్నిజ్ ఇనిక బా దొహ్కొవెతాద్.

15 అందెజె వాండ్రు ఆ దేసమ్ది ఒరెన్ వన్ని డగ్గు పణికిదెజ్ సొహాన్. వాండ్రు పండ్రీజ్ మెప్పెజ్ వన్ని మడిజు వన్నిజ్ పొక్తాన్.

16 పండ్రీజ్ తిని పొడు; తింజి బజ సొన్పెన్జెజ్ ఇజి ఆస ఆతాన్. గాని ఎయెర్బా వన్నిజ్ ఇనికబా సివతార్.

17 వన్నిజ్ బుద్ది వాతివెలె వాండ్రు ఈమా ఒడిఃబితాన్, “నా బుబ్బ డగ్గు ఎసొండారొ పణిమణిసిర్ మనార్. పరిజ్ ఉండెజ్ అట్ఱ నస్సా జావ దొహ్కీనాద్. ఇబ్బె నాను బజ సాజిన.

18 నాను ఇబ్బె డిసి నా బుబ్బ డగ్గు సొన్ని, ‘ఓ బా, నాను దేవుణుదిజ్ పడఃఇ పణి కిత. నీ ఎద్దు పాపం కిత.

19 నీ మరిన్ ఇజి కూకె ఆదెజ్ నాను ఏపటితికాన్ ఆవి. నీ పణిమణిసి ఒరెన్ వన్నిలెకెండ్ నజి సుడఃఅ’, ఇజి నాను వెహ్నా”, ఇజి ఒడిఃబితాండ్రె అబెణిజ్ డిస్తాండ్రె వాజినాన్.

20 వాండ్రు దూరం మహివలెనె అప్పొసి వన్నిజ్ సుడఃతాన్. వన్ని పాణం నొతాండ్రె ఉహ్కీ సొన్ని పొంబితాండ్రె ముదు కిత్రాన్.

21 నస్తీవలె వాండ్రు అప్పొసిజ్, “ఓ బా, నాను దేవుణుదిజ్ పడఃఇ పణి కిత్ర. నీ ఎద్దు పాపం కిత్ర. నీ మరిన్ ఇజి కూకె ఆదెజ్ నాను ఏపటితికాన్ ఆవి”, ఇజి వెహ్నాన్.

22 గాని అప్పొసి వన్ని పణిమణిసిర్ కూక్తాండ్రె, “సొక్క బేగి తగ్ఱ. వినిజ్ తొడిఃగిస్తు. బొందు ఇడఃకిస్తు. పాదమ్కాజ్జోడఃకు తొడిఃగిస్తు.

23 బలిస్తీ దూడః తసి ఓహ్కూ. మాటు తింజి సర్గ్ ఆనాట్.

24 ఎందానిజ్ ఇహిజు, యా నా మరిన్ సాతి లెకెండ్ మహాన్. మరి ఏలు బత్తితాన్. మురుతి లెకెండ్ మహాన్. మరి యేలు దొహ్కాన్”, ఇజి వెహ్నాన్. వారు సర్గ్ ఆజి మహార్.

25 అయావలె పెరిమరిసి మడిఃజు సొహ మహాన్. వాండ్రు మడిఃజాణిజ్ వాజి ఇల్లు డగ్గు వాతివెలె, బాజెజ్ డెఃయిజినిక, కర్రజిజినిక వెహ్నాన్.

26 అందెజె వాండ్రు పణిమణిసిర్ లొఇ ఒరెన్ వన్నిజ్ కూక్తాండ్రె, ఇనిక జర్గిజినాద్, ఇజి వెన్బాతాన్.

27 అయా పణిమణిసి, “నీ తంబెరి వాతాన్. వాండ్రు నెగ్రెండ మర్జి వాతివందిజ్ నీ బుబ్బ బలస్తీ దూడః ఓహ్కాన్”, ఇజి వెహ్నాన్.

28 పెరి మరిసి కోపం ఆతండ్రె, లొఇ సొండ్రెజ్ కెవతాన్. అందెజె అప్పొసి వెల్లి వాతండ్రె, లొఇ రఅ, ఇజి వన్నిజ్ బతిమాలతాన్.

29 అయావలె వాండ్లు వన్ని అప్పొసి వెట, “ఇదిలో నిసాడు పంటజాణిజ్ ఒరెన్ గొతియయెన్ లెకెండ్ పణి కిత్త. ఎసెజ్బా, నీ మాటెజ్ నాను లొజీఏండ మన్ఏత. నా కూలెజ్వెట సర్ల ఆదెజ్ నీను నజీ ఉండ్రి గొరె పిల్లబా సిఇతి.

30 గాని సాని బూలాని వరిజ్ నీజి నీ ఆస్తి విజు పాడు కిత్తి యా మరిసి వాతిజ్ బలన్తి దూడః ఓహ్క్తి”, ఇజి వెప్తాన్.

31 అందెజె అప్పొసి, “నా మర్రిన్, నీను ఎస్తివలెబా నా వెటనె మన్ని. నజీ మనికెజ్ విజు నీవి.

32 మాటు విందు కిజి సర్ద ఆనిక నెగెద్. ఎందానిజ్ ఇహిజ, నీ యా తంబెరి సాతి లెకెండ్ మహండ్రి, మర్జి నిజితాన్. మురుతి లెకెండ్ మహండ్రి దొహ్క్తాన్”, ఇజి వన్ని వెట వెప్తాన్.

16

తెలివి మన్ని పెరిగొత్తియవన్ని కత

1 మరి, యేసు వన్ని సిసూర్జ ఈహు వెప్తాన్. ఒరెన్ సంసారం మన్ని వన్ని ఇండ్రోణి నజతిజ నూణి పెరి గొతియయెన్ ఒరెన్ మహాన్. యా గొతియయెన్ సామనమ్కు పాడు కిజినాన్ ఇజి నేరం మొప్పిక వెహాన్.

2 అందెజె వన్నిజ్ కూక్పిస్తాండ్రి, “నీ వందిజ్ నాను వెంజిని యా మాట ఇనిక? ఇండ్రోణి పణిజ లెక్క తోరిన్అ. ఎందానిజ్ ఇహిజ, నీను ఏలుదాన్ నా గొతియయెన్ ఆఇ”, ఇజి వన్నిజ్ వెప్తాన్.

3 యాక వెహండ్రి వాండ్లు ఈహు ఒడఃబితాన్. “నా ఎజుమాని యా పణిదాన్ నజీ లాగ్జినాన్. అందెజె నాను ఇనిక కిదెజ్? కార్తెజ్ అట్ఏ. లొసి ఉండెజ్ సిగు వాజినాద్.

4 యా పణిదాన్ లాగ్గివెలె, లోకుర్ నజీ డగ్గు కినిలెకెండ్ ఇనిక కిదెజ్ ఇజి నాను నెసిన.

5 అందెజె వాండ్లు వన్ని ఎజుమాని బాన్ అప్పు ఒతివరిజ్ ఒరెన్ ఒరెన్ వన్నిజ్ కూక్పిస్తాన్. “నీను నా ఎజుమాని బాణిజ్ ఎసా ఒతిమన్ని?”, ఇజి మొదొహి వన్నిజ్ వెన్బాతాన్.

6 వాండ్లు, “వంద కాయెజ్ నూనె”, ఇజి వెప్టాన్. అందెజె వాండ్లు, “ఇదిలో నీ సీటి. బేగి బసి యాబయి కాయెజ్ ఇజి రాస్అ”, ఇజి వెప్టాన్.

7 వెన్కాహివన్నిజ్, “నీను ఎసా ఒతిమన్ని?”, ఇజి వెన్బాతాన్. వాండ్లు, “వంద తూముజ్ గోదము”, ఇజి వెప్టాన్. అయావలె వాండ్లు, “ఇదిలో నీ సీటి. ఎనబయి తూముజ్ ఇజి రాస్అ”, ఇజి వెప్టాన్.

8 అనెయం కిత్తి యా పెరి గొత్తియయెన్ తెలివందిజ్ ఎజుమాని పొగిడితాన్. ఎందానిజ్ ఇహిజు, వానికాలమ్ది వన్ని బత్తు వందిజ్ వాండ్లు యా లెకెండ్ కితాన్. అందెజె యేసు, వెహ్పిసాన్, “దేవుణుదిజ్ నమిజి వాండ్లు వెప్టి వజ నడినివరి మున్కు, అయా పెరి గొత్తియయెన్ లెకెండ్, యా లోకమ్ది సజతిజు వందిజు ఒడేబినికారె తెలిమనికార్. వారు వరిలెకెండ్ మన్ని వరివెట కూడేజి పాడిేజి మండ్రెజ్ తెలిమనికార్.

9 మీరు యా లోకమ్దు బత్తిజిని మనివలె ఇబ్బె మిజి మనికెజ్ విజు దని వెట మీరు నెగ్రెండ తెలిదాన్ మండ్రెజ్ నుడేదు. ఎందనిజ్ ఇహిజు, మీరు మీ బత్తు ఇబ్బె డిస్సివలె దేవుణు మిజి వాండ్లు మంజిని బాడిదు ఎలాకాలం మండ్రెజ్ డగ్గు కిసాన్లె.

10 తక్కు దన్నిమున్కు నమకం మంజినికాన్ లావు దన్నిమున్కుబా నమకమ్దాన్ మంజినాన్. తక్కు దన్నిమున్కు నమకం సిలికాన్, లావు దన్నిమున్కుబా నమకం మన్ఎన్.

11 అందెజె, మిజి మన్ని ఆస్తి నమకమ్దాన్ తొఎండ మహిజు, నిజమాతి ఆస్తి ఎయెర్ మిజి ఒపజెప్పార్.

12 పడకాతి వరి దన్నిమున్కు నమకమ్దాన్ తొవిండ మహిజు, నీ సొంతదిక ఆతి నిజమాతి ఆస్తి ఎయెన్ మిజి సీసాన్.

13 ఎమేణి గొత్తియయెన్బా రివర్ యజమానరిజు వందిజ్ఉండ్రె లెకెండ్పణి కిదెజ్ అట్ఎన్. వాండ్లు ఒరెన్ వన్నిజ్ ఇస్టం కిఎండ మరి ఒరెన్ వన్నిజ్ ప్రేమిసాన్. సిలిజు, ఒరెన్ వన్ని మాట వెంజి నమకమ్దాన్ మంజినాన్. మరి ఒరెన్ వన్నిజ్ దుసలాడేనాన్. అయలెకెండ్నె దేవుణుదిజ్ ని డబ్బుదిజ్ ఉండ్రె లెకెండ్నె సేవకిదెజ్

మీరు అబ్‌ఇదెర్”, ఇజి వెప్టాన్.

14 డబ్బు ఆన మన్ని పరిసయరు యా మాటెజ్ విజు వెహరె, వన్నిజ్ వెక్రిస్తార్.

15 వాండ్రు వరిజ్ ఈహు వెప్టాన్, “లోకుర్ ముజాల మీరు నీతి నిజాయితీ మనికిదెర్ ఇజి తోరిన్సిదెర్. గాని దేవుణు మీ మన్నుదికెజ్ నెస్సాన్. లోకుర్ ఎద్రు గొప్ప విలువ మనిక దేవుణుదిజ్ ఇస్సం సిల్లికాదె.

16 దేవుణు మోసెజ్ సత్తి రూలుజ్‌ని ప్రవక్తరు రాస్సికెజ్ బాప్తిసం సీని యోహాను కాలం దాక బోదిసి మహార్. అబెణిజ్ అసి దేవుణు, వన్నిలోకురిజ్ కిని ఏలుబడిః వందిజ్ సువార్త వెహె ఆజి మహాద్. దేవుణు కిని ఏలుబడిఃదు మండ్రెజ్‌లోకుర్‌నండొ కస్టబడిఃజినార్.

17 ఆగసం బూమి సిల్లెండ ఆదెజ్‌సులునె, గాని దేవుణు సీతి రూలుజది ఉండ్రీ గీతబా తప్పి సాన్‌విద్.

18 ఎయెన్‌బా వన్ని అల్సిజ్ డిఃసి మరి ఉండ్రీ బోదెల్‌దిజ్ ఇడ్డెః ఆతిజ, దని వెట వాండ్రు రంకు బూలాజినాన్. మాసిజ్ డిఃస్తి దనిజ్ ఒరెన్‌ఇడెః ఆతిజ, వాండ్రు రంకు బూలాజినాన్.

ఆస్తిమన్నికాన్‌ని లొసిఉణి లాజరు

19 ఒరెన్ ఆస్తిమన్నికాన్ మహాన్. వాండ్రు నండొ కరిది సొక్కెజ్ తొడఃగిజి విజు దినమ్‌కు సుకం ముస్కు మహాన్.

20 లాజరు ఇని లొసిఉణికాన్ ఒరెన్ మహాన్. వన్ని ఒడొల్‌కండి విజు పుట్టు మహె. ఆస్తిమన్ని వన్ని ఇండ్రొణి డేవాద్ వన్నిజ్ ఇట్టా మహార్.

21 వన్ని బల్లదాన్ అర్తి జావ పరెజ్ ఉణిజి బజ సాన్‌పిస్సెజ్ ఆసఆజి మహాన్. సుకుడిఃజ్‌బా వాజి వన్ని పుట్టు నాక్కి మహె.

22 లొస్సి ఉణికాన్ సాతాన్. దేవుణు దూతెజ్ వన్నిజ్ దేవుణు మంజిని బాడిఃదు అబ్రాహం పడఃకాదు ఒతాన్. ఆస్తిమన్నికాన్‌బా సాతాన్. వన్నిజ్ ముస్తార్.

23 వాండ్రు అయా లోకమ్దు బాదఅజినె, బుర్ర పెర్ణి ముస్సు-బేస్తాన్. దూరం మన్ని అబ్రాహముజ్ని వన్నివడఃకాద్ మన్ని లాజరుజ్ సుడఃతాన్.

24 అందెజె వాండ్రు, “బుబ్బు ఆతి అబ్రాహము, నా ముస్సు-కనికారం తోరిన్త. నాను యా సినుదు నండొ బాద అజిన. అందెజె లాజరు వాజి వన్ని డెఃస్సు ఏరుదు ముడుక్కి నా నాలిక సలెజ్ కిదెజ్ వన్నిజ్ పోక్త”, ఇజి డేల్ని వెహ్తాన్.

25 అందెజె అబ్రాహము, “మరిన్ నీను బత్కితి కాలమ్దు సుకం ముస్సు మహి. గాని లాజరు కస్టమ్దు మహాన్. ఏలు వాండ్రు ఇబ్బె సుకం దాన్ మనాన్. నీను కస్టమ్దు మన్ని.

26 యాకదె ఆవండ, ఇబ్బెణికార్ అబ్బె వాదెజ్ అట్వండ, అబెణికార్ ఇబ్బె వాదెజ్ అట్వండ మజి నిజి నడిమి పెరిజోరె ఇట్టా మనాద్”, ఇజి వెహ్తాన్.

27-28 అయావలె వాండ్రు, “అహిజ, ఓ బా, నజి అయ్దుగురు దాదార్ మనార్. వారు బా యా కస్టమ్కు మన్నిబాడిదు రవండ మండ్రెజ్ నా బుబ్బు ఇండ్రొ లాజరుజ్ పోక్త. వాండ్రు సొన్ని వరిజ్ వెహ్తాన్, ఇజి నాను నిజి బతిమాల్జిన”, ఇహాన్.

29 అందెజె అబ్రాహము, “వరి డగ్రు మోసె రాస్తికెజ్, ప్రవక్తరు రాస్తికెజ్ మనె. వారు అయాకెజ్ వెంజి మండ్రెజ్”, ఇజి వన్నిజ్ వెహ్తాన్.

30 వాండ్రు, “బుబ్బుతి అబ్రాహము, ఆహె వారు కిఎర్. సాతికాన్ ఒరెన్ వరి డగ్రు సొన్ని వెహ్తాజినె, వారు పాపమ్కు డిసి సీనార్”, ఇజి వెహ్తాన్.

31 అందెజె వాండ్రు, “మోసె రాస్తి మనికెజ్ ప్రవక్తరు రాస్తికెజ్ వారు వెన్వండ మహిజ, సాతికాన్ మరీజి నిజ్జి సొన్ని వెహ్తాజెబా వారు నమ్మిఎర్”, ఇజి వెహ్తాన్.

17

1 యేసు వన్ని సిసూర్జ ఈహు వెహ్తాన్. “తప్పజ్ కిబిన్ని సజతిజ్ తవ్వండ వానెలె. గాని యా సజతిజ్ ఎయెవెట వానెనొ వన్నిజ్

అబాయా, నండో బాద.

2 ఎయెన్బా నా ముస్సు, నమకం ఇడ్డి మన్ని యా కొణ్ణె: నన్ని ఒరెన్వన్నిజ్ తప్పకిబిస్తైజ్ సుడేతిజ పెరిసిక్న వానాద్. దిన్నిముస్సు ఇజిరిసిక్ననె వన్ని మెడేదు జత్త పణుకు తొప్పి సందారమ్దు విసిర్నిక. ఆకదె వన్నిజ్ నెగెద్.

3 అందెజె మీ వందిజ్ మీరె జాగర్తమండ్రు. నీ తంబెరినొ, ఎయెన్బా నిజీ తప్పు కితిజ, వన్నిజ్ డటం బుద్ది వెహ్అ. వాండ్రు తప్పడిసి ఒప్పకొటిజ వన్నిజ్ సెమిస్అ.

4 ఉండ్రీ దినమ్దు ఏడు సుట్సు, వాండ్రు నిజీ తప్పజ్ కిజి, ఏడు సుట్సు నీ డగ్రు వాజి 'నాను తప్పడిసి ఒప్పకొణ్ణెజిన', ఇజి వెహ్పాజి నీను వన్నిజ్ సెమిస్అ".

5 నస్తవలె వన్నెండు మణిసి అపొస్తుడుజ, మజీ నండో నమకం సిదా", ఇజి ప్రబుజ్ లొస్తార్.

6 అందెజె వాండ్రు, "మిజీ సర్సుగింజ నస్తు నమకం మహిజ, యా మలబరి మరాతిజ్ సుడేజి, "వెలెజాణిజ్ పెరె ఆజి సందారమ్దు ఉణుసె ఆఅ", ఇజి వెహ్పా వెలె అది మిజీ లొజీనాద్.

7-8 ఉండ్రీ వేల, మీలోఇ ఒరెన్వన్నిజ్ డూదెజ్నొ గొరెజ మేపైజ్నొ వెట్టిపణి కినికాన్ ఒరెన్ మనాన్. వాండ్రు మడిజుదాన్ వాతిజ, "బేగి రఅ, వాజి ఉణఅ", ఇజి వెహ్పాదెరా? సిల్లె, గాని, 'సుబ్బరం ఆజి వర్అ, నజి బాట సీజి ఉణితిని దాక మన్అ. వెనుక నీను ఉణఅ', ఇజి వెహ్పాదెర్.

9 వన్నిజ్ ఒవజెప్పి పణి కితిజ్ ఎజుమాని వన్నిజ్ వందనమ్కు వెహ్పాండ్రా?

10 అందెజె మీరు బా మిజీ ఒవజెప్పి పణిజ్ విజు కితి వెనుక, "మాటు పణిమణిసిర్. వందనమ్కు వెహ్ ఆదెజ్ అవ్సరం సిల్లెద్. మాటు కిదెజ్ మన్ని పణిసె కితాట్", ఇజి వెహ్పాజ్.

పది మణిసిర్ కుస్తురోగం మన్నికార్ నెగెణ్ ఆజినార్

11 యేసు యెరూసలేమ్‌ను సొన్ని మహివలె, సమరియ గలీలయ ముట్ట సరిఅద్దుదాన్ సొన్ని మహాన్.

12-13 వాండ్రు ఉండ్రీ నాటొ సొన్ని మహివలె పది మణిసి కుస్తురోగం మనికార్ వన్నిజ్ ఎద్రు వాతార్. వారు దూరం నిహరె, “యేసు ఎజుమాని, మా ముస్కు కనికారం తోరిన్అ”, ఇజి డెడిఃస్తార్.

14 వాండ్రు వరిజ్ నుడఃతాండ్రె, “సొన్ని, మీరు నెగెణ్ ఆతిదెర్ ఇజి పుజెరిజి తోర్ ఆదు”, ఇజి వెప్తాన్. వారు సొన్ని మహిజ్ నెగెణ్ ఆతార్.

15 వరిలోఇ ఒరెన్, నెగెణ్ ఆత ఇజి నెస్తాన్. వాండ్రు డటం దేవుణుదిజ్ పొగిడిఃజి మర్జి వాతాన్.

16 వాతాండ్రె యేసుజ్ పాదమ్క ముస్కు ముణుకుజ్ ఊర్జి మాడిఃస్తాండ్రె, వందనమ్కు వెప్తాన్. వాండ్రు సమరియదికాన్.

17 అందెజె యేసు, “పది మణిసిర్ నెగెణ్ ఆతార్ గదె. ఆ తొమెది మణిసిర్ ఎంబె మనార్?

18-19 ఎందానిజ్ వీండ్రు ఒరెండ్రె దేవుణుదిజ్ పొగిడిఃదెజ్ మర్జి వాతాన్. వీండ్రు యూదురిజ్ సెంద్ ఇకాన్. ఇస్తాయేలుదికార్ ఎందనిజ్ తోర్ ఆవతార్?”, ఇజి వెప్తాన్. వెప్తాండ్రె, “నీను నిజ్జి సొన్అ. నీను నా ముస్కు నమకం ఇడ్డి అందెజె నెగెణ్ ఆతి”, ఇజి వన్నిజ్ వెప్తాన్.

దేవుణు రాజువజి వానివందిజ్ వెప్పినాన్

20 ఒర్నెండు, దేవుణు ఏలుబడిః కినిక లోకుర్ ఎసెజ్ సూణార్ ఇజి పరిసయిరు వన్నిజ్ వెన్బాతార్. అందెజె వాండ్రు, “దేవుణు రాజువజి వాని ముజాల్ తోర్ని గుర్తు ఇనిక సిల్లెద్.

21 దేవుణు మిజి ఏలుబడిః కిజినిక ఇయేలె మొదొల్స్త మనాన్. అందెజె, ఇదిలో ఇబ్బె మనాద్, అదిలో అబ్బె మనాద్ ఇజి లోకుర్ వెప్పి గుర్తు ఇనిక సిల్లెద్”, ఇజి వరిజ్ వెప్తాన్.

22 మరి వాండ్రు వన్ని సిసూర్జి వెప్తాన్, “లోకు మరిసి ఆతి నాను గొప్ప అతికారం దాన్ సోకుదాన్ మంజినిక కండెక్ టయం బా నుడఃదెజ్ ఇజి మీరు కోరిజిన రోస్కు వానెలె. గాని ఆ రోస్కు లోఇ ఉండ్రీ రోజుబా మీరు తొఇదెర్.

23 లోకుర్ మిజి, “ఇదిలో ఇబ్బె మనాన్, అదిలో అబ్బె మనాన్”, ఇజి వెహ్వర్. గాని వరి వెట సొన్మాట్. వరి మాట అస్మాట్.

24 ఎందానిజ్ ఇహిజు, ఆగసమ్దు మెరిస్సివెలె ఉండ్రి పడకదాన్ మరి ఉండ్రి పడకాద్ జాయి తోర్నివజనె లోకు మరిసి ఆతి నాను వానివలె మంజినాద్.

25 గాని ముజాల యా తరమ్దికార్ నజీ నెక్కిపొక్కినార్. వాండ్రు నండో ఇమ్సెజ్ ఒరిస్తెజ్వెలె.

26 నోవాహు కాలమ్దు మహిలెకెండెనె లోకు మరిసిఆతి నాను వాని ముజాల మంజినాద్.

27 నోవాహు ఒడకదు సొనిదాక లోకుర్ ఉణిజి తింజి మహార్. పెండ్లి ఆజి పెండ్లిజ్ సీజి మహార్. నస్తివలె గడ్డ నిండ్రిజి, వరిజ్ విజెరిజ్ నాసనం కిత్తాద్.

28 లోతు కాలమ్దు మహిలెకెండెనె, నాను వాని ముజాల మంజినాద్. లోకుర్ ఉణిజి, తింజి, కొడుకెజి పొర్ని మహార్. పల వాక్కి, ఉణుసి, ఇల్కు తోహ్ని మహార్.

29 లోతు సొదొమ డిస్సి సొహి నాండిజ్, ఆగసమ్దాన్ సిను రంజికం పిరు లెకెండె వాజి వరిజ్ విజెరిజ్ నాసనం కిత్తాద్.

30 యా లెకెండెనె, లోకు మరిసి ఆతి నాను వాని దినమ్దు జర్రిజి మంజినాద్.

31 నాను వాని దినమ్దు, మీద్దె ముస్కు మంజినికాన్ ఇండ్రో మన్ని వన్ని సామనమ్కు ఒతెజ్ డిగ్దెజ్ ఆవద్. అయలెకెండెనె మడికెజు మంజినికాన్ ఇనికబా ఒతెజ్ మర్జి వాదెజ్ ఆవద్.

32 లోతు ఆల్సెజ్ ఒడకబిదు. అది దేవుణు వెహ్టా మాట వెన్ ఇతిజ్ సొత్తాద్.

33 ఎయెన్బా వన్ని సొంత పాణమ్దిజె కాపాడకెడెజ్ నుండెతిజు వన్నిజ్ ఎలాకాలం దేవుణు వెట బత్కిని బత్కు దొహ్కెవద్. ఎయెన్బా నా వందిజ్ వన్ని పాణం సితెజు, వాండ్రు ఎలాకాలం దేవుణు వెట బత్కిని బత్కు దొహ్కాద్.

34 నాను మీ వెట వెహ్నిన, అయా పొదొయి రిఎర్ ఉండ్రి మన్నమ్దు గూర్వార్. ఒరెన్ వన్నిజ్ దేవుణు ఒనాన్. ఒరెన్ వన్నిజ్ డిస్సు సొనాన్.

35 రుండి బోదెక్ కూడఃజి నూర్జి మంజినె. ఉండ్రి దనిజ్ దేవుణు ఒనాన్. ఉండ్రి దనిజ్ డిన్న సొనాన్.

36 రిఎర్ మడిఃజ మంజినార్. ఒరెన్ వన్నిజ్ దేవుణు ఒనాన్. ఒరెన్ వన్నిజ్ డిఃన్న సొనాన్.

37 అయావలె సిసూరు, “ప్రబువా, ఎంబె యాక జర్గినాద్?”, ఇజి వెనబాతార్. వెనబాతిజ్ వాండ్రు, “పీనుగు ఎంబె మంజినాద్ ఇజి నెస్తెజ్ డేగెజ్ ఉండ్రి గుర్తు ఆనిలెకెండ్, యేసు వానిక నెస్తెజ్ టెటాజ్ గుర్తుజ్ మన్నె.

18

డిఃన్ఎండ వాతి రాండిబోదెలి కత

1 వన్నిసిసూర్ డిఃన్ఎండ ఎస్తివలెబా పార్లన కిజి మండ్రెజ్ ఇజి నేర్పిస్తెజ్ యేసు వరిజ్ కతవజ ఈహు నెస్పిస్తాన్.

2 అక్కఇనిక ఇహిజ, ఉండ్రి పట్టుమ్దు ఒరెన్ నాయం కినికాన్ మహాన్. వాండ్రు దేవుణుదిజ్ తియెల్ ఆఇకాన్. లోకాజ్ లసెం కిఇకాన్.

3 ఆ పట్టుమ్దు ఉండ్రి రాండి బోదెల్ మహాద్. అది వన్ని డగ్గు డిఃన్ఎండ వాజి, “నా మున్కు పగ ఆతికాన్ ఒరెన్ మనాన్. వాండ్రు నజి సీదెజ్ మనిక సీనిలెకెండ్ నీను నాయం తీరిస్అ”, ఇజి బతిమూల్జి మహాద్.

4-5 వాండ్రు సెగం కాలం కెవతాన్. వెనుక వాండ్రు, “నాను దేవుణుదిజ్ తియెల్ ఆఇకాన్. లోకాజ్ లసెం కిఇకాన్. గాని యా ముండ బోదెలి డిఃన్ఎండ వాజి నజి ఏక ఏక లొసినాద్. అందెజె అది మరి మరి వాజి బాద కల్గిన్ఎండ దన్నిజ్ నాయం తీరిన్న”, ఇజి వన్నిజ్ వాండ్రె వెప్తాన్.

6 మరి యేసు వెప్తాన్, “విండ్రు, యా నీతి నిజాయితి సిలి నాయం కినికాన్ ఇనిక వెప్తాన్ ఇజి.

7 అహిజ, నీతి నిజాయితి మన్ని దేవుణు, వాండ్రు ఏర్పాటు కితి వన్ని లోకుర్ రెయు పొకాల్ వన్నిజ్ పార్లనం కితిజ, వాండ్రు వరిజ్ నాయం తీరిన్ఎండ మంజినాండ్రా? వాండ్రు ఆల్సెం కినాండ్రా?

8 నాను మీ వెట వెప్పిన, వాండ్రు బేగి నాయం తీర్స్నాన్. గాని లోకు మరిసి ఆతి నాను మర్జి వానివలె, నా ముస్కు నమకం దాన్ మన్ని వరిజ్ నుణానా?

పరిసయుని పన్నుపెర్ని వన్ని కత

9 సెగొండార్ మాపు నీతి మనికాప్ ఇజి వరిజ్ వారె గర్త ఆజి మహివరిజ్ దుసలాడేతికార్ మహార్. నన్నివరిజ్ వాండ్రు కతవజ నెన్పిస్తాన్.

10 “రిఎర్ లోకుర్ పార్దనం కిదెజ్ ఇజి దేవుణు గుడిఁదు సొహార్. బెరెన్ పరిసయి వాండ్రు బెరెన్ పన్ను పెర్నికాన్.

11 పరిసయు వాండ్రు సొహండ్రె, వన్నిలోఇ వాండ్రు ఈహు పార్దనం కితాన్, “ఓ దేవుణు, నాను మహి లోకుర్ లెకెండ్ర్ ఆవ. ఆనగొటుజు లెకెండ్ర్, అనయం కిని వరిలెకెండ్ర్, రంకు బూలాని వరి లెకెండ్ర్ ఆవ. యా పన్ను పెర్ని వన్ని లెకెండ్ర్బా ఆవ. అందెజె నిజి వందనమ్కు.

12 నాను వారమ్దిజ్ రుండి నుట్కు ఉపాస్ మంజిన. నజి వాజిని విజు దన్నిలోఇబా నిజి దెసం బాగం సీజిన”, ఇజి పార్దనం కిత్తాన్.

13 గాని పన్ను పెర్నికాన్ దూరం నిహాన్. వాండ్రు ఆగాసం దరోబ్బా బేన్ఎండ, వన్ని గుండె కొత్తె ఆజి, “ఓ దేవుణు, నాను పాపం కితిక. నజి కనికారం తోరిస్అ”, ఇజి వెహ్తాన్.

14 నాను మీ వెట వెప్పిన, పరిసయు వన్ని ముస్కు విని పాపమ్కునె దేవుణు సెమిస్తాన్. వీండ్రు దేవుణు ముజాల నీతి నిజాయితి మనికాన్ ఇజి తీర్సె ఆతండ్రె ఇండ్ర్ సొహాన్. వన్నిజ్ వాండ్రె పెరికాన్ ఇజి ఒడేబినికాన్ ఎయెన్బా ఇజ్జికాన్ ఆనాన్. వన్నిజ్ వాండ్రె తగిజి ఇజ్జికాన్ ఇజి ఒడేబినికాన్ ఎయెన్బా పెరికాన్ ఆనాన్.

ఇజిరికొడొరిజ్ యేసుడగ్గు కిజినాన్

15 సెగొండార్, యేసుడగ్గు ఇజిరి బయిరిజ్బా తసి మహార్. వరిముస్కు వన్నికికు ఇడదెజ్ ఇజి తత్తార్. అక్క సుడేతారె సిసూర్ వరిజ్ జటిజ్ ఆతార్.

16 గాని యేసు, కొడోరిజ్ వన్ని డగ్గు కూక్తాన్. కూక్తాండ్రె, “యా ఇజ్జి కొడోరిజ్ నా డగ్గు రపీర్. వరిజ్ అడు కిమాట్. ఎందానిజ్ ఇహిజ, యా కొడోరిజ్ లెకెండ మనికారె దేవుణు ఏలుబడిః కినివెలె మంజినార్.

17 నిజమె, మీ వెట వెహ్సిన, ఇజ్జి కొడోరిజ్ నమ్మిని వజ, దేవుణుదిజ్ నమినికార్ దేవుణు ఏలుబడిఃదు మజినార్. నమ్మిఇకార్ మండ్రెజ్ అట్ఎర్”.

ఒరెన్ అస్తిమన్నికాన్ యేసువెట వర్గిజినాన్

18 ఒరెన్ అతికారి యేసుజ్ సుడఃజి, “ఓ నెగ్గి బోదకినికి, ఎలాకాలం దేవుణువెట బత్కిని బత్కు దోహ్ కిద్ ఇహిజ, నాను ఇనిక కిదెజ్?”, ఇజి వెన్ బాతాన్.

19 అందెజె యేసు, “నాను నెగ్గికాన్ ఇజి ఎందనిజ్ నీను వెహ్సిన దేవుణు ఒరెండ్రె నెగ్గికాన్. మరి ఎయెన్ బా నెగ్గికాన్ ఆఎన్”, ఇజి వెహ్సాన్.

20 మరి వన్నిజ్, “రంకు బూలామా. లోకుదిజ్ నప్ మా. డొజ కిమ. అబద సాక్సి వెహ్ మా. నీ యాయ బుబ్బెజ్ గవ్ రమ్ దాన్ నెగెండ సుడఃఅ* ఇని మోసె సిత్తి ఆడ్రెజ్ నెసినిగదె”, ఇజి వెహ్సాన్.

21 వెహ్సాజ్ వాండ్రు, “ఇజి వెలెహాన్ అసి యా విజు వన్కాజ్ లోజిజిన వాజిన”, ఇజి వెహ్సాన్.

22 యేసు యాక వెహ్ండ్రె వన్నిజ్, “మరి ఉండ్రె బా నీన్ కిదెజ్ మనాద్. నిజి కల్గితిమనికెజ్ విజు పొర్ని అయా డబ్బుజ్ బీద వరిజ్ సిత. అయావలె దేవుణు మంజిని బాడిఃదు నిజి సంసారం మంజినాద్. మరి, నీను వాజి నా సిసూడుః ఆఆ”, ఇజి వెహ్సాన్.

23 యా మాటెజ్ వెహ్సాజ్, వన్ని మొకొం ఇజ్జిక ఆతాద్. ఎందనిజ్ ఇహిజ, వాండ్రు నండ్రె అస్తిమనికాన్.

24 యేసు వన్నిజ్ సుడఃజి, “అస్తిమనికార్ దేవుణు కిని ఏలుబడిఃదిజ్ అడిఃగి మండ్రెజ్ ఎసొనొ కస్టం.

* 18:20 18:20 నిర్గమ 20:12-16, ద్విత్తి 5:16-20.

25 ఒరెన్ సంసారం మనికాన్ దేవుణు కిని ఏలుబడిఃదిజ్ అడిఃగి మన్ని దని ముస్కు ఉండ్రీ ఒంటె దొబానం బొరొదాన్ డుఃగ్ దెజ్ నూలు ఆనాద్”, ఇజి వెప్తాన్.

26 అయావలె యా మాటెజ్ వెహికార్, “అహిజ, దేవుణు రక్కిన్తి లెకెండ్ ఎయెర్ మండ్రెజ్ అట్నార్?”, ఇజి వెన్బాతార్.

27 అందెజె యేసు, “లోకు కిదెజ్ అట్ ఇక దేవుణు కిదెజ్ అట్నాన్”, ఇజి వెప్తాన్.

28 నన్తివలె పేతురు, “ఇదిలో, మాపు మజి కల్లితి మనికెజ్ విజు డిఃస్రాపె నీ వెట వాతాప్”, ఇజి వెప్తాన్.

29-30 అందెజె యేసు, “ఒరెన్ వన్ని ముస్కు దేవుణు ఏలుబడిః కిదెజ్ ఇజి ఇల్లుదిజ్ బా ఆల్సిజ్ బా, దాద తంబెరిజ్ బా అయిసి అప్సొసిరిజ్ బా కొఢొఃకొదాదిజ్ బా, డిఃస్తికాన్ ఎయెండ్రొ వన్నిజ్ యేలు మరి నండొ కల్లినాద్. వాని కాలమ్దు వన్నిజ్ ఎలాకాలం దేవుణు వెట బత్కిని బత్కుదు బా మంజినాద్, ఇజి కసితం నాను మీ వెట వెప్సొన”, ఇజి వెప్తాన్.

యేసు వన్ని సాపువందిజ్ సిసూరిజ్ వెప్సొనాన్

31 యేసు వన్ని పన్నెండు మణిసిర్ సిసూరిజ్ కూక్కి వరిజ్ ఈఘు వెప్తాన్. “ఇదిలో మాటు యెరూసలెమ్దు సొస్సినాట్. లోకు మరిసి ఆతి నా వందిజ్ ప్రవక్తరు రాస్తి విజు మాటెజ్ అబ్బె పూర్తి ఆనాద్.

32-33 యూదురు ఆఇ వరి కీదు నాను ఒపజెపె ఆన. వారు నజి వెక్తిసి సిగు లాగ్గి, నా ముస్కు పూసి కొరెడెఃజాణిజ్ డెఃయిజి నప్పార్. మూండ్రీ దినమ్కాజ్ నాను మర్జి నిక్పె ఆనాలె.

34 గాని సిసూరిజ్ యా మాటెజ లొఇ ఉండ్రీబా అర్దం ఆవతార్. దిన్ని అర్దం వరిజ్ డాఃజితాద్. వాండ్రు వెప్తా సజతిజ్ వారు నెన్ ఏతార్.

గుడ్డి వాండ్రు బేస్టెజ్ అట్సినాన్

35 యేసు యెరికొ పట్టమ్దిజ్ డగ్రు వాతివెలె, ఒరెన్ గుడ్డి వాండ్రు సరి పడఃకాద్ బసి లొసి మహాన్.

36 సీన లోకుర్ అయా సరిదాన్ సొన్ని మహిక, వెహొండ్రె, ఇనిక జర్గిజినాద్ ఇజి వెనబాతాన్.

37 వారు వన్నిజ్, “నజరెతు వాండ్రు ఆతి యేసు, సొన్సినాన్”, ఇజి వెహొర్.

38 వాండ్రు, “ఓ దావీదు మరిసి ఆతి యేసువా, నా ముస్సు కనికారం తోరిన్అ”, ఇజి డటం డేల్స్తాన్.

39 ముజాలె సొన్ని మహికార్, “అలెఅ”, ఇజి వన్నిజ్ కసితం వెహొర్. గాని వాండ్రు మరి నండొ దావీదు మరిసి, నా ముస్సు కనికారం ఆఅ”, ఇజి మరి ఒదె డటం డేల్స్తాన్.

40-41 యాక వెహొండ్రె యేసు అబ్బె నిహాన్. “అయా గుడ్డి వన్నిజ్ నా డగ్రు తగ్అ”, ఇజి వరిజ్ డటం వెహొన్. వాండ్రు వాతిజ్, నాను నిజి ఇనిక కిదెజ్ ఇజి కోరిజిని?”, ఇజి వన్నిజ్ వెన్బాతాన్. దనిజ్ వాండ్రు, “ప్రబువా, నాను బేస్తెజ్ ఇజి ఆస ఆజిన”, ఇజి వెహొన్.

42 అందెజె యేసు, “ఇదిలో నీను సూణిలె. నీను నా ముస్సు నమకం ఇడ్డి. అందెజె నెగెణ్ ఆతి”, ఇజి వెహొన్.

43 వెటనె వాండ్రు బేస్తెజ్ అట్టాన్. వాండ్రు దేవుణుదిజ్ పొగిడిజి యేసువెట సొహాన్. యాక సుడెతిజ్ లోకుర్ విజెరెబా దేవుణుదిజ్ పొగిడితార్.

19

జకయ ఇని పన్ను పెర్ని వన్నిజ్కూక్సినాన్

1 యేసు నడిజి యెరికొ పట్టమ్దు వాతండ్రె అయా సరిదాన్ సొన్ని మహాన్.

2 జెకయ ఇన్ని ఒరెన్ అబ్బె మహాన్. వాండ్రు పన్ను పెర్ని వరిజ్ నెయ్కి. వాండ్రు గొప్ప ఆస్తిమన్నికాన్.

3 యేసుజ్ సుడెదెజ్ ఇజి వాండ్రు కోరితాన్. గాని నండొ లోకుర్ మహిజ్ వన్నిజ్ సుడెదెజ్ అట్ఎతాన్. ఎందనిజ్ ఇహిజు, వాండ్రు కురికాన్.

4 యేసు అయా సరిదాన్నె వాజి మహిజ్, వాండ్రు ముజాల్ ఉహొక్సి సొన్ని ఉండ్రె బొడ్డె మరాత్ ఎక్తాన్.

5 యేసు మరాన్ అడిగి వాతివెలె, ముస్కు బేసి, “జెకయ, బేగి డిగ్జి రఅ. నేండ్రు నాను నీ ఇండ్రో మండ్రెజ్ వెలె”, ఇజి వన్నిజ్ వెహ్లాన్.

6 అందెజె వాండ్రు గజిబిజి డిగితాండ్రె వన్ని ఇండ్రో కూక్త ఒతండ్రె సర్లదాన్ డగ్రు కిత్తాన్.

7 యాక సుడేతారె, లోకుర్ విజెరె సణిజితార్. “వీండ్రు, పాపం కిని వన్ని ఇండ్రో కూల సాహాన్”, ఇజి.

8 అయావలె జెకయ నిజితండ్రె, యేసుజ్ ఈహు వెహ్లాన్. “ఇదిలో ప్రబువా, యేలు నా ఆస్తి లోఇ సగం బీదవరిజ్ సీజిన. అనయమ్దాన్ ఎయె బాన్బా ఇనిక లొస్తిజ, నాను దని నాల్లి వంతు మర్జి సీన”, ఇజి వెహ్లాన్.

9 యేసు వన్నిజ్, “నేండ్రు యా ఇండ్రోణి వరి పాపమ్కు దేవుణు సెమిస్త్ర మనాన్. ఎందానిజ్ ఇహిజ, విన్ని అనిసిఆతి అబ్రాహము దేవుణు ముస్కు నమకం ఇడ్డి వజ, వీండ్రుబా నమకం ఇట్టాన్.

10 లోకు మరిసి ఆతి నాను పాడాజి సాని వరిజ్ రెబాజి రక్సిస్తైజ్ వాత”, ఇజి వెహ్లాన్.

పణిమణిసిర్ కత

11 లోకుర్ యాకెజ్ వెంజి మహార్. వాండ్రు యెరూసలెం డగ్రు ఆత్తాన్. దేవుణు రాజు వజ వెటనె వానాన్లె ఇజి లోకుర్బా ఒడేబితార్. అందెజె వాండ్రు కత వజ వరిజ్ ఈహు నెన్పిస్తాన్.

12 ఒరెన్ రాజు వజ కుటుమ్దికాన్ వన్ని దేసమ్దు రాజు ఆదెజ్ ఇజి ఉండ్రీ దూరం మని దేసెం సాహాన్. మరి, మర్జి వాదెజ్ ఇజి సాహాన్.

13 సాని ముజుల, వన్ని పణిమణిసిర్ లోఇ పది మణిసిర్ కూక్సి ఒరెన్ ఒరెన్ వన్నిజ్ ఉండ్రీ మీనా* సిత్తాన్. సితాండ్రె, “నాను మర్జి వాని దాక బేరం కిజి మండ్రు”, ఇజి వరిజ్ వెహ్లాన్.

* 19:13 19:13 ఉండ్రీ మీనా మూండ్రీ నెలెజ పణిదిజ్ కూలి

14 గాని వన్ని పట్నమ్దికార్ వన్నిజ్ ఇన్ఱం సిలెతాద్. అందెజె వారు, “వీండ్రు మజీ ఏలుబడిః కిదెజ్ మజీ ఇన్ఱం సిల్లెద్”, ఇజి వన్ని వెనుక పెరి రాజుజ్ కబ్బు పోక్తార్.

15 అహిజ్బా, వాండ్రు రాజు ఆతాన్. మర్జి వాతివెలె, వాండ్రు డబ్బు సిత్తి మణిసిర్, అయా డబ్బుదాన్ బేరం కిజి ఇనిక గణస్తార్ ఇజి నెస్తెజ్ వరిజ్ కూక్పిస్తాన్.

16 వరిలోఇ మొదోహికాన్ వన్ని డగ్గు వాజి, “బాబు, నీను సితి యాబయి రుపాయుజాణిజ్, అయ్దు వందెజ్ రుపయిజు వాతె”, ఇజి వెప్తాన్.

17 వాండ్రు, “నెగ్గి పణిమణిసి నీను నెగెండ కితి. నీను ఇజి పణిదు నమకం దాన్మహి. అందెజె పది పట్నమ్క మున్కు అతికారి ఆఅ”, ఇజి వెప్తాన్.

18 అయావలె మరి ఒరెన్ వాజి, “బాబు, నీను సితి యాబయి రుపాయుజాణిజ్ రుండి వందెజ్ యాబయి రుపాయ్జు వాతె”, ఇజి వెప్తాన్.

19 నీను బా అయ్దు పట్నమ్క మున్కు అతికారి ఆఅ”, ఇజి వెప్తాన్.

20-21 అయావలె మరి ఒరెన్ వాజి, “బాబు, ఇదిలో నీ డబ్బు. నీను నీది ఆఇక ఒనికి. నీను విత్ఇకెజ్ కొయ్జి ఒనికి. నీను గటి పాణం మనికి. అందెజె నిజి తియెల్ ఆజి యా డబ్బు రుమాల్దు మాట తోహ్క ఇట్టా మహా”, ఇజి వెప్తాన్.

22-23 అందెజె వాండ్రు వన్నిజ్ వెప్తాన్, “పణిదిజ్ రఇ పణిమణిసి, నీ వెయిది సొంత మాటదిజ్నె, నాను నిజి తీర్పు తిర్సిన. నాను నాది ఆఇదనిజ్ పెర్పి ఒనికాన్ ఇజి, నాను విత్ఇకెజ్ కొయ్జి ఒనికాన్ ఇజి నీను నెస్సి గదె. నాను గటి పణం మనికాన్ ఇజి నీను నెస్సి. మరి ఎండనిజ్ నా డబ్బు బెంకుదు ఇడ్ఇతి? అహు ఇడ్చి ఇహిజు, నాను మర్జి వాతివెలె వడ్డిదాన్ దోహ్కాద్ మరి.

24 విన్నిబాన్ మన్నిడబ్బు లాగ్గి పది పట్నమ్కాజ్ అతికారి ఆతి మొదోహివన్నిజ్ సీదు”, ఇజి పడఃకాద్ నిహి మహి వరిజ్ వెప్తాన్.

25 వారు, “బాబు, వన్నిజ్ అయ్దు వందెజ్ రుపాయ్బు మనె గదె”, ఇజి వెహ్టోర్.

26 వెహ్టాజ్ వాండ్రు, “నమిదెజ్ తగ్గి వన్నిజ్ మరి నండో కల్గినాదలె. గాని నమిదెజ్ తగ్గి వన్నిజ్ కల్గితి మన్ని కండెక్బా లగ్నాన్, ఇజి నాను మీ వెట వెహ్టాన్.

27 మరి, నాను వరి మున్కు ఏలుబడిః కిదెజ్ ఇస్టం సిల్లి నా పగ ఆతి వరిజ్ ఇబ్బె తగ్గి. వరిజ్ నా ఎద్రు కత్తు”, ఇజి వెహ్టాన్.

28 యేసు యా మాటెజ్ వెహ్టా వెనుక, యెరుసలం సొండ్రెజ్ వరి ముజాల సొన్నినాన్.

29-30 ఒలివ గొరొణ్ డగ్రు మన్ని బెత్సెగె, బెతానియ ఇని నాహ్కజ్ డగ్రు వాతాన్. వాతివెలె వన్ని సిసూర్ లొఇ రివెరిజ్ కూక్కి, “మీ ఎద్రు మన్ని నాటో సొండ్రు. అబె సొహిజ సరి, తోహ్కక్కి మని గాడఃదె పిల్ల తోర్నాద్. దన్నిమున్కు ఎసెజ్బా ఎయెర్బా బన్ఎరె. దనిజ్ కుత్సి పేర్జి తగాల్.

31 ఎయెన్బా, “మీరు ఎందనిజ్ దనిజ్ కుత్సినిదెర్, ఇజి వెన్బాతిజ, యాకెజ్ ప్రబుజ్ కావాలి, ఇజి వరిజ్ వెహ్టా”, ఇజి వెహ్టాండ్రె పోక్తాన్.

32 పోక్తి మనికార్ సొన్ని వాండ్రు వరిజ్ వెహ్టా లెకెండెనె సుడఃతార్.

33 వారు ఆ గాడఃదె పిల్లదిజ్ కుత్సి మహిజ్, దన్ని ఎజుమానుర్, “మీరు ఎందానిజ్ గాడఃదె పిల్లదిజ్ కుత్సిన్దెర్”, ఇజి వెన్బాతార్.

34 అందెజె వారు, “యాక ప్రబుజ్ కావాలి”, ఇజి వెహ్టోర్.

35 వారు యేసుడగ్రు తత్తార్. తతారె, దన్నిమున్కు వరి పాతెజ్ పహ్టార్. యేసుజ్ దని మున్కు ఎకిస్తార్.

36 వాండ్రు సొన్ని మహిజ్, వరి పాతెజ్ సొన్సిని సర్దు పహ్టార్.

37 ఒలివ గొరొణ్ డిఃగ్గి వాని సర్దు వాతివెలె, వన్ని సిసూర్ ని వన్ని వెట మన్ని మంద లోకుర్ విజెరె దేవుణుదిజ్ పొగిడిఃతార్. వారు సుడఃతి విజు గొప్ప పణిజ వందిజ్ సర్దదాన్ దేవుణుదిజ్ డటం పొగిడిఃతార్. వారు ఈహు పొగిడిఃతార్.

38 “దేవుణు సీతి అతికారమ్దాన్ వాజిని రాజుజ్ పొగ్గడెః ఆనికాన్†. పరలోమ్దు సమాదనం మనాద్. ముస్కు మన్ని దేవుణు గొప్ప పెరికాన్”,

39 నస్తవలె ఆ మంద లొఇ మన్ని సెగొండార్ పరిసయ్రుజు, “ఓ బోదకినికి, నీ మంద సిసూర్ విజెరిజ్ అలెజి మండ్రు ఇజి డటం వెహ్అ”, ఇజి వెహ్అర్.

40 అందెజె వాండ్రు, “వీరు అల్లెత మహిజ, యా పణుకుజ్ డటం డేల్ని పొగిడిజినె ఇజి నాను మీ వెట వెహ్సాన్”, ఇజి వెహ్సాన్.

41-42 వాండ్రు యెరూసలెం పట్టుం డగ్రు వాతండ్రె, పట్టుమ్దిజ్ సుడఃజి అబ్బె మన్ని లోకుర్ వందిజ్ అడఃబతాన్. అడఃబతాండ్రె ఈహు వెహ్సాన్, “మీరు యా దినమ్దు బా సమాదనం ఆని సజతిజ నెస్తజి మిజీ ఎసానొ మేలు మంజినాద్. గాని యేలు యాకెజ్ మీ కణకాజ్ తోర్ఎండ డాజిత మనె.

43-44 దేవుణు మిజి రక్సిస్తెజ్ మీ డగ్రు వాతి కాలం మీరు నెన్ఇదెర్. అందెజె మీ పగ్అతికార్ మీ సుటులం కోట తోహ్కీ వెల్లి సొన్ఎండ, లావు అడ్డుజ్ కినార్. వారు మిజి, మీ పట్టుమ్దిజ్ పూర్తి నాసనం కినార్. వారు పణుకు ముస్కు పణుకు మన్ఎండ పట్టుం పూర్తి నాసనం కిని కాలం వానాద్లె.

యేసు గుడిఃడాన్ సవ్కారిజి పేర్జినాన్

45-46 యాకెజ్ వెహ్సాండ్రె, వాండ్రు దేవుణు గుడిఃదు సొహాన్. అయావలె అబ్బె సవ్కారిజు పొర్ని మహార్. వరిజ్, “నా గుడిః పార్దనం కిదెజ్ ఇడ్డి గుడిః‡ ఇజి దేవుణు మటదు రాస్త మనాద్. గాని మీరు డొజారి మంజిని సాలంకీ లెకెండ దనిజ్ కితిదెర్”, ఇజి వెహ్సాండ్రె వరిజ్ పేర్దాన్.

47 యేసు రోజు, గుడిఃదు బోదకిజి మహాన్. పెరిప్పజెరిజు, యూదురి రూలుజ్ నెస్పిస్సికార్, లోకుర్ లొఇ మన్ని పెద్దెల్జు వన్నిజ్ సప్పెజ్ సుడఃజి మహార్.

† 19:38 19:38 కీర్తన 118:26. ‡ 19:45-46 19:45-46 యెసయ 56:7.
 § 19:45-46 19:45-46 యిర్మీయ 7:11.

48 గాని లోకుర్ విజెరె వన్ని మాటెజ్ బాగ వెంజి వన్ని సుటులం మహిజ్, వన్నిజ్ సప్తెజ్ అట్ ఏతార్.

20

యేసు అతికారం వందిజ్ వెన్ బాజినార్

1 అయా దినమ్ కలోఇ ఉండ్రీ నాండిజ్, వాండ్రు దేవుణు గుడిఁదు లోకాజ్ నేరేపిసి, సువార్త బోదిసి మహాన్. అయావలె పెరి పుజెరిజు ని యూదురి రూలుజ్ నెస్పిస్సికార్, పెద్దెల్జ వెట కూడఁజి వన్ని మున్కు-వతాద్.

2 నీను ఇనిఅతికారమ్ దాన్ యా పణిజ్ కిజిని? ఎయెన్ నిజి యా అతికారం సితాన్? మజి వెహాఅ”, ఇజి వన్నిజ్ వెన్ బాతార్.

3 అందెజె వాండ్రు, “నాను బా మిజి ఉండ్రీ మాట వెన్ బానా.

4 బాప్తినం సీదెజ్ అతికారం యోహానుజ్ ఎయె బాణిజ్ వతాద్ దేవుణు బాణిజ్ నా లోకు బాణిజ్ నా నజి యేలు వెప్తు? ఇజి వెహాన్.

5 వరిలోఇ వారు ఈహు వర్గితార్. దేవుణు బాణిజ్ వతాద్ ఇజి మాటు వెప్తాజ, ఎందనిజ్ మీరు వన్నిజ్ నమ్ ఇతిదెర్ ఇజి వాండ్రు వెన్ బానాన్.

6 లోకురి బాణిజ్ ఇజి మాటు వెప్తాజ, లోకుర్ విజెరె మజి పణకాణిజ్ డెయినార్. ఎందనిజ్ ఇహిజ, యోహాను, ఒరెన్ దేవుణు ప్రవక్త ఇజి విజెరె పూర్తి నమ్మిజినార్.

7 అందెజె వారు, “అయాక ఎంబెణిజ్ వతాదొ మజి తెలిఎద్”, ఇజి వారు మర్జి వెహార్.

8 అహిజ, ఎంబెణి అతికారమ్ దాన్ నాను యా పణిజ్ కిజిన ఇజి నాను బా వెహాఎ”, ఇజి యేసు వరిజ్ వెహాన్.

రయ్యుజ కత

9 మరి, వాండ్రు ఉండ్రీ కత వజ లోకురిజ్ నెన్ పిస్తాన్. “ఒరెన్ లోకు ద్రాక్కు టోట ఉణుస్తాన్. ఆ టోట సెగొండార్ రయ్ తూజ తనక సితాన్. సితండ్రై నండొ కాలం మండ్రెజ్ ఉండ్రీ దూరం దేసెం సొహాన్.

10 పంట కొయ్యని కాలమ్దు వన్నిజ్ వాని పట్కుజ వంతు లొసి తగ్గఅ ఇజి ఒరెన్ గొతియ వన్నిజ్ రయ్తూజ డగ్రు పోక్తాన్. అయా రయ్తూజ వన్నిజ్ డెయితారె వహి కీదాన్ మర్జి పోక్తార్.

11 వాండ్రు మరి ఒరెన్ గొతియవన్నిజ్ పోక్తాన్. వారు వన్నిజ్బా డెయిజి, సిగు కితారె వహి కీదాన్ పోక్తార్.

12 మరి బా, ఒరెన్ వన్నిజ్ పోక్తాన్. వారు వన్నిజ్ గాయమ్కు ఆని లెకెండ డెయితారె వెల్లి విసీర్తార్.

13 అయావలె ద్రాక్కు టోట ఎజుమాని, “నాను ఇనిక కిదెజ్? నాను లాపు ప్రేమిన్ని నా సొంత మరిసిజ్ పోక్కు. వారు వన్నిజ్ గవరం సినార్లెను”, ఇజి ఒడెబితాండ్రె పోక్తాన్.

14 గాని పాలి ఆస్తి మన్నికార్ వన్నిజ్ సుడెతారె, “వీండ్రు యా టోటాదిజ్ అక్కు మనికాన్. యా టోట మాది ఆదెజ్ వన్నిజ్ సప్పాట్. రదు”, ఇజి వరి లొఇ వారు వర్గితార్.

15 అందెజె వారు వన్నిజ్ ద్రాక్కు టోటదాన్ వెల్లి పోక్తారె సప్తార్. అహిజ, ద్రాక్కు టోట ఎజుమాని వరిజ్ ఇనిక కినాన్?

16 వాండ్రు వాజి, అయా రయ్తూజ సప్పి మహి వరిజ్ టోట ఒపజెప్పాన్. లోకుర్ యాక వెహారె, “ఆ లెకెండ కిదెజ్ ఆఎద్”, ఇజి వెప్తార్.

17 యేసు వరిజ్ డిటం బేసి ఈహు వెన్బాతాన్, “అహిజ, ఇల్లు తొప్పికార్ నెక్తి పోక్తి పణుకు మూలదిజ్ మూల పణుకు ఆతాద్* ఇజి దేవుణు మాటదు రాస్తి మన్ని దన్ని అర్దం ఇనిక?

18 అయా పణుకు మున్కు అర్ని విజెరె ముకెజ్ ఆనార్. అయా పణుకు ఎయెన్ మున్కు అర్రిజ, వాండ్రు సింద్సింద ఆనాన్”.

19 యూదురి రూలుజ్ నెస్పిస్పికార్, పెరి పుజెరిజు, మా వందిజ్నె వీండ్రు కత వజ వెప్తాన్ ఇజి నెస్తారె, వెటనె వన్నిజ్ అస్టెజ్ సుడెతారె. గాని లోకురిజ్ తియెల్ ఆతారె, అన్ఎతార్.

20 అందెజె వారు వన్నిజ్ బాగ గురి కిజి మహార్. ఎందానిజ్ఇహిజ, వాండ్రు వెప్పాని మాట లొఇ ఇని దనిజ్బా తపు అసి వన్నిజ్

* 20:17 20:17 కీర్తన 118:22.

తోప్పి అతికారిజి బాన్ ఒపజెప్తెజ్. దిని వందిజ్ వారు నండొండారిజ్ పొక్కినార్. యా సెగొండార్ మాపు నీతి నిజాయితీ మనికాప్ ఇజి వేసం కినికార్. నని వరిజ్ వన్ని డగ్రు పొక్తార్. వీరు సొన్ని వన్ని మాటెజులోఇ తప్ప అస్తెజ్ ఇజి.

21 వారు వాతారె వన్నిజ్, “ఓ బోదకినికి, నీను నిజమతిక వెప్పి బోదిసిని ఇజి మాపు నెస్నాప్. నీను ఇజ్జికార్ పెరికార్ ఇజి తేడ తోఇకి. దేవుణుదిజ్ ఇస్టం ఆతి నిజమాతి బత్కు. వందిజ్ నీను నిజం నెస్పిన్ని ఇజి మాపు నెస్నాప్.

22 మాపు కయ్సరుజ్ పన్ను సీనికెజ్ నాయమ్నా? అనయమ్నా?”, ఇజి వన్నిజ్ వెన్బాతార్.

23-24 వాండ్రు వరి సెఇ బుద్దిదిజ్ నెస్తాండ్రె వరిజ్, “ఉండ్రీ దినారి కాను తోరిస్తు. దిని ముస్కు మన్ని బొమ్మ ఎయెది? రాస్తి మన్ని రాంత ఎయెది?”, ఇజి వెన్బాతాన్. “కయిసర్వి”, ఇహార్ వారు.

25 అందెజె వాండ్రు, “కయిసరుది, కయ్సరుజ్ సీదు. దేవుణుది దేవుణుదిజ్ సీదు”, ఇజి వెప్తాన్.

26 వారు అబ్బె మంద ఎద్రు వాండ్రు వెప్తా మాటదు తప్ప అస్తెజ్ అట్ఎతార్. వాండ్రు మర్జి వెప్తా మాటదిజ్ నండొ బమ్మ ఆతారె అలెతార్.

27 నస్తివలె సెగొండార్ సదుకయ్రు యేసు డగ్రు వాతార్. సాతి వెనుక మర్జి నిజ్నిక సిల్లెద్ ఇజి వారు వెప్పినార్. వారు వాతారె ఈహు వెన్బాతార్.

28 ఓ బోదకినికి, ఒరెన్ కొడొర్ సిల్లెండ సాతిజ. వన్ని తంబెర్చి ఒన్నిజ్ ఇడ్డె; ఆజి కొడొర్ ఇడ్డెదెజ్. ఆహె సాతి వన్ని వందిజ్ కటుం నిల్పెజ్, ఇజి మోసె మజి రాస్త సిత్తమనాన్.

29-31 యేలు సుడేఅ, ఉండ్రీ కాలమ్దు, దాదతంబెర్సిర్, ఏడు గురు మహార్. తోల్సుర్దికాన్ ఉండ్రీ బోదెల్దిజ్ పెండ్లి ఆతాన్. కొడొర్ సిల్లెండ సాతాన్. సాతిజ్, నడిపి వాండ్రు దనిజ్ ఇడ్డె; ఆతాన్. కొడొర్ సిల్లెండ సాతాన్. వెనుక కొగ్రి నడిపి దనిజ్ ఇడ్డె; ఆతాన్. కొడొర్ సిల్లెండ వాండ్రుబ సాతాన్. ఆహె ఏడు గురు బా కొడొర్ సిల్లెండ

సాతాన్.

32 కడిఃవేరిదు ఆ బోదెల్బా సాతాన్.

33 అందెజె సాతి వరిబాణిజ్ మర్జి నిజ్ని వెలె, ఆ బోదెల్ ఎయెరిజ్ ఆల్ని ఆనాద్? ఆ ఏడు గురుదిజ్బా అది ఆల్ని ఆత మహాద్ గదె?”, ఇజి వెన్బాతార్.

34 అందెజె యేసు వరిజ్ ఈహు వెహ్తాన్, “యా లోకమ్ది లోకుర్ పెండ్లి ఆజినార్. పెండ్లిదిజ్ సీజినార్.

35 గాని సాతి వరిబాణిజ్ మర్జి నిజ్జి పరలోకమ్దు మండ్రైజ్ తగ్గుకార్ పెండ్లి ఆవర్. పెండ్లిదిజ్ సివర్.

36 ఎంఆనిజ్ ఇహిజ, వారు మరి సావర్. వారు దేవుణు దూతెజి పొలితికార్. వారు సావుదాన్ మర్జి నిజ్నార్. అందెజె వారు దేవుణు కొణ్ణార్.

37-38 సాతికార్ నిజ్నార్ ఇజి మోసె నెగ్రెండ రుజుప్ కిజినాన్. లట కన్ని బాన్ మోసె సాహాన్. అబ్బె, ‘అబ్రాహము దేవుణు, ఇస్సాకు దేవుణు, యాకోబు దేవుణు ఇజి వాండ్రు దేవుణు ఆతి ప్రబు వందిజ్ వెహ్సినాన్. అయావలె అబ్రాహము, ఇస్సాకు, యాకోబు బత్తిజినార్ ఇజి తోర్నాద్. వాండ్రు బత్తితి మన్ని వరిజ్నె దేవుణు. సాతి వరిజ్ దేవుణు ఆఎన్. ఎందనిజ్ ఇహిజ, వన్ని వెట కూడితి మనికార్ విజెరె బత్తిజినార్.

39 సెగొండార్, యూదురి రూలుజ్ నెప్పిన్నికార్, “బోదకినికి, నీను నెగెండ వెహ్తా”, ఇజి వన్నిజ్ వెహ్తార్.

40 వెసుక వారు వన్నిజ్ ఇనికబా వెన్బాదెజ్ ఎయెరిజ్బా దయ్ఠం సాల్వితార్.

41 యేసు వరివెట ఈహు వెహ్తాన్. “క్రిస్తు దావీదు తెగ్గాతికాన్ ఇజి ఎలాగ వారు వెహ్సినార్?

42-43 ‘నాను నీ పగాతి వరిజ్ నీ పాదమ్క అడిఃగి ఇడ్డిదాక, నీను నా ఉణెర్ పడఃకాదు బన్ఆ”, ఇజి ప్రబు నా ప్రబు వెట వెహ్తాన్†”, ఇజి కిర్తన పుస్తకమ్దు దావిదునె వెహ్సినాన్.

† 20:42-43 20:42-43 కిర్తన 110:1.

44 దావిదునె వన్నిజ్, “ప్రబు” ఇజి కూక్సినాన్. అయావలె వాండ్రు ఎలాగ దావీదు మరిసి ఆనాన్.

45-46 లోకుర్ విజెరె వెంజి మహివలె, యేసు వన్ని సిసూరిజ్ వెప్టాన్, “మీరు యూదురి రూలుజ్ నెస్సిస్సివరి వందిజ్ జాగర్త మండ్రు వారు నిరీ సొక తోడేగిజి బూలాదెజ్ ఇస్టం ఆతికార్. సత నడిఃమి పెరికార్ ఇజి మాడెః ఆదెజ్ కోరిజినార్. యూదురి మీటిజ్ ఇండ్రో పెరికార్ బన్ని బాడిఃదు బస్తెజ్, విందుద్ నెగ్గి బాడిఃదు బస్తెజ్ కోరిజినార్.

47 వారు రాండి బోదెక్ ఇల్కాణికెజ్ అనయమ్దాన్ లాగ్జినార్. మహి వరి ఇంక నెగ్గికాప్ ఇజి తోరె ఆదెజ్ నిరీ పార్దనం కిజినార్. దేవుణు వరిజ్ నండో సిక్స సీనాన్”.

21

1 యేసు దేవుణు గుడిఃదు బస్తాండ్రె, సుటులం బేస్తాన్. అయావలె ఆస్తిమన్నికార్ సంత పెట్టెదు పెరి సంత అర్పేసినిక సుడేఃతాన్.

2 ఇనిక సిల్లి ఉండ్రె రాండి బోదెలి సంత అర్పేస్సిక బా సుడేఃతాన్. అది రుండి పయినెజ్ అర్ప్తాద్.

3 వాండ్రు వరిజ్, “నాను నిజం మీ వెట వెహ్సిన, యా ఇనిక సిలి రాండి బోదెలి మహి విజెరె ముస్సు లావు అర్ప్తాద్.

4 వారు విజెరె వరిజ్ కల్గితి మన్ని సంసారం బాణిజ్ అర్ప్తాద్. గాని అది దనిజ్ సిల్లి బాణిజ్ దనిజ్ బత్తిదెజ్ మనికెజ్ అర్ప్తాద్”, ఇజి వెప్టాన్.

5 అయావలె వన్ని సిసూర్లోఇ సెగొండార్, అయా దేవుణు గుడిః వందిజ్ వర్గిజి మహార్. నెగ్గి పణుకుదాన్ తోహ్కొక్తిక యా గుడిః ఇజి వర్గితార్. సంద సిత్తి నెగ్గి ఇనాయమ్కు ఇబ్బె ఇడ్డె మనె. గొప్ప సోకు మనాద్”, ఇజి వర్గితార్.

6 అయావలె యేసు, “మీరు సుడేఃతికెజ్ పణుకు ముస్సు పణుకు మన్వండ అరె ఆని దినమ్కు వానెలె”, ఇజి వెప్టాన్.

7 అయావలె వారు, “ఓ బోదకినికి, యాకెజ్ ఎసెజ్ జర్గిజినె? యాక జర్గిని కాలం డగ్రు ఆతాద్ ఇజి తోరిన్ని గుర్తు ఇనిక?”, ఇజి వెన్బాతార్.

8 అందెజె వాండ్రు వెహ్టాన్, “మీరు మొసెం కిబె ఆఎండ జాగర్తు మండ్రు. ఎండనిజ్ ఇహిజ నండొండార్ నా పేరు అసి వానార్లె. వారు, “నానె దేవుణు పోక్తి క్రిస్తు ఇజి, కాలం డగ్రు ఆతాద్ ఇజి వెహ్ని వానార్. వరి వెట సొన్మాట్.

9 మీరు విదెమ్కు వందిజ్, జటిజ్ వందిజ్ వెనివెలె తియెల్ ఆమాట్. యాక ముజాలె జర్గిదెజ్వెలె. గాని ఆక్కర్ రోజు వెటనె రెఉ.

10 మరి వాండ్రు వరిజ్ వెహ్టాన్, “లోకుర్ ముస్సు లోకుర్, రాజెం ముస్సు రాజెం జటిజ్దిజ్ నిజ్నార్లె.

11 అబ్బె ఇబ్బె బూమి గొప్ప కర్ణినికెజ్ వానెలె. నండొ దేసమ్దు కర్తుజ్, నండొ లోకురిజ్ సెద్రిజి అన్ని కస్టమ్కు వానెలె. గొప్ప తియెల్ కల్గిన్ని గుర్తుజ్ ఆగాసమ్దు పుట్టెలె.

12 గాని యాకెజ్ జర్గిని ముజాల, వారు మిజి అస్సారె, ఇమ్సెజ్ కినార్. వారు మిజి యూదురి మీటిజ్ ఇండ్రొని, జెలిదు ఒపజెప్పార్. రాజుజు ముజాల, మహి అతికారిజు ముజాల మిజి తనార్. యాకెజ్ విజు నా ముస్సు నమకం ఇడ్డి వందిజె జర్గినె.

13 అయావలె, యాకదె మీరు నా వందిజ్ సువార్త వెహ్టాజ్ నెగ్గి సమయం.

14 వారు వెన్బానివెలె, వరిజ్ ఎలాగ మర్జి వెహ్టాజ్ ఇజి ఒడఃబిజి ముజాల బాద ఆవ్ ఇజి తిరుమానం కిజి మన్ఆ.

15 ఎందానిజ్ ఇహిజ, మీ పగాతికార్ ఎయెర్బా మిజి ఎద్రిన్ఎండ మంజిని వజి మీరు వెహ్టాజ్మాటెజ్, గెణం నాను మిజి సీన.

16 మిజి మీ అయిసి అపోసీర్బా ధాదతంబెర్సిర్బా కూలెజ్బా అతికారిజుబాన్ సిక్స సిబిస్తెజ్ ఒపజెప్పార్. మీ లోఇ సెగొండారిజ్ వారు సప్పార్.

17 నా ముస్సు నమకం ఇడ్డి వందిజ్ విజెరె మీ ముస్సు పగడాన్మంజినార్.

18 గాని మీరు ఎలాకాలం బత్రినార్.

19 కష్టమ్మకు ఓరిసి మండ్రు. అయావలె మీజీ ఎలాకాలం దేవుణు వెట బత్తిని బత్తు దోహ్కీదెర్.

20 యెరూసలెం పట్నం సుటులం ఉద్దం కినికార్ కూడేజి మహిక, మీరు సుడేతిజ, దన్ని నాసనం డగ్రు ఆతాద్ ఇజి మీరు నెస్తెజ్వెలె.

21 అయావలె నాసనం ఆవీండ మండ్రెజ్ యూదయ దేసమ్మదు మన్నికార్ గొరొకాజ్ ఉహ్కెజ్వెలె. యెరూసలెం పట్నం నడిమి మనికార్ వెల్లి ఉహ్కెజ్వెలె. యెరూసలెం పట్నం వెల్లి మనికార్ లోఇ సాండ్రెజ్ ఆవీద్.

22 ముజాలె రాస్తి మనికెజ్ పూర్తి అదెజె యా సిక్కి దినమ్మకు.

23 ఆ దినమ్కాజ్ పొటాద్ మన్ని వన్కాజ్, పాలు ఉట్పిస్సి వన్కాజ్ గొప్ప కష్టం. ఎండనిజ్ ఇహిజ, యూదయ దేసెం ముస్కు నండొ కష్టమ్మకు వానెలె. దేవుణు కోపం యా లోకుర్ ముస్కు వానాద్లె.

24 వారు కూర్దెజాణిజ్ సానార్లె. నెగొండారిజ్ తోహ్కీ పయ్ దేసెమ్కాజ్ విజు ఒనార్లె. దేవుణుదిజ్ నెన్ఇకార్ యెరుసలెమ్దిజ్ ఏలుబడిః కినార్లె. వరి ఏలుబడిః అబ్బె పూర్తి ఆని కాలమ్దాక యెరూసలెం వరి అడిగి ఆనాద్.

25 పొద్దుదు, నెలదు, సుక్కెజుదు బమ్మకిని గుర్తుజ్ తోర్నెలె. సమ్దరమ్ది ఉల్కెజ్ గొప్ప గగొల్ కిజి వరిజ్ తియెల్ కల్లిస్సె. ఆహె బూమిద్ మన్ని లోకుర్ విజెరె ఇనిక కిదెజ్ ఇజి అర్దం కివీండ మంజినార్.

26 ఆగసమ్దు మన్ని నండొ రకమ్కాణికెజ్ కద్లినె. అందెజె లోకమ్దు జర్గిని వన్కాజ్ వందిజ్ ఎత్తు కిజి తియెల్ ఆజి లోకుర్ సానార్.

27 అయావలె లోకు మరిసి ఆతి నాను మొసొపుదు వానిక వారు సూణార్. గొప్ప అతికారం దాన్ గొప్ప జాయ్దాన్ కూడితి సొకుదాన్ మొసొవ్దు వానిక వారు సూణార్.

28 యాకెజ్ జర్గిదెజ్ మొదొల్స్సివెలె నిల్చి బుర్ల పెర్దు. ఎందానిజ్ ఇహిజ, మీ కష్టమ్కాణిజ్ విడుడల డగ్రు ఆజినాద్.

29 వాండ్రు వరిజ్ కతవజ నెన్పిస్తాన్. బొడెమరాతిజ్ని విజు మరొకాజ్ సుడేదు.

30 ఆకెజ్ సెగ్రిసినివెలె, జేట కాలం డగ్గు ఆతాద్ ఇజి మీరె సుడేజి నెసినిదెర్.

31 అయా లెకెండెనె, మీరు యా సజతిజ్ జర్గినిక నూణివెలె, దేవుణు యా లోకమ్దిజ్ ఏలుబడిః కిజినిక డగ్గు ఆతాద్ ఇజి నెసినిదెర్.

32 యా సజతిజ్ జర్గినిదాక, యా తరమ్దికార్ సావర్, ఇజి నాను మీ వెట కసితం వెప్పిన.

33 ఆగాసం బూమి సిల్లెండ ఆనాద్. గాని నా మాటెజ్ ఎసెజ్బా అయాలెకెండ సొన్ఉ.

34 మీరు ఉణిజి తింజి మత్తుదాన్ మన్ఏండ యా లోకమ్ది బత్కు వందిజ్ విసారిన్ఏండ జాగర్త మండ్రు. సిల్లిజ, లోకుమరిసిఆతి నాను వాని దినం ఉరి వాతి లెకెండ వెటనె వానాద్. అందెజె జాగర్త మండ్రు.

35 యా లోకమ్దు బత్కిజిని లోకుర్ విజెరె ముస్కు అయా దినం నెన్ఏండ వానాద్.

36 యా జర్గిదెజ్ మన్ని విజు వన్కాజ్ ఓరిసి మంజిని సత్తు వందిజ్, లోకు మరిసి ఆతి నా ముజాలె నిల్ని సత్తు వందిజ్ ఎస్తివలె బా పార్లనం కిజి జగర్త మండ్రు.

37 యేసు రోజు దేవుణు గుడిఃదు వేడెక నెస్సిసి మహాన్. రెయ్క ఒలివ గొరొత్ మండ్రెజ్ సొన్ని మహాన్.

38 లోకుర్ విజెరె పెందాల్నె, వన్ని మాటెజ్ వెండ్రెజ్ దేవుణు గుడిఃదు వాజి మహార్.

22

యేసుజ్ ఒపజెప్పెజ్ యూద ఒప్పుకొటాన్

1 పస్కు ఇని పులాజ్ సిల్లి రొట్టెజ్ తయార్కిని పండొయి డగ్గు ఆతాద్.

2 నస్తివలె పెరిపుజెరిబు, యూదురి రూలుజ్ నెస్పిస్మికార్ యేసుజ్ ఎలాగ సప్తెజ్ ఇజి ఉపాయి సుడేజి మహార్. ఎందానిజ్ ఇహిజ, వారు లోకురిజ్ తియెల్ ఆజి మహార్.

3 అయావలె, పన్యెండు మణిసి సిసూర్ లోఇ మన్ని ఇస్కరియొతు ఇని యూదెజ్ నయ్తాను అస్తాన్.

4 వాండ్రు పెరి పుజెరిజ, అతికారిజ బాన్ సొహండ్రె ఎలాగ వన్నిజ్ వరికిదు ఒపజెప్తెజ్, ఇజి వరివెట వర్గితార్.

5 అందెజె వారు సర్ద ఆతారె, వన్నిజ్ డబ్బు సీనాప్ ఇజి ఒప్పకొటార్.

6 వాండ్రు దనిజ్ ఒప్పుకొటాన్. మంద లోకుర్ సిల్లివెలె వన్నిజ్ వరిజ్ ఒపజెప్తెజ్ తవ్కానం సుడెజి మహాన్.

7 పులాజ్ సిల్లి రొట్టెజ్ తయార్ కిని పండొయి కిని దినం వాతాద్. ఆ దినమ్దు మెండ గొరె పిల్లెజ్ పూజ సీజి పస్క బోజనం కిదెజ్.

8 అందెజె యేసు పేతురుజ్, యోహానుజ్, “మీరు సొన్ని, మాటు పస్క బోజనం ఉండెజ్ తయార్ కిదు”, ఇజి వెప్తాండ్రె వరిజ్ పోక్కినాన్.

9 వారు, “మాపు ఎంబె తయార్ కిదెజ్ ఇజి నీను కోరిజని?”, ఇజి వన్నిజ్ వెన్బాతార్.

10-11 అందెజె యేసు వరిజ్ ఈహు వెప్తాన్. “మీరు పట్టుమ్దు సొనివెలె, కుండాదు ఏరు పిణ్జి ఒరెన్ మీ ఎద్దు వానాన్. వాండ్రు సొని ఇండ్రొ వన్ని వెట సొండ్రు. సొన్ని ఆ ఇండ్రొణి యజమానిజ్, ఈహు వెప్తు, ‘నాను నా సిసూర్ వెట పస్క బోజనం కిదెజ్ గది ఎంబె మనాద్ ఇజి బోదిస్సికాన్ నిజి వెన్బాజినాన్’, ఇజి.

12 అయావలె ఆ ఎజుమాని విజు తయార్ కితి మేడః ముస్కు మన్ని పెరి గది ఉండ్రె తోరిస్నాన్. అబ్బె మీరు తయార్ కిదు”, ఇజి వెప్తాన్.

13 వారు పట్టుమ్దు సొహారె, యేసు వరిజ్ వెప్తివజ విజు సుడెజితార్. వారు పస్క బోజనం తయార్ కితార్.

14 పస్క బోజనం కిదెజ్ టయం ఆతివెలె, వాండ్రు వన్ని పన్నెండు మణిసిర్ అపొస్తులు వెట బోజెనమ్దిజ్ బస్తార్.

15 అయావలె వాండ్రు వరిజ్, “నజి సప్పి ముజాల మీ వెట కూడెజి యా పస్క బోజనం ఉండెజ్ నండొ ఆన ఆత.

16 ఎందానిజ్ ఇపొజు, యా పస్క బోజెనమ్దిజ్ గుర్తు దేవుణు రాజెమ్దు పూర్తి ఆనిదాక నాను మరి ఎసెజ్ బా ఉణెవి.

17 యేసు ద్రాక్షకల్లు మన్ని గిన్న అసి దేవుణుడిజ్ వందనం కితాన్. కితాండ్రై, “లోసి, మీరు సీబాజి ఉండు.

18 ఎందానిజ్ ఇహిజ, ఏలుదాన్ దేవుణు లోకురిజ్ ఏలుబడిః కినిక సూణిదాక నాను మరి ద్రాక్ష పట్టు రసం ఉణెఎ ఇజి నాను మీ వెట వెహ్సిన”, ఇజి వెహ్సాన్.

19 మరి వాండ్రు రొట్టెఅసి దేవుణుడిజ్ వందనం వెహ్సి దనిజ్ ముకెజ్ కిజి వరిజ్ సితాన్. “ఇక మీ వందిజ్ సీజిని నా ఒడోల్దిజ్ గుర్తు. నజీ ఎత్తు కిదెజ్ యాక కిజి మండ్రు”, ఇజి వెహ్సాన్.

20 అయలెకెండెనె, బోజనం ఆతి వెన్కా వాండ్రు వరిజ్ ద్రాక్షకల్లు మన్ని గిన్న సితాన్. ‘యా గినెదు మనికెజ్ మీ పాపమ్క వందిజ్ వాక్సిని నా నలదిజ్ గుర్తు. యాకదె నా నలదాన్ దేవుణు ఇడ్డి కొత్త ఒపుమానం.

21 గాని నజీ ఒపజెప్పికాన్ నావెట బోజెనమ్దిజ్ బస్త మనాన్.

22 దేవుణు ఏర్పాటు కితి వజ, లోకు మరిసి ఆతి నాను సానాలె. గాని నజీ ఒపజెప్పి వన్నిజ్ అబాయా గొప్ప కస్టం”, ఇజి వెహ్సాన్.

23 వారు యా పణిజ్ వరి లొఇ ఎయెన్ కినాన్ ఇజి వరి లొఇ వారి వర్గితార్.

24 మరి, వరిలొఇ ఎయెన్ పెరికాన్ ఇజి ఉండ్రీ ఇజి గొడఃబ వాతాద్.

25 అందెజె యేసు వరిజ్, “దేవుణుడిజ్ నెన్ఇ వరి రాజార్ వరి ముస్కు నండో అతికారం కిజినార్. వరి ముస్కు అతికారమ్దు మనికార్, ‘మాపు లోకురిజ్ కూలెజ్’, ఇజి అనుపె ఆజినార్.

26 గాని మీరు అయ లెకెండె మున్మాట్. మీలొఇ పెరికాన్ అతికాన్తగిసి ఇజి వన్నిలెకెండె ఆదెజ్. నెయ్కి సేవ కిని వన్ని లెకెండె ఆదెజ్.

27 సుడఃదు, ఎయెన్ పెరికాన్. విందుదు బస్సికాండ్రా, బాట కిజి సినికాండ్రా? విందుదు బస్సికాండ్రె గదె? గాని నాను మీ నడిఃమి, సేవ కిని వన్ని లెకెండె మన్న.

28 నా కస్టమ్దు మీరె నా వెట నమ్మకమ్దాన్ నిహి మహికిదెర్.

29 నా బుబ్బు వన్ని లోకురిజ్ ఏలుబడిః కిదెజ్ అతికారం నజీ ఒపజెప్పి వజ, నాను మిజీ అయా అతికారం ఒపజెప్పిన.

30 అందెజె నాను ఏలుబడిః కినివెలె నా విందుదు నా వెట ఉణిజి తినిదెర్. మీరు రాజుర్ బసి మంజిని సింహస్సనమ్కాజ్ బసి ఇస్రాయేలురి పన్నెండు తెగ్గాతి వరిజ్ ఏలుబడిః కినిదెర్.

పేతురు యేసుజ్ నెన్ఎఇజి వెహ్సాన్ ఇజి యేసు వెహ్సాన్.

31 “ఓ సిమోన్, సిమోన్, ఇదిలో రయ్యు వాండ్రు గింజెజ జలిస్సి వజ, నీ లోఇ మన్ని నెగ్గికెజ్ నెస్టెజ్ సయ్తాను నిజి పరిస కినాన్. దిన్నివందిజ్ సెల్వ దోహ్క మనాద్.

32 గాని సిమోన్, నీను నమకం డిఃన్ఎండ మండ్రెజ్ నాను నీ వందిజ్ పార్లనం కిత మన్న. నీను మర్జి నా దరిజ్ వానివలె, మహి సిసూరిజ్ వరి నమకం పిరివ్అ”, ఇజి వెహ్సాన్.

33 అయావలె సిమోను, “ప్రబువా, నీ వెట జెలిదు వాదెజ్, నీ వెట సాదెజ్బా నాను తయార్నె”, ఇజి వెహ్సాన్.

34 దన్నిజ్ యేసు, “పేతురు నాను వెహ్సాన్, నేండ్రు కొరు కెరెయెండ ముజుల నీను నజి నెన్ఎ ఇజి ముసార్ వెహ్సాలె”, ఇజి వెహ్సాన్.

35 మరి, వాండ్రు వరిజ్ వెన్బాతాన్, “డబ్బు ఇడ్డి ససి, మరి ఉండ్రీ ససి, జోడ్కు సిల్లెండ నాను మిజి పోక్తివెలె, మిజి ఇనికబా తక్కు ఆతాదా?”, “సిల్లె”, ఇజి వారు వెహ్సార్.

36 “అహిజ, ఏలు, మిజి డబ్బు ఇడ్డి ససి మహిజ, ఆక ఒతెజ్. అయలెకెండెనె, మరి ఉండ్రీ ససి బా ఒతెజ్. మిజి ఉండ్రీ కూడం సిలిజ, మీ సొక పొర్ని ఉండ్రీ కూడం కొండెజ్.

37 ఎండానిజ్ ఇహిజ, ‘జెలిదు మన్ని వరి వెట వన్నిజ్ కుడుఃప్టార్*’, ఇజి దేవుణు మాటదు రాస్త మనాద్. నాను వెహ్సాన్, అయా మాట నావెట పూర్తి ఆదెజ్వెలె. నిజమె నా వందిజ్ రాస్తి మనికెజ్ పూర్తి ఆజినాద్”, ఇజి వరిజ్ వెహ్సాన్.

38 అయావలె సిసూర్, “ప్రబువా, ఇదిలో ఇబ్బె రుండి కూణమ్కు మనె”, ఇజి వెహ్సాన్. దనిజ్ వాండ్రు, “ఆకెజ్ ఆనె”, ఇజి వెహ్సాన్.

యేసు ఒలివ గొరొత్ పార్లనం కిజినాన్

* 22:37 22:37 యెసయ 53:12.

39 యేసు పట్నం డిఃస్తాండ్రె వన్నిజ్జ్ మన్ని అలవాటు లెకెండ్ ఒలివ గొరొత్ సొహాన్. వన్ని సిసూర్ వన్ని వెట సొహార్.

40 అబ్బె సొహిజ్, వాండ్రు వరిజ్, “సయ్తాన్ సికుదు అర్పెఎండ పార్లనం కిదు”, ఇజి వెప్తాన్.

41 వాండ్రు వరి బాణిజ్ పణుకు విసీర్ని నసా దూరం సొహాండ్రె, ముణుకుజ్ ఊర్జి పార్లనం కిజినాన్.

42 “ఓ బా, నిజి ఇస్టం ఆతిజి యా కస్టమ్కు నా బణిజ్ లాగ్ అ. అహిజ్ బా నా ఇస్టం ఆవెద్, నీ ఇస్టమ్ నె ఆపిద్”, ఇజి.

43 అయావలె దేవుణు మంజిని బాడ్డిః దాన్ ఉండ్రె దేవుణు దూత వన్నిజ్ తోరె ఆతండ్రె, వన్నిజ్ ఒదరిస్తాన్.

44 వాండ్రు ఓరిస్తెజ్ అల్ ఇ గొప్ప దుకమ్ దు మహిజ్, మరి నండొ పార్లనం కితాన్. వన్ని రూణు నల బొటుజ్ లెకెండ్ బూమిదు అరై.

45 వాండ్రు పార్లనం కితి నిజితండ్రె, వెనుక సిసూర్ డగ్రు సొహాన్. సొహిజ్ వారు దుకం దాన్ నిద్ర కిజినిక సుడఃతాన్.

46 అందెజి వాండ్రు వరిజ్, “ఎందనిజ్ మీరు నిద్ర కిజినిదెర్? నిజ్ జి, సయ్తాను మిజి పరిస కిజి తప్పదు అర్పెఎండ పార్లనం కిదు”, ఇజి వెప్తాన్.

యేసుజ్ అరెస్టు కిజినార్

47 యేసు యా మాటెజ్ వెహ్ని మహిజ్, నండొ జెనం వాతాద్. పనెండు సిసూర్ లొఇ మన్ని యూద ఇనికానె వరి ముజాల సొహాన్. వాండ్రు యేసుజ్ ముదు కిదెజ్ వన్ని డగ్రు వాతాన్.

48 అయావలె యేసు, “ఓ యూద, ముదు కిజినె, నీను లోకు మరిసి అతి నజి ఒపజెప్పిదా?”, ఇజి వన్నిజ్ వెన్ బాతాన్.

49 యేసు వెట మహి సిసూర్ జర్గినికెజ్ సుడఃతిజ్, వారు, “ప్రబువా, మాపు కూర్లదాన్ వరిజ్ కత్తెజ్?”, ఇజి వెన్ బాతాన్.

50 వరి లొఇ ఒరెన్ విజు పుజెరిజి ముస్సు పెరి పుజెరి పణిమణిసిజ్ ఉణెర్ గిబ్బి తెవు కత్తాన్.

51 గాని యేసు, “అలె కిదు”, ఇజి వెహండ్రె, అయా పణిమణిసిజ్ గిబ్బిదిజ్ ముట్టాండ్రె వన్నిజ్ నెగెండ్రె కిత్తాన్.

52 యేసు వన్నిజ్ అస్తైజ్ వాతి పెరి పుజెరిజు, దేవుణు గుడిః అతికారిజు పెద్దెల్జ వెట, “నాను డొజి వాండ్రునా? నజి అస్తైజ్ పెరి కూడఃమకు కొణెజ్ అసి మీరు వాతిదెర్?

53 రోజు నాను మీ వెటనె మంజి గుడిఃదు నేర్పిస్త గదె. అయావలె మీరు నజి తోహాఇతిదెర్. యాకదె నజి తోహాకైజ్ దేవుణు మిజి సిత్తి సమయం. ఏలు సయ్హాన్ అతికారమ్దు మనాన్”, ఇజి వరిజ్ వెహ్హాన్.

యేసుజ్ నెన్ఎ ఇజి పేతురు వెహ్హినాన్

54 వారు వన్నిజ్ తోహాక్తారె, విజు పుజెరిజు ముస్సు మన్ని పెరి పుజెరి ఆతి వన్ని ఇండ్రొ ఒతాన్. పేతురు దూరం దాన్ వెన్కా సొన్ని మహాన్.

55 వారు డేవ నడిఃమి, సిసు ఎర్సి కూడఃజి బసి మహివలె, పేతురు వరి వెట బస్తాన్.

56 అయా ఇండ్రొణి పణిమణిసి ఉండ్రె, పేతురు సిసు డగ్గ బస్సిక సుడఃతాద్. వాండ్రు ఎయెన్ ఇజి నెస్తైజ్ వన్నిజ్ డిటాజ్ బేస్తాద్. బేస్తాదె, “వీండ్రు బా వన్ని వెట మహాన్”, ఇజి అది వెహ్హాద్.

57 అందెజె పేతురు, “ఓ బీ, నాను వన్నిజ్ నెన్ఎ”, ఇజి వెహ్హాన్.

58 సణెం వెనుక మరి ఒరెన్ వన్నిజ్ సుడఃతాన్. “నీను బా వరి వెట మహికిదె”, ఇజి వెహ్హాజ్, “బాబు, నాను వన్నిజ్ నెన్ఎ”, ఇహాన్.

59 డగ్గు ఉండ్రె గంట వెన్కా మరి ఒరెన్ కసితం వెహ్హాన్, “నిజమె, వీండ్రు బా వన్ని వెట మహాన్. ఎందనిజ్ ఇహిజు, వీండ్రు గలిలియదికానె”, ఇజి.

60 దన్నిజ్ పేతురు, “ఓ బాబు, నీను వెహ్హిక నజి తెలిఎద్”, ఇజి వెహ్హాన్. వాండ్రు వెహ్హిమహివలె వెటనె కొరు కెరెతాద్.

61 యేసు వెనుక మహ్హండ్రె పేతురుజ్ డిటాజ్ బేస్తాన్. అయావలె ప్రబు వన్నిజ్, నేండ్రు కొరు కెరెని ముజాల నీను నజి నెన్ఎ ఇజి ముసార్ వెహ్హాలె ఇజి”, వెహ్హి మాట పేతురు ఒడఃబితాన్.

62 వీండ్రు వెల్లి సాహండ్రె నండొ దుకం ఆజి అడఃబతాన్.

కాప్ కినికార్ యేసుజ్ వెక్రిసినార్

63 యేసుజ్ కాప్ కిజి మహికార్ వన్నిజ్ వెక్రిసి డెయిదెజ్ మొదొల్స్తార్.

64 వారు ని కణకెజి కసెల్దాన్ తొహ్కారె, “ఓ ప్రవక్త, వెహ్అ, ఎయెన్ నిజి డెయితాన్ ఇజి”, ఇజి వెన్బాతార్.

65 వారు వన్నిజ్ దూసిన్ని మరి నండొ మాటెజ్ వన్నిజ్ వెహ్తార్.

యేసుజ్ పిలాతుని హెరోదుజ్ ముజాల నిల్ఫ్తార్.

66 పెందాల్ ఆతివెలె, యూదురి పెద్దలుజ్, పెరి పుజెరిజు, యూదురి రూలుజ్ నెస్సిన్సికార్ విజెరె కూడితార్. యేసుజ్ వరి ముజాల నిల్ఫ్తార్.

67-68 వారు వన్నిజ్, “నీను క్రిస్తు నా, మజి వెహ్అ”, ఇజి వెన్బాతార్. అందెజె యేసు వరిజ్, “క్రిస్తు ఇజి నాను వెహ్పిజ, మీరు నమిఇదెర్. నాను మిజి వెన్బాతిజ మీరు మర్జి వెహ్ఇదెర్.

69 గాని ఎలుదాన్, లోకుమరిసిఆతి నాను గొప్ప అతికారం మని దేవుణు ఉణెర్ పడెకాదు బస్సలె”, ఇజి వెహ్తాన్.

70 అయావలె వారు విజెరె, “అహిజ, నీను దేవుణు మరిసినా?”, ఇజి వన్నిజ్ వెన్బాతార్. వెన్బాతిజ్ వాండ్రు, “మీరు వెహ్పి లెకెండెనె, నానె దేవుణు మరిసి”, ఇజి వెహ్తాన్.

71 అందెజె వారు, “ఎందానిజ్ మజి మరి రుజుప్ వెహ్పికార్. వన్ని వెయ్దానె మాట వెహ్ట్”, ఇజి వెహ్తార్.

23

1 అయావలె, యూదురు అతికారిజు విజెరె నిహరె, యూదయ దేసెం సుడెజిని రోమ అతికారి ఆతి పిలాతు బాన్ వన్నిజ్ ఒత్తార్.

2 వారు, “వీండ్రు మా లోకుర్ నడిమి గొడెబ రేప్పినాన్. రోమ రాజు ఆతి కయ్సరుజ్ పన్ను సీమాట్ ఇజి వెహ్పినాన్. నానె క్రిస్తు అహిజ రాజు ఇజి వెహ్పినాన్”, ఇజి వన్ని ముస్కు నేరం మొహ్తార్.

3 అందెజె పిలాతు యేసుజ్, “నీను యూదురిజ్ రాజునా?”, ఇజి వెన్బాతాన్. వెన్బాతిజ్, “ఒబ, నీను వెప్తి వజనె”, ఇజి మర్జి వెప్తాన్.

4 పిలాతు పెరి పుజెరిజి వెట మంద లోకుర్ వెట, “విని మున్కు నజి, ఇని తప్పు బా తోర్ఎద్”, ఇజి వెప్తాన్.

5 గాని వారు, “ఏక ఏక వెప్తార్, “వీండ్రు యూదయ దేసెమ్ది లోకుర్ విజెరిజ్ వన్ని మాట నెస్పిసి గొడబ రేప్పినాన్. యా పణి గలిలయదు మొదొల్ని ఇబ్బె దాక వాతాన్”, ఇజి.

6 యాక వెంజి, “వీండ్రు గలిలయదికాండ్రా”, ఇజి పిలాతు వెన్బాతాన్.

7 యేసు హేరోదు ఏలుబడికి కిని గలిలయ ముటదికాన్ ఇజి పిలాతు నెస్తాన్. అందెజె వాండ్రు వన్నిజ్ హెరోద్బాన్ పొక్తాన్. అయావలె హెరోదు బా యెరుసలెమ్దు మహాన్.

8 హేరోదు యేసుజ్ సుడెతివెలె నండొ సర్ద ఆతాన్. ఎండనిజ్ ఇహిజి, యేసు వందిజ్ నండొ వెహ మహాన్. నండొ కాలమ్దాన్ వన్నిజ్ సుడెదెజ్ ఆస ఆజి మహాన్. యేసు కిని బమ్మ ఆని పణిజి సుడెదెజ్ కోరితాన్.

9 అందెజె వాండ్రు నండొ మాటెజ్ వెన్బాతాన్. గాని యేసు ఇనికబా మర్జి వెహ్ఎతాన్.

10 పెరి పుజెరిజి, యూదురి రూలుజ్ నెస్పిస్సికార్ బాన్ నిల్చి, వన్ని మున్కు డటిసి నేరం మొప్పి మహార్.

11 హేరోదుని వన్ని సయ్నమ్దికార్ వన్నిజ్ వెక్కిసి సెకాల్ కితార్. నండొ దర మన్ని గొప్ప ఉండ్రె సొక తొడెగిన్పిస్తాండ్రె పిలాతు డగ్రు మర్జి పొక్తాన్.

12 అయా రోజునె పిలాతుని హేరోదు కూలెజ్ ఆతార్. దిని ముజాలె వారు పగ్దాన్ మహార్.

13-14 అయావలె పిలాతు, పెరి పుజెరిజి, అతికారిజి, లోకాజ్ కూకెస్తిండ్రె వరిజ్, “లోకుర్ నడిమి గొడబ రేప్పినాన్ ఇజి వెప్పి వినిజ్ మీరు నా బాన్ తతిదెర్. మీ ఎద్రు నాను వినిజ్ వెన్బాత. గాని మీరు వెప్తి నేరం ఇనికబా విని లోఇ నజి తోర్ఎత.

15 అయలెకెండెనె, హెరొదుజ్బా తోరెంతాన్. వాండ్రు వినిజ్ మా డగ్రు మర్జి పొక్తాన్. ఇదిలో వీండ్రు సావుదిజ్ తగితి ఇన్ని పణి బా కిఎన్.

16 అందెజె నాను వినిజ్ సిక్స సీజి డిన్ను సీన”, ఇజి వెహ్తాన్.

17 (ఏంటు ఏంటు కిని పన్ను పండొయిదిజ్ లోకు కోరిపాతి ఒరెన్ జెలిదు మన్ని వన్నిజ్ డిసి సిదెజ్ పిలాతుజ్ అలవాటు).

18 గాని లోకురె విజెరె, “సప్త వన్నిజ్ బరబెజ్ మజి డిసి సిదా”, ఇజి ఉండ్రె లెకెండె డటం డేడిస్టార్.

19 బరబ్బు పట్టుమదు గొడబ రేపిస్తాండ్రె, సెగొండారిజ్ సప్తాన్. అందెజె వన్నిజ్ జెలిదు ఇట్టా మహార్.

20 యేసుజ్ డిస్టెజ్ కోరిజి పిలాతు మరి లోకురిజ్ నాను వన్నిజ్ డిస్టెజా? ఇజి వెన్బాజినాన్.

21 గాని వారు, “వినిజ్ సిలువారు కుటిజాణిజ్ డెయిజి సప్త, సిలువారు కుటిజాణిజ్ డెయిజి సప్త”, ఇజి నండొ గగొల్ ఆతార్.

22 ముసార్దిజ్ వాండ్రు వరిజ్, “ఎందానిజ్? ఇన్ని తప్పు వీండ్రు కితాన్? సావుదిజ్ తగితి ఇన్ని తప్పు బా నాను విని లొఇ తొవిత. అందెజె నాను వినిజ్ సిక్స సీజి డిన్ను సీన”, ఇజి వెహ్తాన్

23 గాని వారు, “వినిజ్ సప్తజ్వెలె”, ఇజి మరి మరి డటం డేడిస్టార్”. ఆహె వరి గగొల్ గెలిస్తాద్.

24 అందెజె పిలాతు వారు వెహ్తా వజ జర్గిపిద్ ఇజి తీర్పు సిత్తాన్.

25 పిలాతు వారు లొస్తి వన్నిజ్ డిస్టె సితాన్. అయా వాండ్రు పట్టుమదు గొడబ రేవ్తి వందిజ్ సెగొండారిజ్ సప్తి వందిజ్ జెలిదు మహాన్. యేసుజ్ వారు కోరితివజ కిదెజ్ వరి కీదు ఒపజెప్తాన్.

యేసుజ్ సిలువారు కుటిజాణిజ్ డెయిజినార్

26 వారు వన్నిజ్ ఒసి మహార్. అయావలె, మరి ఉండ్రె దేసెమ్ది కురెనియ పట్టుమదికాన్ ఆతి సిమోన్ ఇనికాన్ ఒరెన్ యెరూసలెం పట్టుం వెల్లిదాన్ అయా సరి యెరూసలెం పట్టుమదు వాజి మహాన్. వారు వన్నిజ్ అస్తారె, యేసువెట, వన్ని వందిజ్ సిలువ పిండిదెజ్ వన్నిజ్ సితార్.

27 మంద లోకుర్ వన్ని వెన్నా వాజి మహార్. వరిలోఇ బోదెక్ వన్ని వందిజ్ గుండె కొత్తె అజి అడఃబాజి వాజి మహె.

28 యేసు వరిదరిజ్ మర్జి, “యెరుసలెమ్ది బీబికండె, మీరు నా వందిజ్ అడఃబామాట్. మీ వందిజ్ని మీ కొడోర్ వందిజ్ అడఃబాదు.

29 ఎందానిజ్ ఇహిజు వారు, “గొడ్డు బోదెకాజ్ బా పాలు ఉటప్పిన్ ఇ వన్నాజ్ గొప్పు నెగెద్”, ఇజి వెప్పి దినమ్కు వానెలె.

30 అయావలె వారు, “మా ముస్కు అర్అ”, ఇజి గొరొకాజ్ వెట, మజి పడఃగ్అ”, ఇజి మెటెజు వెట వెహ్వార్లె.

31 ఎందానిజ్ ఇహిజు, “మరాన్* పసీజ్ మనివెలె నిసా బాదెజ్ కితిజు మరాన్ వప్పిజు మరి ఎసా బాద కినారొ”, ఇజి వెహ్వార్.

32 మరి రిఎర్ డొజారిజుబా వన్నివెట సప్తెజ్ ఒసి మహార్.

33 వారు బుర్ర పిణికి ఇజి కూక్సి బాడిఃదు వాతారె. అబ్బె యేసుజ్ సిలువాదు కుటిజాణిజ్ డెయ్తారె. ఒరెన్ వన్నిజ్ ఉణెర్ పడఃకాద్, మహి వన్నిజ్ డెబర పడఃకాద్. సిలువ పొక్తారె.

34 అయావలె యేసు, “ఓ బా, మీరు కిజినిక ఇనిక ఇజి విరిజ్ తెలివద్. అందెజె విరిజ్ సెమిన్అ”, ఇజి పార్దనం కితాన్. వారు వన్ని సొక్కెజ్ సీబె ఆదెజ్ సీటిజ్ పొక్తారె.

35 లోకుర్ నిహారె సుడఃజి మహివలె, అతికారమ్దు మనికారె, “వీండ్రు మహి వరిజ్ రక్సిస్తాన్. వీండ్రు క్రిస్తు ఇహిజు, వినిజ్ వీండ్రె రక్సిసె ఆపిన్”, ఇజి వెప్పి వెక్రిస్తారె.

36-37 సయ్నమ్దికారెబా వాతారె, వన్నిజ్ సెకాల్ కితారె. వారు వన్నిజ్ సేందుదిక ఉండ్రె ఉండెజ్ సితారె, “నీను యూదురి రాజు ఇహిజు, నిజి నీనె రక్సిసె ఆఅ”, ఇజి వెప్పి సెకాల్ కితారె.

38 “వీండ్రు యూదురిజ్ రాజు’ ఇజి వన్ని ముస్కు మొప్పి నేరం బోర్డుదు రాసి సిలువాదు ఇట్టారె.

39 సిలువాదు డెయితి డొజారిజు లోఇ ఒరెన్, “నీను క్రిస్తుగదె. నిజి నీనె రక్సిసె ఆపిన్. మజి బా రక్సిన్అ”, ఇజి వన్నిజ్ దూసిస్తాన్.

* 23:31 23:31 యాక యూదురి ఉండ్రె మాట. దిని అర్దం ఇనిక ఇహిజు తప్పకిఇతి నజి వారు సిక్కు సీతిజు నండొ సెఇవరిజ్ దేవుణు ఎస్సొ సిక్కు సీనాన్.

40-41 గాని మహికాన్, “నీను దేవుణుదిజ్ తియెల్ ఆజదా? వన్నిజ్ దొహ్కొక్కి సిక్చనె నిజి బా దొహ్కొక్కు మనాద్. నాయం దానె మజి సిక్చిస్తార్. ఎందనిజ్ ఇహిజ, మాటు కితి మని పణిదిజ్ తగితి సిక్చ సితార్. గాని వీండ్రు ఇని తప్పు బా కిఎన్”, ఇజి వన్నిజ్ గోల కిత్తాన్.

42 మరి, “యేసు, నీను రాజు ఆజి మర్జి వానివలె, నజి ఒడఃబిఅ”, ఇజి వెహ్తాన్.

43 అందెజె యేసు, “నిజమె నాను నీ వెట వెహ్సిన, నేండ్రు నీను నా వెట పరలోకమ్దు మంజినిలె”, ఇజి వెహ్తాన్.

యేసుసిలువ ముస్కు పాణం డిస్తాన్.

44-45 అయావలె సమయం వేడె: పన్నెండు గంటెజ ఆతాద్. మూండ్రు గంటెజదాక లోకం విజు సీకటి వాతాద్. పొదు జాయి సిఎతాద్. యెరూసలెం గుడిః తెర మహి పాత ముస్కుహాన్ అడ్లి దాక నడిఃమిహాన్ రుండి ముకెజ్ కింజితాద్.

46 యేసు, “ఓ బా, నా పాణం నీ కీదు ఒపజెప్పిన”, ఇజి వెహ్తాన్. యా లెకెండ్ వెహ్ండ్రె వాండ్రు పాణం డిస్తాన్.

47 అయావలె సయినమ్దివరి అతికారి, జర్గితిక సుడఃతండ్రె, “నిజమె వీండ్రు నీతినిజయిదికాండ్రె”, ఇజి వెహ్సి దేవుణుదిజ్ పొగిడిఃతాన్.

48 సుడఃదెజ్ కూడిఃతి వాతి లోకుర్ విజెరె జర్గితికెజ్ సుడఃజి, గుండె కొత్తె ఆజి మర్జి ఇండ్రొ సొహాన్.

49 గాని వన్నిజ్ నెల్వ ఆతికార్ విజెరె, నెలవాతివరి లొఇ గలిలయదాన్ వన్ని వెట వాతి బోదెకు, దూరం నిల్చి యాకెజ్ సుడఃజి మహార్.

యేసుజ్ సమాది కిజినార్

50-51 అయావలె యోసేపు ఇనికాన్ ఒరెన్ మహాన్. వాండ్రు యూదయ దేసెమ్ది ఆరిమతియ ఇన్ని పట్టుమ్దికాన్ వాండ్రు సన్హద్రి సజమ్దు మన్ని వరిలొఇ పెరికాన్ ఒరెన్. వాండ్రు నీతి నిజాయితి మనికాన్. యేసుజ్ సిలువాదు డెఃయిజి సహ్తెజ్ యూద

పెద్దల్జ కితి తిరుమానం ఒప్పకొడెఁవితాన్. దేవుణు ఏలుబడిః తోరె ఆనివందిజ్ వాండ్రు ఎద్రు సుడెఃజి మహాన్.

52 వాండ్రు పిలాతు డగ్రు సొహండ్రె యేసు పీనుగు లొస్తాన్.

53 వాండ్రు, అయా పీన్గు సిలువ ముస్కుహాన్ డిఃప్తాండ్రె తెల్లాని పాతదాన్ సుటిసి సటు పణుకుదిజ్ దొల్స్తి దూకిదు ఇట్టాన్. అయా దూకిదు, ముజాలె ఎయెరిజ్బా ఇడ్విరె.

54 అయా రోజు, విస్త్రాంతి దినం ముజాల మన్ని తయార్ కిని రోజు. విస్త్రాంతిదినం మొదొల్స్తెజ్ టయం డగ్రు ఆజినాద్.

55 యేసు వెట గలీలయదాన్ వాతి బోదెకు యోసేపు వెట సొహెనె, దూకి ని వన్నిజ్ ఇట్టిక సుడెఃతె.

56 వాండ్రు ఇండ్రొ మహారె, పీన్గుదిజ్ రాస్తెజ్ వాసనం నూనె తయార్ కితార్. విస్త్రాంతి దినం మొదొల్స్తెజ్ యూదురి రూలుజ్ నమ్మిజి అవిక్ రొబితార్.

24

యేసు మర్జి నిజ్జినాన్

1 వారమ్దిజ్ మొదొహి రోజు కోడిఃజామ్నె, బోదెకు అవి తయార్ కితి వాసనం నూనెజ్ అస్తెనె దూకిదు సొహె.

2-3 అవిక్ అబ్బె వాతిజ్, దూకి మూక్తి పెరిపణుకు గూర్బాతి మహిక సుడెఃతె. అవిక్ లొఇ డుగితిజ్ యేసు పీనుగు తోరెవితాద్.

4 దిన్ని వందిజ్ బమ్మ ఆజి నిహి మహివలె, మిరిస్సివజ తెలాని సొక్కెజ్ తొడెఃగితి రిఎర్ మొగవారు వన్కా డగ్రు నిహార్.

5 అవిక్ నండొ తియెల్ ఆజి ముణుకుజ్ ఊర్జి మాడిఃస్తె.

6 అయావలె అయా మొగవారు వన్కాజ్, “ఎందనిజ్ మీరు బత్తితి మన్నివన్నిజ్ సాతివరిబాన్ రెబాజిన్దెర్? వాండ్రు ఇబ్బె సెలెన్. నిజిత మనాన్. మీ వెట గలీలయదు మహివలె వాండ్రు ఇనిక వెహ్తాన్ ఇజి ఎత్తు కిదు.

7 ఇనిక వెహ్లాన్ ఇహిజ, 'లోకుమరిసి సెఇవరి కీదు ఒపజెవె ఆదెజ్వెలె. సిలువారు పొకె ఆజి, వాండ్రు సాజి మూండ్రె రోస్కాజ్ నిజ్నాన్లె', ఇజి", ఇజి వెహ్లాన్.

8 ఆయావలె అవిక్ యేసువెహ్లా మాట ఒడోబితె.

9 దూకిదాన్ మహైనె, అబె సుడోతికెజ్ విజు పదకొండు మణిసి సిసూరిజ్ని మహి వరిజ్ విజెరిజ్ వెహ్లా*.

10 అవిక్ ఎయెక్ ఇహిజ, మగ్దలెనె మరి, యోసన, యాకోబుజ్ అయిసి ఆతి మరియ, వన్కావరివెట మహి మరి సెగొండెక్ బోదెక్ ఇవిక్నె జర్గితికెజ్ అపొస్తుడురిజ్ వెహ్లాకెజ్†.

11 గాని వారు బోదెక్ వెహ్లా మాటెజ్ నమిఎతార్. ఎందానిజ్ ఇహిజ, ఆకెజ్ పంబర మాటెజ్ లెకెండె వారు ఒడోబితార్.

12 అపొజ్బా, పేతురు నిజితండ్రె, దూకిదు ఊహ్కొక్సి సాహాన్. వజితి సుడోతిజ్ పీన్గు సుటిన్తి తెల్లాని పాతెజ్ అర్తి మహికదె సుడోతాన్. వాండ్రు జర్గితికెజ్ వందిజ్ బమ్మ అజి ఇండ్రొ మర్జి సాహాన్.

యేసు రిఎర్ సిసూరిజ్ తోరె ఆజినాన్

13 ఆయా రోజునె, సిసూర్లోఇ రిఎర్ ఎమాయుఇని ఉండ్రె నాటో సొన్ని మహార్. ఎమాయు యెరూసలెమ్దాన్ పదకొండు కిలో మీటర్ దూరం మనాద్.

14 వారు రిఎర్ జర్గితి విజు వందిజ్ వర్గిజి మహార్.

15-16 వారు ఆహె వర్గిజి మహిజ్ యేసు వాండ్రె వాజి వరి వెట నడితాన్. వారు వన్నిజ్ సుడోతార్, గాని వన్నిజ్ గుర్తు అస్తెజ్ అట్ఏతార్.

* **24:9 24:9** యా పన్నువెర్సికార్ యూదురి దేసమ్దిజ్ బాదకిజిని రోమ ప్రబుత్వం వందిజ్ పణికినికార్ విరు యూదురిజ్ పడోఇకార్ అకాదె ఆవండె వీరు నండ్రొ పన్ను లోసి యూదురిజ్ బాద కిసార్. ఆహె అనయమ్దాన్బా వారు ఆస్తి గణిస్సానార్. వారు యూదురి రూలుజ్ లోజివర్ అందెజె యూదురు వరిజ్ పాపం కినికార్ ఇజి వెహ్లాన్. † **24:10 24:10** యాక యూదురి ఉండ్రె మాట దిన్ని అర్దం ఇనిక ఇహిజ తప్పకిఇతి నజీ వారు సిక్ససితిజ నండ్రొ సెఇవరిజ్ దేవుణు ఎస్సొ సిక్స సిసాన్ ఇజి.

17 నస్తవలె యేసు, “మీరు నడిఃజి వర్గిజిని యా మాటెజ్ ఇనికెజ్”, ఇజి వరిజ్ వెన్బాతాన్. వారు దుకందాన్ మొకొం డిఃప్తారె, కద్దింండ నిహార్.

18 వెనుక వరిలోఇ క్లెయొపా ఇనికాన్ ఒరెన్ యేసుజ్, “యెరూసలెమ్దు కూల వాతి వరి లోఇ మంజి, సొహి రోస్కాజ్ జర్గితికెజ్ నెన్ఇతికి నీను ఒరిదె”, ఇజి వెప్తాన్.

19 “ఇనికెజ్ జర్గితె?”, ఇజి వాండ్రు వెన్బాతాన్. దనిజ్ వారు ఈహు వెప్తారె. “నజరెతుదికాన్ యేసుజ్ జర్గితి సజతిజి వందిజ్ వర్గిజినావ్. వాండ్రు ఒరెన్ ప్రవక్త. వాండ్రు కితి గొప్ప పణిజాణిజ్ వెప్తా గొప్ప సజతిజాణిజ్ దేవుణు వన్నిజ్ ఇస్టం ఆతాన్. లోకుర్ విజెరె బా వన్నిజ్ ఇస్టం ఆతారె నమ్మితార్.

20 మా పెరి పుజెరెజు, అతికారిజు, రోమ అతికారి కీదు సావుదిజ్ సిక్స సీదెజ్ వన్నిజ్ ఒవజెప్తారె. వారు వన్నిజ్ సిలువాదు కుటిజాణిజ్ డెయిజి సప్తారె.

21 వీండ్రునె ఇస్రాయేలు లోకాజ్ డిస్పిన్నికాన్ ఇజి మాపు ఎద్రు సుడఃజి మహావ్. యాకదె ఆవండ, యా సజతి జర్గిజి నేహాన్ మూండ్రి దినమ్కు ఆతె.

22-23 మరి. మా లోఇ మన్ని సెగొండెక్ బోదెక్ మజి నండో బమ్మ కిబిస్తె. ఎలాగ ఇహిజ, కోడిఃజామ్నె దూకిదు సొహి గాని వన్కాజ్ వన్ని పీన్గు తోరెవతాద్. అవీకు మరజి వాతెనె మజి ఈహు వెప్తా. దూతార్ వన్కాజ్ తోరె ఆతారె, యేసు బత్కిత మనాన్ ఇజి వెప్తార్ ఇజి.

24 మా వెట మనికార్ సెగొండార్ దూకిదు సొహరె, బోదెక్ వెప్తా వజనె సుడఃతార్. వన్నిజ్ వారు సుడఃవితార్.

25-26 అయావలె వాండ్రు వరిజ్, “బుద్ధి సిలికిదెరె, ప్రవక్తరు వెప్తా మాటెజ్ విజా నమిదెజ్ మిజి నండో కస్టం ఆజినాద్. క్రీస్తు యా లెకెండ మాలెజ్ఓరిసి, దేవుణు మంజిని బాడిఃదు వన్నివెట అతికారమ్దు మండ్రెజ్గదె?”, ఇజి వెప్తాన్.

27 వాండ్రు దేవుణు మాటదు వన్ని వందిజ్ రాస్తి మన్ని దని అర్థం వరిజ్ వెప్తాన్. మొసె రాస్తి పుస్తకమ్దాన్ మొదొల్ని ప్రవక్తరు విజెరె రాస్తి

పుస్తకమ్ దాక మన్ని మటెజ వెప్పి వాతాన్.

28 వారు సొన్నిని నారు డగ్రు ఆతిజ్, వాండ్రు వరిజ్ డిసి మరి దూరం సొన్నిని లెకెండ్ నడితాన్.

29 గాని వారు, “మా వెట మన్అ. పొద్దుఆజినాద్. సీకాట్ ఆతాద్”, ఇజి వెప్పి వన్నిజ్ మరి మరి వెప్టాన్. అందెజె వాండ్రు వరి వెట మండ్రెజ్ సొహాన్.

30 వాండ్రు వరి వెట ఉండెజ్ బస్తివెలె, రొటె అస్తాండ్రె దేవుణుదిజ్ వందనమ్కు వెప్పి దనిజ్ రుక్కి వరిజ్ సితాన్

31 వెటనె వారు వీండ్రు యేసు ఇజి గుర్తు అస్తార. గాని వాండ్రు వరిజ్ తోర్వీండ ఆతాన్.

32 అయావలె వారు రిఎర్, “వాండ్రు సర్దు, మా వెట వర్గిజి, దేవుణు మాటెజ్ మజి నెన్పిస్తివెలె, మా మన్నుదు నండొ సర్ద వాతి లెకెండ్ ఆతాద్ గదె”, ఇజి ఒరెన్ వెట ఒరెన్ వర్గితాన్.

33-34 వెటనె వారు నిజితారె, యెరూసలెమ్దు సొహార్. అబె, వారు పదకొండు మణిసిర్ సిసూర్ని వరి వెట మహికార్ కూడెజి, “నిజమె, యేసు మర్జి నిజితాన్. సిమొనుజ్తోరె ఆతాన్ ఇజి వర్గిజి మహికా సుడెతాన్.

35 అయావలె వారు రిఎర్, సర్దు జర్గితికెజ్ యేసు రొటె రుక్కివెలె వారు ఎలాగ గుర్తు అస్తారొ దన్నివందిజ్ వెప్టార్.

సిసూర్ కూడితివెలె వరిజ్ తోరె ఆజినాన్

36 వారు వర్గిజి మహివలెనె యేసు వాండ్రె వరి నడిమి నిహండ్రె, “సమాదనం కల్లిపిద్”, ఇజి వెప్టాన్.

37 దూబ తోరితాద్ ఇజి ఒడిబిజి వారు నండొ తియెల్ ఆతార్.

38 నస్తివలె వాండ్రు, “ఎందానిజ్ మీరు తియెల్ ఆజిన్దెర్? ఎందనిజ్ అనుమానమ్కు మీ మన్నుద్ వాజినె?

39 నానె వాండ్రు ఇజి నమిదెజ్ నా కిక్కాజ్ కాల్యాజ్ సుడెదు. ఎందానిజ్ ఇహిజ, నజి మన్ని లెకెండ్ దూబదిజ్ ఒడొల్ మన్ఉ.

40 యా మటెజ్ వెప్పి వాండ్రు వరిజ్ వన్ని కిక్కు కాల్యు తోరిస్తాన్.

41-43 అహిజ్బా వారు సర్దదాన్ బమ్మదాన్ ఇంక నమ్మిఎండ మహార్. అందెజె వాండ్రు వరిజ్, “తిండ్రెజ్ ఇనికబా మనాదా?”, ఇజి వెన్బాతిజ్, వారు ఉండ్రీ సుహ్త్తి మొయ ముకెజ్ సీతార్. వాండ్రు లొస్తాండ్రె వరి ఎద్దు తిహాన్.

44 మరి వాండ్రు వరిజ్, “నాను మీ వెట మహివలె యాకెనె మీ వెట వెహ్తా. ఇనిక ఇహిజ, మోసె రాస్తి పుస్తకమ్దు, ప్రవక్తరు రాస్తి పుస్తకమ్దు, కీర్తన పుస్తకమ్దు నా వందిజ్ రాస్తి మనికెజ్ విజు పూర్తి ఆదెజ్వెలె”, ఇజి.

45 వాండ్రు దేవుణు మాటెజ్ అర్లం కిదెజ్ వరిజ్ సాయం కిత్తాన్.

46-47 వాండ్రు వరిజ్ ఈహు వెహ్తాన్. “యా మాటెజ్ రాస్త మనాద్. అయాక ఇనిక ఇహిజ, క్రీస్తు మాలెజ్ ఓరిసి, సాజి మూండ్రీ రోస్కాణిజ్ సాపదాన్ నిజ్నాన్లె. యెరూసలెమ్దు మొదొల్ని లోకాజ్ విజెరిజ్ వన్ని అతికారమ్దాన్ ‘పాపమ్కు బప్పుకొడెఅ’, దేవుణు సెమిస్నాన్”, ఇని మాట వెహె ఆనాద్లె.

48 మీరు సుడెఃతికెజ్ లోకాజ్ వెహ్తాజ్.

49 నా బుబ్బు ఒట్టు కితి దేవుణు ఆత్మదిజ్ నాను మిజీ పోక్కు. గాని ముస్కుహాన్ సత్తు మీ ముస్కు వానిదాక మీరు యెరూసలెం పట్టమ్దునె మండ్రు.

దేవుణు యేసుజ్ పలోకమ్దు ఒసినాన్

50 పట్టుం వెల్లి బెతానియ నారు డగ్రు దాక వాండ్రు వరిజ్ ఒతాన్. వాండ్రు కికు పెహ్తాండ్రె, వరిజ్ దీవిస్తాన్.

51 దీవిసి మహివలె వాండ్రు వరిజ్ డిస్తాన్. దేవుణు వన్నిజ్ వాండ్రు మంజిని బాడిడు ఒత్తాన్.

52-53 వారు వన్నిజ్ మాడిస్తారె, నండొ సర్దదాన్ యెరూసలెమ్దు మర్జి వాతార్. వారు డిన్ఎండ గుడిడు మంజి, దేవుణుదిజ్ పొగిడిజి మహార్.

Konda: కొండ బాసడు నెగ్గి కబ్బు
Konda Dora New Testament which was published in
2006

copyright © 2006 Wycliffe Bible Translators, Inc.

Language: Konda-Dora

Contributor: SIL International (in Asia)

All rights reserved.

2025-05-06

PDF generated using Haiola and XeLaTeX on 6 May 2025 from source files
dated 7 May 2025

840896da-3a66-5e43-9018-4a95a349d60c